

册府元龜

巡按福建監察御史臣李嗣京 訂正

分守建南道左布政使臣胡維霖

知建陽縣事 臣黃國琦 較釋

外臣部 六

土風第三

天竺國一名身毒在月氏東南數千里俗與月氏同  
而卑溼暑熱其國臨大水乘象而戰其人弱於月氏  
修浮圖道不殺伐遂以成俗 浮圖佛也 土出象犀瑇瑁金  
銀銅鐵鈇錫西與大秦通有大秦珍物又細布好氍



甃諸香石蜜胡椒薑黑鹽一說其俗佛道所興也人  
民敦龐土地饒沃其王號茂論所都城郭水泉分流  
繞于渠塹下注江其宮殿皆雕文鏤刻街曲市里屋  
舍樓觀鐘鼓音樂服飾香華水陸通流百賈交會奇  
玩珍偉恣心所欲左右喜維舍衛葉波等十六大國  
去天竺或二三千共尊奉之以爲在天地之中也  
南天竺國有伏醜城出摩尼珠珊瑚城東有拔賴城  
出黃金白旃檀石蜜葡萄土宜五穀中天竺國其俗  
土著與月支同而地卑溼暑熱稻歲四熟苗甚長茂  
沒於馳馬出獅子豹羆橐駝犀象有火齊如雲母而  
色紫精者薄如蟬翼焉有金剛似紫石英百鍊不銷  
可以切玉又有旃檀鬱金香茸蔗諸果出石蜜黑  
鹽通於大秦致其實或至扶南交趾貿易焉俗無簿  
籍以龜貝爲貨尤能習化禁呪或能呪龍以致雲雨  
丈夫致敬極者舐足摩踵而致其辭家有奇樂倡伎  
其王與大臣多服錦罽王爲螺髻於頂餘髮剪之使  
拳大夫剪髮穿耳垂瑠或以金龍懸於耳耳緩者爲  
上俗皆徙跣衣重白色婦人以金銀珍珠瓔珞掛頭  
項死者或焚屍取灰以爲浮圖或委之中野以施禽  
獸或流之於河以餉魚鼈無服制之差喪紀之數謀



反者幽殺之小犯罰錢贖罪不孝則斷手削足截耳  
割鼻放流邊外其人柔弱怯於戰鬪有弓箭甲稍亦  
有飛梯地道木牛馬之法有文字善天文筭曆之術  
人皆學悉曇章云是梵天法書於貝多樹葉以記事  
然尤修浮圖道不殺生飲酒修戒數百特信盟誓國  
中徃徃有佛舊迹存焉

康居國在天竺東南三千里其土氣物類與天竺同  
男女皆長八尺而怯弱乘象駱駝徃來隣國有寇乘  
象以戰

粟弋國屬康居出名馬牛羊葡萄衆果其土水美故  
葡萄酒特有名焉

嚴國有菴蔡北屬康居出鼠皮以輸之

阿蘭聊國

前漢菴  
蔡國也

地屬康居土氣溫和多楨松白草

民俗衣服與康居同

蒲類國居天山西疏榆谷廬帳而居逐水草頗知田  
作畜有牛馬駱駝羊能作弓矢出好馬

移支國居蒲類地其人勇猛敢戰以寇抄爲事皆被  
髮隨畜逐水草不知田作所出皆與蒲類同

東且彌國其俗廬帳居逐水草頗知田作其所出亦  
與蒲類同所居無嘗



白馬氏地險阻有麻田出名馬牛羊漆蜜氏人勇鬪抵冒貪貨死利居於河池一名仇池方百頃四面斗

絕仇池山在今成州上祿縣南仇池縣界本名仇維山上有池故曰仇池山在倉維二谷之間嘗為水

所衝激故下石而上土形似覆巖仇池記曰仇池下頃周回九千四百步天形四方壁立千仞自然樓櫓

卻敵分置調均竦起數丈有踰人工仇池凡二十三道可手緣而上東西二門盤道下至上凡有七里上

則岡阜低昂泉流交灌郡鄰道元元注水經云羊腸盤道三十六回開山圖謂之仇夷所謂積石嵯峨錄

岑隱阿者也上有平田百頃數為邊寇郡縣討之則

依固自守無貴賤皆為板屋土墻所治處各格谷蠻

俗衣布徒跣或推髻或剪髮兵器以金銀為飾虎皮

衣植便弩射皆暴悍好寇賊焉

滑國車師之別種也土地溫暖多山川樹木五穀國

人以麩及羊肉為糧其獸有獅子兩脚駱駝野驢有

角人皆善騎射着小袖長身袍用金玉為帶女人被

裘頭上刻木為角長六人以金銀飾之少女子兄弟

在妻無城郭氈屋為居東向開戶其王坐金牀隨大

歲轉與妻並坐接客無文字以木為契與旁國胡為

胡書革皮為紙無職官事天神火神每日則出戶祀

神而後食其跪一拜而起葬以木為槨父母死其子

截一耳葬訖即吉其言語待河南人譯然後通

古柯國胡密丹國檀國皆滑旁小國也衣服容貌皆

外臣部



與滑同

白題國在滑國東去滑六日行西極波斯土地出粟麥瓜果食物畧與滑同

烏長國在中天竺南一名烏使那百姓殷實人性慩弱頗詭詐尤攻禁呪之術篤信佛法言語文字禮義法式畧同天竺而弗之及也一說多解天文吉凶之數其王動則訪決焉上多林果引水灌田豆稻麥事佛多諸寺塔事極華麗人有爭訴服之以藥曲者發狂直者無恙爲法不殺犯死者唯徙於靈山西南有檀特山山上立寺以臘數頭運食山下無人控抑自知往來

乾陁國在烏長西本名業波有鬪象七百頭十人乘一象皆執兵仗象鼻縛刀以戰

獅子國天竺旁國也其地和適無冬夏之異五穀隨人所種不須時節國中有王以一善化人其樓閣皆以七寶裝晃耀街巷人衆熾盛每於晨朝警鼓曉群迷常勸念佛破諸衆生無明黑闇嘗說空理離於物外以清淨學道爲務不著於聲不著於香無量得道之處一說在西海之中延袤二千餘里多出奇寶本鬼神居之商人到則不見但置寶物價於洲上商人



依價買之而去其後鄰國人居之能馴養獅子遂以各國風俗與婆羅門同而尤敬佛法

吐谷渾在青海西其國西有黃沙洲南北一百二十里東西七十里不生草木沙洲因此爲號屈真川有鹽地其谷嶺北有雀鼠同穴或在山嶺或在平地雀色白鼠色黃地生黃紫花草便有雀鼠穴

白蘭土出黃金銅鐵其國雖隨水草大抵治慕賀川以肉酪爲糧頗識文字其男子通服長裙帽或戴羃離婦人以金花爲首飾辮髮繫後綴以珠貝其婚姻富家厚出聘財竊女而去父卒妻其群母兄亡妻其

諸嫂喪服制葬訖而除國無嘗稅調用不給輒斂富室商人取足而止殺人及盜馬者罪至死他犯則徵物以贖地宜大麥而多蔓菁頗有菽粟出蜀馬羴牛西北有流沙數百里夏日有熱風爲行旅之患風之所至唯老駝豫知之卽鳴而聚立埋其口鼻於沙中人每以爲候卽將氈擁蔽鼻口其風迅駛斯頃過盡若不防者必致危斃

党項羗三苗之後東接臨洮西平西拒葉護處山谷間其俗服裘褐被氈以爲上飾俗尚武力無法令各爲生業有戰陣則相屯聚無徃來牧養羴



牛羊猪以供食不知稼穡其俗淫穢烝報於諸夷中  
取爲甚無文字但候草木以記歲時三年一聚會殺  
牛羊以祭天人年八十以上死者以爲令終親戚不  
哭少而死者則云夭札共悲哭之有琵琶橫吹擊缶  
爲節

高昌國蓋車師之故地也南接河東連燉煌西次龜  
茲北鄰勅勒置四十六鎮交河田地高寧臨川橫截  
柳婆洿林新興繇寧始昌篤進白刀等皆其鎮名國  
人言語與中國畧同有五經歷代史諸子集面類高  
麗辮髮垂之於背着長身小袖袍縵襜袴女子頭髮  
辮而不垂著錦纈瓔珞環釧婚姻有六禮其地高燥  
築土爲城架木爲屋土覆其上寒暑與益州相似備  
植九穀人多噉麪及牛羊肉出良馬葡萄酒石鹽多  
草木草實如繭繭中絲如細纒各爲白氍毹子國人多  
取織以爲布甚軟白交市用焉有朝烏者旦旦集王  
殿前爲行不畏人日出然後散去一說男子胡服婦  
人裙襦頭上作髻其風俗政令與華夏畧同地多磧  
氣候溫暖穀麥再熟宜蠶多五果有草各爲羊刺其  
上生蜜而味甚佳出赤鹽如朱白鹽如玉多葡萄酒  
俗事天神兼信佛法國中羊馬牧於隱僻之處以避



外寇非貴人不知其所北有赤石山山北七十里有  
貪汙山下有積雪此山之北鐵勒界也從武威西北  
有捷路渡沙磧千餘里四面茫然無有蹊逕欲往者  
尋有人蓄骸骨而去路中或聞歌哭之聲行人尋之  
多致亡失蓋魍魎魍魎也故商客往來多取伊吾路  
康國者康居之後遷徙不嘗其地有胡律置於祆祠  
決罰則取而斷之重罪者族次重者死賊盜截其足  
人皆深目高鼻多鬚髯有大小鼓琵琶五絃箜篌笛  
婚姻喪制與突厥同國立祖廟以六月祭之諸侯皆  
來助祭俗奉佛爲胡書氣候溫宜五穀勤修園蔬樹  
木滋茂出馬駝驢封牛黃金鍔沙罍香阿薩那香瑟  
琴麋皮氍毹錦氍毹多葡萄酒富家或致千石連年不  
賤丈夫剪髮或辮髮其王冠氍帽飾以金寶婦人盤  
髻幪以皂巾飾以金花人多嗜酒好歌舞於道路生  
子必以石蜜內口中以膠置掌內欲其成長口嘗其  
言持錢如膠之黏物俗習胡書善商賈爭分銖之利  
男子年二十卽遠之傍國來適中夏利之所在無所  
不到以十二月爲歲首有婆羅門爲其占星候氣以  
定吉凶頗有佛法至十一月鼓舞乞寒以水相潑盛  
爲戲樂



似盤國與康國隣出好馬

瑟匿國北接石國其俗不好商賈風俗並畧與康國同焉

安國風俗同於康國唯妻其姊妹及母子遞相禽獸此爲異也

石國其俗正月六日七月十五日以王父母燒餘之骨金瓮盛之置于牀上巡遶而行散以花香雜果王率臣下設祭焉禮終王與夫人出就別帳臣下以次列坐享宴而罷有粟麥多良馬其俗善戰

女國在葱嶺之南以女爲王每居層樓侍女數百王日一聽政其王死若無女嗣位國人請斂金錢得數百萬還死王之族買女而立之其地五男三女俗貴女子賤丈夫婦人爲吏職男子爲士女子貴者則多有侍男男子不得有侍女雖賤庶之女盡爲家長猶有數夫焉生子皆從母姓男子被髮以青綠塗面婦人辮髮而縈之以皮爲鞋課稅無嘗氣候多寒以狩獵爲業出鎗石朱砂麝香羆牛駿馬蜀馬尤多鹽嘗將鹽向天竺興販其利數倍

鏐汗國古渠搜國也其王坐金羊牀妻戴金花俗多朱砂金鐵



吐火羅國在葱嶺西與緝怛雜居勝兵共五萬其國  
土多男子少婦人故兄弟通室婦人五夫則角飾戴  
五角十夫則戴十角男子無兄弟者則與他人結爲  
昆季方始得妻不然者終身無婦矣被服文字與于  
闐畧同城北有屋數頗梨山南崖穴中有神馬國人  
每牧牝馬於其側時產名駒皆汗血多善馬有屋宇  
雜以穹廬著小袖袍小口袴大頭長裙帽女子被髮  
爲辮其地與益州隣嘗通同商賈民慕其利多徃從  
之教其書記爲之辭譯稍祭黠矣一說多畜逐水草  
無城郭後稍爲宮室而人民猶以氈廬百子帳爲行  
屋地嘗風寒人行平沙中沙礫飛起行迹皆滅肥地  
則有雀鼠同穴生黃紫花瘦地輒有瘴氣使人斷氣  
牛馬得之疲汗不能行

宕昌國在河南國東本西羌種也俗皆土著居有棟  
宇其屋織毳牛尾及殺羊毛覆之國無法令又無徭  
賦唯征伐之時乃相成聚不然則各生業不相往來  
皆衣裘褐牧養羴牛羊豕以供其食父子伯叔兄弟  
死者卽以其繼母世叔母及兄弟婦子婦爲妻俗無  
文字但候草木榮落以記歲時三年一聚殺牛羊以  
祭天



鄧至國居西涼州界羌別種也其俗呼帽曰突何其衣服與宕昌同

武興國本仇池其國東連秦嶺西接宕昌去宕昌八百里南去漢中四百里北去岐州三百里去長安九百里本有十萬戶世世分減其大姓有苻氏姜氏言語與中國同著烏皂突騎帽長身小袖袍小口袴皮鞞地植九穀婚姻備六禮知書疏種桑麻出紬絹精紈漆蠟椒等山出銅鐵

西戎踈勒國在姑墨西白山之南百餘里漢時舊國也其王戴金獅子冠土多稻粟麻麥銅鐵錦綿人手足皆六指產子非六指者即不育俗事祆神有胡書文字

者至拔國在踈勒西其國東有潘賀那山出美鐵及獅子

悉蜜國在者至西其國東有山名郁悉蒲山出金玉多鐵

悉萬斤國在悉蜜西其國南有山名伽邑那山出獅子

吐呼羅國在悉萬斤東土宜五穀有好馬駝騾伽不單國在悉萬斤西北土平宜稻麥有五果



色知顯國在悉萬斤西北土平多果

伽色尼國在悉萬斤南土出赤鹽多五果

薄伽國在伽色尼南多五果

牟知國在忸密西南忸密無土風上平禽獸草木類中國

諸色波羅國在忸密南土平宜稻麥多五果韋伽

早伽至國在忸密西平土少田殖取稻麥於隣國有

五果

阿佛大汗國在忸密西土平多五果

呼似密國在阿佛大汗西土平出銀琥珀有獅子多

五果

疊伏羅國有勿悉城城北有鹽奇水西流有白象并

有阿未黎波波中織作布土宜五穀

技豆國出金銀雜寶白象水牛羆牛葡萄五果

副貨國在沒隨國東沒隨無土風宜五穀葡萄唯有馬駝

騾

波斯國大月氏之別種都宿利城其王姓波斯氏坐

金羊牀戴金花冠衣錦袍織成帔飾以真珠寶物其

俗丈夫剪髮戴白皮帽貫頭衫兩廂延下關之并有

巾帔緣以織成婦人服大衫披大帽帔其髮前為髻

後被之飾以金花仍貫五色珠絡之於膊王於其國



內別有小牙十餘所猶中國之離宮也每年四月出遊處之十月乃還王卽位以後擇諸子納賢者審書其名封之於庫諸子及大臣皆莫之知也王死乃衆共發書視之其封內有名者卽以爲王餘子各出就邊任兄弟更不相見也兵器有甲稍圍排劍弩弓箭戰並乘象百人隨之其刑法重罪懸諸竿上射而殺之次則繫獄新王立乃釋之輕罪則劓刑若髡或剪半鬢及繫排於項以爲耻辱犯強盜者禁之終身姦貴人妻者男子流婦人割其耳鼻賦稅准地輸銀錢俗事火天神婚合亦不擇尊卑諸夷之中最爲醜穢矣民女年十歲以上有姿貌者王收養之有功勳人卽分賜死者多棄屍於山一月治服城外有人別居唯知喪葬之事號爲不淨人若入城市擺鈴自別以六月爲歲首尤重七月十七日十二月一日民庶以上各相命召設會作樂以極歡娛又以每年正月二十日各祭其先者氣候暑熱家自藏冰地多沙磧引水溉灌其五穀及禽獸等與中夏畧同唯無稻及黍秫土出名馬及駝富室至有數千頭者又出白象獅子大鳥卵真珠玻瓈珊瑚琥珀瑠璃瑪瑙水精瑟瑟金銀礪石金剛火齊鑛鐵銅錫朱砂銀綾錦氎毼毼



氈毼玄麀皮及薰陸藹金蘇合青木香等胡椒畢撥  
石蜜千年棗香附子訶梨勒無食子鹽綠雌黃等物  
一說西去城十五里有土山山中有鷲鳥噉羊土人  
極以爲患國中有優鉢曇華鮮華可愛出龍駒馬鹹  
地生珊瑚樹長一二尺亦有琥珀瑪瑙真珠玫瑰等  
國內不以爲珍市買用金銀婚姻法下聘訖女婿將  
數十人迎婦背着金線錦袍師子錦袴戴天冠婦亦如  
之婦兄弟便來捉手付託夫婦之禮於茲永畢  
伏盧尼國在波斯國北東有大河南流中有鳥其形  
似人亦有如橐駝馬者皆有翼嘗君水中出水便死  
城北有云尼山出銀珊瑚琥珀多獅子

附國在党項西南數千里重罪者死輕罪者罰牛人  
皆輕捷便擊劍漆皮爲牟甲弓長六尺以竹爲弦妻  
其群母及嫂兒弟死父兄亦紉其妻好歌舞鼓簧吹  
長笛有死者無服制置屍高牀之上沐浴衣服被以  
牟甲覆以獸皮子孫不哭帶甲舞劍而呼云我父爲  
鬼所取我欲報寃殺鬼自餘親戚哭三聲而止婦人  
哭必以兩手掩面死家殺牛親屬以猪酒相遺共飲  
噉而瘞之死後十年而火葬其葬必集親賓殺馬動  
至數十匹立其祖父神而事之其俗以皮爲帽形圓



如鉢或戴幕離衣多毛毳皮裘全剥牛脚皮爲靴項繫鐵鑲手貫鐵釧王與酋帥金爲首飾臂前懸一金花徑三寸其土高氣候涼多風少雨土宜小麥青科山出金銀多白雉水有嘉魚長四尺而鱗細

朱俱波國在葱嶺北二百里漢之舊地也其俗盛崇佛法文字同於婆羅門

吐蕃國本漢西羌之地雷雨風雹霰雪每隔日有之夏節氣如中土暮春之月山有積雪其草細不過三寸牛馬皆食之地有冷瘴令人氣急不甚爲害其俗重漢繒而貴男女用爲首飾而白蘭等並臣焉其君

長或居跋布川或居邏此有小城而不居坐大氊帳連帳張大下廬其拂可坐數百人兵衛極嚴而衙府甚狹西南通泥婆羅門國卑實茲焉其百姓皆居小拂廬而無分別俗養牛羊取乳酪用供食兼取毛爲褐而衣焉不食驢馬肉以麥爲麪家不全給人死殺牛馬以殉取牛馬頭周壘於墓上其墓正方累石爲之狀若平頭屋焉其臣與君自爲友號曰共命人其數不過五人君死之日共命人皆日夜縱酒葬日於脚下針血盡乃死便以殉葬復有親信人用刀當腦縱鋸或有將四尺木大如指刺兩肋下死者十有四



五亦殉葬焉其設官父死子代絕嗣近則親襲焉非其種類輒不相伏大畧其冠章飾有五等一謂瑟瑟二謂金三謂金飾銀上四謂銀五謂熟銅各以方圓三寸褊上裝之安膊前以別貴賤其戰必下馬列行陣死則遞收之終不肯退槍細而長於漢者弓矢弱堅人皆用劍不戰負劍而行俗重戰死戰死者其墓周迴白土泥之不與諸墓連接其驛以鐵箭爲契其箭長七寸若急驛膊前加著一銀鶻更急其鶻至十二三每驛百餘里隨水草而居不嘗厥所有草名蓮右芒葉長二寸狀若斜蒿每莖不過三四葉其莖蔓其花黃其根連珠如麥門冬味辭性微冷有鼠尾長於嘗鼠每三二十同一穴至秋後衆鼠收此草根爲藏多者至數石俗嘗掘草根而食而留給鼠糧其國禁殺鼠殺鼠者輒加其罪俗亦愛而不殺有鹿服泉諸山川亦遍出泉其泉口大者丈餘小者一二尺水深尺餘其馬歷泉口行止之勇不失脚與漢戰輒引入此地漢馬顛躓因而敗績有青海去城五百里周廻四百里傍土平沃多植麥在吐谷渾西南其春夏軍糧資海魚以給有可跋海去赤嶺百里方周七百里水苦不可飲有羴牛河闊一里岸峻流入蠻西洱



河合流東號爲漾臭水又東南出會川爲瀘水焉有  
藏河去邈些三百里東南流衆水湊焉南入崑崙國  
其中有魚似鱒而無鱗州渚法之有水柳及攝木生  
焉其流不急自赤嶺至邈些川無樹木唯鉞川三十  
里緣山有枯樹邈些川三百里有柳枯樹酸棗等皆  
蟠屈不條茂有雪厚三尺周迴三十里山下有水湧  
其俗云山下有人居未嘗輒見有錄河去長安五千  
里其水有石號曰溫湯其石狀如肝方圓數尺河水  
冷石面有穴六寸湯水湧出其中流入河其石熱其  
湯沸輒不可近所留處名並爛湯中有蟲東如馬尾  
色赤長半寸有鵲莽山去長安六千里餘其國因險  
而爲防焉其山西八里狀若三峽其中水流聲若雷  
霆人語不相聞其山遠而望之色黃而白無草木兩  
岸有石壁一處瀑流自山顛飛下可百餘尺激一縣  
石似飄粉焉其俗刻木結繩其兵以金爲鏃寇至舉  
烽而應之重戰沒者爲甲門奔敗者加狐尾于首以  
示終身之耻自其王棄宋弄贊唐太宗貞觀後吞併  
諸蕃地方千里每十節度置一上相統之自號吐蕃  
爲寶髻爵位則以寶珠大瑟瑟小瑟瑟大銀小銀大  
礪石小礪石大銅小銅等爲告身以別高下重君臣



之義輕父子之道用政嚴酷人無敢違事無大小必  
出於宰相便宜從事故國風大理而飲酒者不得及  
亂女子無敢于政然緇徒之間或有專柄者好呪誓  
而多疑忌敬信釋氏誦鬼神貴壯賤老倨父傲母惟  
以淬礪為業罕務耕耘不喜病疾尤惡瘡疔出疆之  
費亦無定給而臨陣所得便為已有所以戰伐吞併  
徃必成功

北狄匈奴居于北邊隨草畜牧而轉移其畜之所多  
則牛馬羊其奇畜則橐駝驢羸馱駞騊駼奚  
駞音從何 馱音從何 駞音從何 馱音從何  
逐水草  
駒駞馬類生北海驛奚 駞驢類也 駞音從何 馱音從何

遷徙無城郭嘗居耘田之業然亦各有分地  
無文書以言語為約束兒能騎羊引弓射鳥鼠  
言其 幼小  
能少長則射狐兔  
少長言 肉食 唯食肉 士力能彎

弓盡為甲騎其俗寬則隨畜因射獵禽獸為生業急  
則入習戰攻以侵伐  
人人皆 習之 其天性也其長兵則弓  
矢短兵則刀鋌  
音蟬 鐵 把小矛 利則進不利則退不羞遁走

苟利所在不知禮義自居王以下咸食畜肉衣其皮  
革被旃裘壯者食肥美老者飲食其餘貴壯健賤老  
弱父死妻其後母兄弟死皆取其妻妻之其俗有名  
不諱而無字歲正月諸長少會單于庭祠五月大龍



城祭其先天地鬼神秋馬肥大會蹄林課較人畜計

蹄音帶繞林木而祭也鮮卑之俗自古相傳秋冬之祭無林木者尚堅柳枝衆騎祭遶三周乃止此其遺

法計者人畜之數 其法拔及尺者死坐盜者没入其家有罪

小者軌 軌謂輾轆其骨節若今之厭蹀者也軌音於點地切輾音女展切 大者死獄

久者不滿十日一國之囚不過數人而單于朝出營

拜日之始生夕拜月其坐長左而北向 左者以日為尊 日上

戊巳其送死有棺槨金銀衣裳而無封樹喪服近幸

臣妾從死者多至數十百人 或數十人或百人 舉事嘗隨月

盛壯以致戰月虧則退兵其攻戰斬首虜賜一卮酒

而所鹵得獲而以子之得人以為奴婢故其戰人人

自為趨利 趨讀曰趨趨向也 善為誘兵以包敵 包累取之 故其逐

利如烏之集其困敗瓦解雲散矣戰而扶舉死者盡

得死者家財

烏桓國本東胡也俗善騎射弋獵禽獸為事隨水草

放牧居無嘗處以穹廬為舍東開向日食肉飲酪以

毛毳為衣 毛之縵細者為毳 貴少而賤老其性悍塞 悍負也塞謂不

開 怒則殺父兄而終不害其母以母有族類父兄無

相仇報故也有勇健能理決鬪訟者推為大人無世

業相繼邑落各有小帥數百千落自為一部大人有

所招呼則刻木為信雖無文字而部衆不敢違犯氏



姓無嘗以大人健者名字為姓大人以下各自畜牧  
營產不相徃役其嫁娶則先畧女通情不以道娶為畧或半

歲百日然後送牛馬羊畜以為聘幣婿隨妻還妻家  
無尊卑旦旦拜之而不拜其父母為妻家僕役一二

年間妻家乃厚遣送女居處財物一皆為辦其俗妻  
後母報寡嫂死則歸其故夫計謀從用婦人唯鬪戰

之事乃自決之父子男女相對踞蹲以髡頭為輕便  
婦人至嫁時乃養髮分為髻著句決飾以金碧猶中

國有箇步搖箇音吉海切或為懶婦人首飾也皇后首飾有垂珠步則搖之婦人能  
刺韋作文繡織氎氎氎音力干切也男女能作弓矢鞍

勒鍍金鐵為兵器其土地宜稌及東穡東穡似蓬草  
寔如稌子至十月而熟見禽獸孕乳以別四節俗貴

兵死斂屍以棺有哭泣之哀至葬則敬舞相送肥養  
一犬以綵纓牽并取死者所乘馬衣服皆燒而送之

言以屬累音蜀類循付託也犬使護死者神靈歸赤山赤山  
在遼東西北數千里如中國人死者魂神歸岱山也

敬鬼神祠天地日月星辰山川及先大人有建名者  
祠用牛羊畢皆燒之其約法違大名言者罪至死若

相賊殺者令部落自相報不止詣大人告之聽出馬  
牛羊以贖死其自殺父兄則無罪若亡畔為大人所



捕者邑落不得受之皆徙逐於雍狂之地地無山有  
沙漠流水草木多蝮蛇

鮮卑者東胡之支也其言語習俗與烏桓同唯婚姻  
先髡頭以季春月大會於饒樂水上在今營州北飲宴畢

然後配合又禽獸異於中國者野馬羆羊角端牛以  
角為弓俗之角端弓者羆羊似吳羊而大角出西方又有貂貂鼪

子皮毛柔輭貂音女骨切鼪音胡良切輭故天下以  
為各裘

突厥世居金山其俗畜物為事兵器有弓矢鳴鏑甲  
稍刀劍其佩則兼有伏突旗纛之上施金狼頭侍衛

之士謂之附離夏言亦狼也蓋本狼生志不忌舊其  
徵發兵馬及科稅雜畜輒刻木為數并一金鏃箭蠟

封印之為俗契其刑法反叛殺人及姦人之婦盜馬  
絆者皆死奸人女者重責財物即以其女妻之鬪傷

人者隨輕重輸物盜馬及財物者各十餘倍徵之死  
者停屍於帳子孫及諸親屬男女各殺羊馬陳於帳

前祭之繞帳走馬七匝一詣帳門以刀斲面且哭血  
淚俱流如此者七度乃止擇日取亡者所乘馬及經

服用之物并屍俱焚之收其餘灰待時而葬春夏死  
者候草木黃落秋冬死者候華葉榮茂然始坎而瘞



之塋之日親屬設祭及走馬劈面如初死之儀葬訖於墓所立石建標其石多少依平生所殺人數以祭之羊馬頭盡懸挂於標上是日也男子咸盛服飾會於葬所男有悅愛於女者歸卽遣人聘問父母多不違也父兄伯叔死者子弟及姪等妻其後母世母母嫂唯尊者不得下淫雖嘗而各有地分可汗嘗處於都斤山牙帳東開蓋敬日之所出也每歲率諸貴人祭其先密以五月中旬集他人水拜祭天神於都斤西五百里有高山廻出上無草木謂爲勃外凝黎夏言地神也其書字類胡而不知年曆唯以草青爲記其主初立近侍重臣等與之以氈隨日轉九廻每一廻臣下皆拜訖乃扶令乘馬以帛絞其頸使纒不至絕然後釋而急問之曰你能作幾年可汗其主旣神情瞽亂不能詳定多少臣下等隨其所言以驗短修之數一說男女好樗蒲女子蹴鞠飲馬酪取醉歌呼相對敬鬼神信巫覡重兵死而耻病終大抵與匈奴同俗

西突厥居無嘗處多在烏孫故地其俗每五月八月相聚祭神歲遣重臣向其先世所居之窟致祭焉襲胡一日步落襲蓋匈奴之別種其俗土赤知種田



地少桑蠶多衣麻布其丈夫衣服及葬殯與中夏畧同婦人則多貫蜃貝以爲耳頸飾又與華民錯居其渠帥頗識文字然語類夷狄因譯乃通蹲踞無禮貪而忍害俗好淫穢處女尤甚將嫁之夕方與淫者叙離夫民間之以多爲貴旣嫁之後頗有防閑有犯奸者隨事懲罰又兄弟死者納其妻雖分統部郡縣列於編戶然輕其徭賦有異齊民山谷阻深者又未盡役屬而凶悍恃險數爲寇亂

駃馬國其地在突厥之北漸近北海土地嚴寒至冬積雪樹木不沒者一二尺比暖雪消以馬犁種取魚鹿獺貂灰鼠等肉充食以其皮爲衣少鐵器用陶瓦土及樺木根爲盤盃隨水草而居累木似井闌樺皮蓋以爲屋土牀草蓐而寢處之草盡則移居無定所馬色並駃故以爲名一說舉國悉留騶駃馬不乘但取其湮酪充食而已因山而居與結骨不敦相侵伐貌類結骨而言語不相通其俗隨逐水草無王立小君長以聽焉

結骨部在駃馬國南其人並依水而居身悉長大赤髮綠睛有黑髮者以爲不祥人皆勁勇鄰國憚之其俗大率與突厥同而婚姻無財聘性多淫洩與外人



通者不忌其瘠死葬喪刀劈其面火葬收其骨踰年而爲墳墓有哭泣之禮冬以木爲室覆以木皮土宜粟麥稌豆之屬無果菜有馬出貂天每雨鐵收而用之以爲刀劍甚銛別其國獵鬼皆乘木馬升降山險追赴若飛

鹽漠念咄六闕俟斤部落及史檐部落並在駁馬東其兩部土多松華每年稅貂獺青白三鼠皮以爲貢賦

流鬼國邊於北海多沮澤有魚鹽之利地氣沍寒早霜雪每堅冰之後以木廣六尺長七尺施系其上以踐層冰逐其走獸俗多狗以其皮毛爲裘褐

拔野古在僕骨東其地豐草人皆殷富土多霜雪東北一千里曰康千河有松木一二年乃化爲石其色青有國人皆居住其人謂之康千石爲石以後仍松文人皆著木脚冰上逐鹿以耕種射獵爲業國多好馬又出鐵風俗與鐵勒同而言語稍別焉

鞠國在拔野古東北有樹無草但有地苔無羊馬家畜有鹿如中國牛馬使鹿牽車可勝三四人衣鹿皮食地苔其人取木枝爲屋尊卑共居其中

俞折國在鞠國東土地廣大百姓衆多風俗與拔野



古同少牛馬地多貂鼠

大漢國在鞠國北地饒羊馬其人極長大長者至一丈三四尺

芮國亦名芮芮國無城郭隨水草畜牧以穹廬為居  
辮髮衣錦小袖袍小口袴深雍鞞其地苦寒七月流  
澌亘河國人能以術祭天而致風雪前對皎日後則  
泥濘橫流故其戰敗莫能追及或於中夏為之則曠  
而不雨問其故蓋以儒云

鐵勒匈奴之苗裔無君長分屬東西兩突厥居無嘗  
所隨水草移人性凶忍善於騎射貪婪尤甚以寇抄  
為生近西邊者頗為藝植多牛羊而少馬其俗大抵  
與突厥同唯丈夫婚畢便就妻家待產乳男女然後  
歸舍死者埋殮之此其異也

奚本名庫莫俗甚為不潔而善射獵好為寇鈔每與  
契丹相攻擊虜獲財畜因而得賞死者以葦薄裹尸  
懸之樹上風俗同於突厥每隨逐水草以畜牧為業  
遷徙無嘗居有氈帳兼用車為營牙中嘗五百人持  
兵自衛此外部落皆散居山谷無賦稅

契丹之先與庫莫奚異種而同類居黃龍之北數百  
里其俗與靺鞨同好為寇盜父母死而悲哭者以為



不壯但其屍置於山樹之上經三年之後乃收其骨而焚之因斟而祝曰冬月特向陽食若我射獵時時使我多得諸鹿其無禮頑嚚於諸夷最甚

南室韋契丹別部也在契丹北三千里土地卑溼至夏則移向西北貸勃欠對二山多草木饒禽獸又多蚊蚋人皆巢居以避其患俗丈夫皆被髮婦女盤髮衣服與契丹同乘牛車遽條爲屋如突厥氈車之狀渡水則束薪爲筏或有以皮爲舟者馬則織草爲韉結繩爲轡寢則屈木爲屋以遽條覆上移則載行以猪皮爲席婦人抱膝而坐氣候多寒田收甚薄無羊少馬多猪牛造酒食噉與靺鞨同俗婚嫁之法二家相許輒輒盜婦將去然後送牛馬爲聘更將婦家待有娠乃相隨還舍婦人不再嫁以爲死人之妻難以共居部落共爲大棚人死則置屍其上居喪三年唯四哭其國無鐵取給於高麗多貂兵器有弓楛矢尤善射時聚弋獵事畢而散其人士著無賦歛或爲小室以皮覆上相聚而居至數十百家剡木爲梨不加金刃人牽以種不解用牛夏多霧雨冬多霜霰畜宜犬豕養豢而噉之其皮用以爲韋男子女人通以爲服被髮左衽其家富者項著五色雜珠婚嫁之法男



先就女舍三年役力因得親迎其婦役日既滿女家分其財物夫婦同車而載鼓舞共歸

北室韋亦契丹別部也氣候最寒雪深沒馬冬則入山君土穴中牛畜多凍死饒麀鹿射獵爲務食肉衣皮鑿冰沒水中而網射魚鼈地多積雪懼陷坑奔騎木而行俗皆捕貂爲業冠以狐貉衣以魚皮

霄匈奴之別種亦鮮卑故地也人多善射獵好以赤皮爲衣綠婦人貴銅釧衣襟上下懸小銅鈴風俗畧與契丹同

沙陁突厥在甘州習俗左老右壯溷雜男女畧與吐藩同其悍捷便弓馬勝之

昆彌國土地宜稻其俗辮髮左衽被服與突厥畧同相傳云匈奴本兄弟之國也隨逐水草夏居山冬入深谷俗尚戰惡

疾終都播者鐵勒之別種也其俗結草爲廬無牛羊不知稼穡土多百合草取其根以爲糧

骨利幹居廻紇瀚海之北草多百合地出名馬其馬頭類橐駝筋骨龐壯好者只行四百里其國北又距大海晝長而夕短日沒後天色正曛煖一羊脾纒熟而東方曙蓋近日出入之處也掃刺部落本在琵琶



冊府元龜 土風三

川幽州東北數百里出古北口是焉地宜羊馬羊則  
純黑馬趨前蹄堅善走以狩獵為務逐獸高山自上  
而下弓弧縱商其勢若飛鮮有覆壓  
鬼田國在駁馬國西夜遊晝隱以鹿皮為衣服鼻耳  
與中國人同口在頂上土無米粟噉鹿及蛇

冊府元龜

冊府元龜

巡按福建監察御史臣李嗣京

訂正

分守建南道左布政使臣胡維霖

參閱

知建陽縣事 臣黃國琦較釋

外臣部 七

官號

才智

賢行

官號

夫明王慎德四夷咸賓乃有款塞稱藩厥角諸吏奉  
琛修貢解辯嚮化繇是典客之職通譯其言執簡之  
史詳記其俗故其妃匹之號官稱之品負秩之命數



典司之位局或咸得書於載籍而藏之祕閣焉觀夫疆域殊峙風軌異化種族之制匪一等威之辨不同仲尼所謂夷狄之有君蓋與夫雲官鳥紀之說戾矣東夷扶餘國以六畜名官有馬加牛加狗加其邑落皆主屬諸加高句驪國後漢時其國置官有相加對盧沛者古鄒大加古鄒大加高驪掌賓客之官如大鴻臚也主簿優台使者帛衣先人一說大官有大對盧次有太火兄大兄小兄意俟奢烏拙太大使者小使者襍奢翳屬仙人并襍薩凡十三等復有內評外評分掌內外事焉其大對盧則以強弱相凌奪而自為之不繇王之署置也

百濟國其王妻號於陸夏言地也官有十六品長曰左平

五人一品次大率三十人二品一作達率次恩率三品次

德率四品次杆率五品次奈率六品以上次將德士

品服紫帶次施德八品皂帶次固德九品赤帶次季

德十品青帶次對德十一品文督十二品皆黃帶次

武督十三品次佐軍十四品次振武十五品次克虞

十六品一作喪虞皆白帶其冠制並同准奈率已上飾以

銀花自恩率以下官無嘗負各有部刀部功德部藥

部本部法部後宮部外有司軍部司徒部司空部外

舍綱部日官部長吏三年一交代畿內有五部部有



五巷人居焉部統兵五百人五方各有領一人以達率為之方佐二之方有十郡有將三人以德率為之統兵一千二百人以下七百人以上又內官曰內臣佐平掌宣納事內頭佐平掌庫藏事內法佐平掌禮儀事衛士佐平掌宿衛兵事朝廷佐平掌刑獄事兵官佐平掌在外兵馬事

新羅國其官有十七等其一曰伊罰干貴如相國次伊尺干次破彌干次大阿尺干次阿干次阿尺干次乙吉干次沙咄于次及伏干次大奈摩干次大舍次小舍次吉士次大烏次小烏次造位外有郡縣後唐同光

初其王金朴英遣倉部侍郎金樂錄事參軍金幼卿來朝二年又遣朝散大夫倉部侍郎金岳來朝天成二年遣吏中散大夫兵部侍郎張芬副使兵部郎中朴術法刑官倉部員外郎李忠武來朝長興三年遣使執事侍郎金咄副使司賓大卿李儒來朝

日本國其大臣朝臣真人者猶中國戶部尚書

倭國其王妻號雞彌没名太子為利歌彌多佛利內官十有二等一曰大德次小德次大仁次小仁次大義次小義次大禮次小禮次大智次小智次大信次小信負無定數有軍尼一百二十人猶中國牧宰八千戶置一伊尼翼如今里長也十伊尼翼屬一軍尼夫羊同國有四大臣分掌國事



南蠻林邑國尊官有二其一曰西那婆帝其二曰薩婆地歌其為官三其一曰倫多性次歌倫帝次乙他伽蘭外官分為二百餘部其長官曰弗羅次曰可輪如牧宰之差也

赤土國其官有薩陁迦邏一人陁迦邏一人陁拏達又二人迦利蜜迦三人共掌政事俱羅未帝一人掌刑法每城置那耶迦一人鉢帝十人

真獵國其國有五大臣一曰孤落支二曰高相憑三曰婆何多陵四曰舍摩陵五曰髯羅婁及諸小臣朝於王者輒以階下三稽首王喚上階則跪以兩手抱

膊遶王環坐議政事訖跪伏而去

婆利國官曰獨訶耶拏次日獨訶氏拏

琉球國有四五帥統諸洞洞有小王往往有村村有

鳥了帥并以善戰者為之自相對立理一村之事

南詔蠻謂王為詔謂相為清平宮凡置六人其酋望

有大將軍之號後唐天成元年嵩州山後兩林百蠻

都鬼主李卑晚羗大鬼主傳能阿花等來朝二年有

轉牒稱督爽大長和國宰相布變等

西域音而姑遮切羗國漢時其王號去胡來王言去離胡戎來附漢

鄯善國有輔國侯俗胡侯俗音立鄯善都尉擊車師畧切



都尉左右且渠擊車師君各一人譯長二人

臣欽若等按漢

書西域傳凡國五十自譯長君監吏大祿百長

干都尉且渠賞戶將相至侯王皆佩漢印綬

且末國 且音字 有輔國侯左右將譯長各一人

小宛國有輔國侯左右都尉各一人

精絕國有精絕都尉左右將譯長各一人

戎盧國有輔國侯左右將左右都尉左右騎君各一

人驛長二人

于闐國有輔侯左右將左右騎君東西城長譯長各

一人

晉天福三年九月其王李聖文遣殿頭宣旨通使馬繼榮副使黃門將軍張再適人吳順規朝

貢事舍

皮山國有左右將左右都尉騎君譯長各一人

蒲黎國漢時有侯都尉各一人

大月氏有五翎侯

翎卽翕字

一曰休蜜翕侯二曰雙摩翕

侯三曰貴霜翕侯四曰盼頓翕侯五曰高附翕侯皆

屬大月氏

莎車國有輔國侯左右騎君備西夜君各一人都尉

二人鐸長四人

疏勒國有疏勒侯擊胡輔國侯都尉左右將左右騎

君左右譯長各一人

尉頭國有左右都尉左右騎君各一人



烏孫國王號大昆彌有相大祿大將二人侯三人大夫將都尉各一人大監二人大吏一人舍中大吏二人騎君一人

姑墨國有姑墨侯輔國侯都尉左右將左右騎君各一人譯長二人

溫宿國有輔國侯左右將左右都尉左右騎君譯長各一人

龜茲國有大都尉丞輔國侯安國侯擊胡侯卻胡都尉擊車師都尉左右將左右都尉左右騎君左右力輔君各一人東西南北部千長各二人卻胡君三人

譯長四人

烏壘國有城都尉譯長各一人

尉犁國有尉犁侯安世侯左右將左右都尉擊胡君各一人譯長二人

危須國有擊胡侯擊胡都尉左右將左右都尉左右騎君擊胡君譯長各一人

焉耆國有擊胡侯卻胡侯輔國侯左右將左右都尉擊胡左右君擊車師君歸義車師君各一人擊胡都尉擊胡君各二人譯長三人

烏貪訾離國有輔國保左右都尉各一人



卑陸國有輔侯左右將左右都尉左右譯長各一人

卑陸後王國有輔國侯都尉譯長各一人

都立師國有輔國侯左右都尉譯長各一人

單桓國有輔國侯將左右都尉譯長各一人

蒲類國有輔國侯左右將左右都尉各一人

蒲類後國有輔國侯將左右都尉譯長各一人

且音子余切下同

西且彌國有西且彌侯左右將左右騎君

各一人

東且彌國有東且彌侯左右都尉各一人

却國有輔國侯都尉譯長各一人

狐胡國有輔國侯左右都尉各一人

山國有輔國侯左右將左右都尉譯長各一人

車師前王國有輔國侯安國侯左右將都尉歸漢都

尉車師君通善君鄉善君各一人

鄉讀曰嚮譯長一人

波斯國其王曰鑿噴妃曰防步率王之諸子曰殺野

大官有模胡檀掌國內獄訟泥忽汗掌庫藏開禁地

卑掌文書及衆務次有過羅訶地掌王之內事薛波

勃掌四方兵馬其下皆有屬官分統其事

大秦國其王都城分爲五城各方五里王居中城城

置八臣次主四方而王城亦置八臣分主四城若謀



國事及四方有不決者則四城之臣集議王所王自聽之然後施行

女國以女爲王有小女王共知國政女王之夫號曰金聚不知政事

東女國女王號爲賓就有女官曰高霸平議國事在外官遼並男夫爲之

高昌國官有令尹一人比中夏相國次有公三人皆其王子也一爲交河公二爲田地公次有左右衛次有八長史曰吏部祠部庫倉部主客禮部民部兵部等長史也次有達陵江殿中伏波等將軍次有八司

馬長史之副也次有侍郎較郎主簿從事階位相次分掌諸事次有省事掌導引其大事決之於王小事則世子及三公隨狀斷決評章錄記事訖卽除籍書之外無事从掌文案官人雖有列位並無曹府唯每旦集於牙門評議衆事諸城各有戶曹每城遣司馬侍郎監簡較名爲城令

廻紇隨時稱特勒唐貞觀末自號可汗署官號皆如突厥故事開元中有九部落置都督十一人代宗時遣使册命可汗及其妻可敦并封左右殺胡祿都督拔覽將軍内外宰相已下



自狗羗有品籠官五品籠官

吐蕃號其王為贊普置大論小論以統理國事雖有  
官不嘗厥職臨時統領

北狄匈奴單于者廣大之貌也言其象天單于然也

漢時其國置左右賢王左右谷蠡 谷音鹿蠡 音盧奚切 左右大

將左右大都尉左右大當戶左右骨都侯匈奴謂賢

曰屠耆故嘗以太子為左屠耆王自左右賢王以下

至當戶大者萬餘騎小者數千凡二十四長立號曰

萬騎其大臣皆世官呼衍氏蘭氏 呼衍即令鮮卑姓 呼延者是也蘭姓

今亦 其後須卜氏此三姓其貴種也而左右賢王左

右谷蠡取大國左右骨都侯輔政諸二十四長亦各

自置千長百長行長什裨小王 裨音頻 稜切 相都尉當戶

且渠之屬 且音子余切相之阻 渠姓蓋本因此官 後漢時其大臣貴者

左賢王次左谷蠡王次右賢王次右谷蠡王謂之四

角次左右日逐王次左右溫禺鞮王次左右漸將王

是謂六角皆單于子弟次第當單于者也異姓大臣

左右骨都侯次左右尸逐骨都侯其餘日逐且渠當

戶諸官號各以權力優劣部眾多少為高下次第焉

至晉時其官號有左賢王右賢王左奕蠡王右奕蠡

王左於陸王右於陸王左漸尚王右漸尚王左朔方



王右朔方王左獨鹿王右獨鹿王左顯祿王右顯祿  
 王左安樂王右安樂王凡十六等皆用單于親子弟  
 也其左賢王最貴唯太子得君之其四姓有呼延氏  
 卜氏蘭氏喬氏而呼延氏最貴則有左日逐右日逐  
 世為輔相卜氏則有左沮渠右沮渠蘭氏則有左當  
 戶右當戶喬氏則有左都候右都候又有車陽沮渠  
 餘地諸雜號猶中國百官也

吐谷渾晉末自稱汝州刺史其官置長史司馬將軍  
 魏周之際始稱可汗官有王公僕射尚書及郎中將  
 軍之號

鳥桓

亦作九

國有勇健能理決鬪訟者推為大人無世  
 業相繼邑落各有小帥數百千落自為一部大人  
 蠕蠕國千人為軍軍置將一人百人為幢幢置帥一  
 自稱為可汗其俗君及大臣因其行能即為稱號若  
 中國立謚既死之後不復追稱

突厥後魏時自稱可汗號其妻為賀可敦其子弟謂  
 之特勒別部領兵者謂之設其大官屈律啜次阿波  
 次頡利發次吐屯次俟斤其初國貴賤官號凡有十  
 等或以形體或以老小或以顏色鬢髮或以酒肉或  
 以獸名其勇健者謂之始波羅亦呼為莫賀弗肥鹿



者謂三大羅大羅便酒器也似角而鹿短體况似之故以爲號此官特貴唯其子弟爲之謂老爲哥利故有達官謂馬爲賀蘭故賀蘭蘇尼闕蘇尼掌兵之官也謂黑色者爲珂羅復故有珂羅啜官甚高者年者爲之謂髮爲索葛故有索葛吐此如州縣官也謂酒爲匄你熱汗故有熱汗賞監察非違釐整班次謂肉爲安禪故有安禪具泥掌家事如國官也有時置附隣可汗隣狼名也取其貪殺爲稱亦有可汗位在葉護下者或有居家大姓相呼爲遺可汗者突厥呼屋爲遺言屋可汗也其後大官有葉護次設特勒次俟利發次吐屯發餘小官凡二十八等皆世襲焉西突厥本與北突厥同祖其官有葉護有設特勒嘗以可汗子弟及宗族爲之又有乙斤屈利啜闔漢達頡利發吐屯候斤等官世襲其位

奚有五部每部置候斤一人爲其帥其後部有刺史縣有令長其大首領號奚王唐置餘樂府以其王爲都督

南室韋有二十五部有餘莫弗瞞咄猶酋長也

北室韋有九部其渠帥號乞引莫賀咄每部有莫何弗三人以貳之



契丹有八部每部皆號大人內推一人為王

唐末耶律阿保機自稱國王其後乃稱皇帝署中國

官號國人號機機為天皇王有子三人長人皇王次

元帥太子幼安端少君渤海國唐中宗時封大祚榮

為渤海郡王其俗呼其王為可毒大對面為聖王戕

表呼基下父母老王母曰太妃妻曰貴妃長子曰副

王諸子曰王子世以大氏為會長

才智

要荒之服蠻夷是若北方之疆世習其俗丹穴之智

時有其人豈地氣之使然抑天性之斯異或計慮之

惟允或辭辯之可觀懷英果之才申嚴于族類慕華

夏之德竊覽于典章若能堅柔服之心革忿驚之性

奉順王命自異匪人雖欲謂之豺狼其可得乎苟或

不思革面靡識懷音猶夏之姦雖云暫肆喪元之戮

必將遘及者矣

戎子駒支

駒支戎子各

魯襄公十四年晉士句

范宣子也

會諸

侯之大夫會于向將執駒支范宣子親數諸朝

行之所在

亦設朝位

曰來姜戎氏昔秦人追逐乃祖吾離于瓜州

四嶽

之後皆姜姓又別為凡姓瓜州地在今燉煌

乃祖吾離被不蓋

蓋苦之別名

蒙

荆棘以來歸我先君

蒙見也

我先君惠公有不腆之田



也 腆厚 與女剖分而食之 中分今諸侯之事我寡君不為部

如昔者蓋言語漏洩則職女之繇 職主也 詰朝之事爾

無與焉 詰朝明旦才使復得與會事 與將執女對曰昔秦人負恃

其衆貪于土地逐我諸戎惠公蠲其大德 蠲明也 謂我

諸戎是四嶽之裔曹也 四嶽堯時方伯姜姓也裔系也曹後也 毋是翦

奔 翦削也 賜我南鄙之田狐狸所居豺狼所嗥我諸戎

除剪其荆棘驅其狐狸豺狼以為先君不侵不叛之

臣至于令不貳 不外叛亦 昔文公與秦伐鄭秦人躬

與鄭盟而舍戍焉 事在魯禧公三十年 於是平有殺之師 魯僖

公三十 晉禦其上戎亢其下 秦師不復我諸戎

實然譬如捕鹿晉人角之諸戎倚之 倚其足也 與晉陪之

也 陪僵 我何以不免自是以來晉之百役與我諸戎相

繼于時 言給晉于不曠時 以從執政猶殺志也 意嘗必殺無中二也 豈

敢離邊今官之師旅無乃寔有所闕以攜諸侯而罪

我諸戎我諸戎飲食衣服不與華同贄幣不通言語

不達何惡之能為不與於會亦無膏 膏閔也 賦青蠅而

退 青蠅詩小雅取其愷 宣子辭焉使即事於會成愷

悌也 成愷悌不信讒也不書者戎為晉屬不得時達

漢匈奴單于冒頓既立時東胡強迺使使謂冒頓曰

欲得頭曼時號千里馬 頭曼即冒頓父也曼音莫安切 冒頓問群臣

冊府元龜 外臣部 卷之九百二十二 十三



皆曰此匈奴寶馬也勿子讀曰冒頓曰奈何與人鄰

國愛一馬乎遂與之頃之東胡以為冒頓畏之使謂

冒頓曰欲得單于一闕氏闕氏匈奴皇后號也闕音於連功民音支冒頓

復問左右左右皆曰東胡無道迺求闕氏請擊之冒

頓曰奈何與人鄰國愛一女子乎遂取所愛闕氏子

東胡東胡王愈驕西侵與匈奴中間棄地莫居千餘

里各居其邊為甌脫甌音一侯切脫音土活切境上侯望之處若今之伏宿舍也

東胡使使謂冒頓曰匈奴與我界甌脫外棄地匈奴

不能至也吾欲有之冒頓問群臣或曰此棄地與之

於是冒頓斬之冒頓上馬令國中有後者斬遂東襲

擊東胡東胡初輕冒頓不為備及冒頓以兵至大破

滅東胡王虜其民衆畜產而歸

後漢烏丸大人蹋頓多畫計策

鮮卑軻比能本小種鮮卑以勇健斷法平端不貪財

物衆推以為大人部落近塞自袁紹據河北中國人

多亡叛歸之教作兵器鎧楯頗學文字故其勒御部

衆擬則中國出入弋獵建立旌麾以鼓節為進退

晉吐谷渾視罷性英果有雄畧嘗從容謂博士金城

騫苞曰易云動靜有嘗剛柔斷矣先王以仁宰世不

任威刑所以剛柔摩斷取輕鄰敵當仁不讓豈宜拱



默者乎今將秣馬厲兵爭衡中國先生以爲何如苞  
曰大王之言高世之畧秦隴英豪所願聞也於是虛  
襟撫納衆赴如歸

吐谷渾葉延長而沉毅好問天地造化帝皇年曆司  
馬薄落鄰曰臣等不學實未審三皇何父之子五帝  
誰母所生延曰自羲皇以來符命玄象昭言著見卿  
等面牆何其鄙哉語曰夏蟲不知冬水良不虛今又  
曰禮云公孫之子得以王父字爲氏吾祖始自昌黍  
光宅於此今以吐谷渾爲氏尊祖之義也

後魏迴紇菩薩善籌策以少制衆嘗以戰陣射獵爲  
務其母烏羅渾王知諍訟之事平決嚴明部內齊肅  
唐馮盎高州良德人代爲本郡大首領隋開皇中潮  
成五州獠叛盎馳至京請討之文帝勅左僕射楊素  
與盎論賊形勢素驚曰不意蠻夷中有此人大奇武  
德中授高州總管累封國公盎勤於簿領詰摘姦伏  
甚得人情

新羅王眞德以高宗永徽元年織錦作五言太平頌  
以獻之其詞曰大唐開洪業巍巍皇猷昌止戈戎衣  
定修文繼百王統天崇兩施理物體含章深仁諧日  
月撫運邁時康幡旗何赫赫鉦鼓何鏗鏗外夷違命



者剪覆被天殃淳風凝幽顯遐邇競呈祥四時和玉  
燭七曜巡萬方維嶽降宰輔維帝任忠良五三成一  
德昭我唐家唐帝嘉焉

仲琮爲吐蕃大臣咸亨三年吐蕃遣仲琮來朝先是  
仲琮年少時嘗充質入朝詣太學生例讀書頗曉文  
字至是帝召入賜宴甚優禮之問曰汝國贊府孰與  
其祖爲賢對曰雄勇果斷不及其祖然勤於聽理下  
不敢欺亦令主也但吐蕃土風寒苦物產貧薄所部  
邏娑川唯有楊柳人以爲資更無草木烏海之南盛  
夏積雪冬則羊裘數重暑月猶衣裘褐贊府春夏每

隨水草秋冬始入城隍但施廬帳又無屋宇文物器  
用豈當中夏萬分之一但其國法嚴整上下齊力議  
事則自下而起因人所利而行之斯所以能持久也  
帝曰吐蕃與吐渾本是甥舅之國素和貴叛主奔走  
吐蕃納之信其間隔侵逼渾國招其叛士奪其土地  
我遣薛仁貴等安輯慕容之衆吐蕃掩其不備伏甲  
擊破之旣又寇逼涼州欲陷城堡其故何也對曰臣  
受命貢獻而已攻戰之事非臣所得預聞也帝厚賜  
而遣之

薛贊婆爲吐蕃首領其父祿東贊領解兵術吐蕃贊



府以國事委之講兵訓師雅有節制吐蕃之并兼諸  
羗雄霸本土東贊有力焉東贊有子五人長曰贊悉  
若次欽陸次贊婆次每多千次敷論東贊死欽陵兄  
弟後專其國欽陵每多居中諸弟分提方面贊婆則  
專在東境與中國爲鄰三十餘年嘗爲邊患其兄弟  
皆有才畧諸蕃憚之

突厥毗伽可汗小殺開元中謀欲南入爲寇其謀主  
燉欲谷曰唐主英武人和年豐未有間隙不可動也  
且休息我衆觀變而舉小殺又欲修築城壁造立寺  
觀燉欲谷曰不可突厥人戶寡少不敵唐家百分之

一分所以嘗能抗拒者正以隨逐水草居處無嘗射  
獵爲業人皆習武強則進兵抄掠退則竄伏山林唐  
兵雖多無所施用若築城而居改變舊俗一朝失利  
必將爲唐所併且寺觀之法教人以弱本非用武爭  
強之道不可置也小殺等浮然其計八年冬御史大  
夫王峻爲朔方大總管奏請西徵拔悉密東發奚契  
丹兩蕃剋期掩突厥衙帳於稽落河上小殺聞之大  
恐燉欲谷曰拔悉密今在北庭與兩蕃東西相去極  
遠勢必不合王峻兵馬計亦無能至此必若能來候  
其臨到卽移衙帳向北三日唐兵糧盡自然去矣且



拔悉密輕而好利聞命必是先來王駿與張嘉貞不  
叶奏請有司不愜必不敢動若駿兵馬不來拔悉密  
獨至突厥欲擊之曠欲谷曰此衆去國千里必將死  
戰未可也不如以兵躡之去北庭二百里曠欲谷分  
兵間道先掩北庭因縱兵擊拔悉密之還衆遂散走  
投北庭而城陷不得入盡爲突厥所擒并虜其男女  
而還曠欲谷廻兵因出赤亭以掠涼州牛馬涼州都  
督楊敬述爲曠欲谷所敗小殺繇是大振盡有黠噶  
之衆

南詔異牟尋頗知書有才智善撫其衆

### 賢行

夫天生蒸民夷夏雖異而所稟之性或善或惡復何  
殊哉故仲尼稱有教無類蓋謂是矣若乃篤仁孝之  
道敦愛敬之風感緊以報仇讓退而行讓或崇其信  
誓或守之端慤或殉葬以見志或憂國以殞命或俯  
從忠讜之諫或力行博施之義自餘從容知禮寬厚  
得衆者抑又其次焉咸著之篇以示於後  
西羌東吾湏吾子也湏吾後漢明帝永平中降漢東  
吾立以父降漢乃入居塞內謹愿自守百濟其先夫  
餘王東明之後有仇台篤於仁信始立國於帶方



高驪王各官將叛於魏其臣句驪沛者各得來數諫  
言官不從其言得來歎曰立見此地將生蓬蒿遂不  
食而死舉國賢之

吐谷渾辟奚性仁厚慈惠三弟皆專恣長史鍾惡地  
恐爲國害謂司馬乞宿雲曰昔鄭莊公秦昭王以一  
弟之寵宗祀幾傾况今三孽並驕必爲社稷之患吾  
與公忝當元輔若獲保首領以没于地先君有問其  
將何辭吾今誅之矣宿雲請白辟奚惡地曰吾王無  
斷不可以告於是因群下入覲遂執三弟而誅之辟  
奚自投於牀惡地等奔而扶之曰臣昨夢先王告臣

云三弟將爲逆亂汝速除之臣謹奉先王之命矣辟  
奚素友愛因恍惚成疾謂世子視連曰吾禍賊罔生  
何以見之於地下國事大小汝宜攝之吾餘年殘命  
寄食而已遂以憂卒視連幼廉慎有志性視連旣立  
以父憂卒不知政事不飲酒遊畋七年矣鍾惡地進  
曰夫人君者以德御世以威齊衆養以五味娛以聲  
色此四者聖帝明王之所先而公皆畧之昔昭公儉  
嗇而喪偃王仁義而亡然則仁義所以存身亦所以  
亡已經國者德禮也流也者刑法也二者或差則綱  
維失緒明公奕葉重光恩結西夏雖仁孝發於天然



猶宜憲章周孔不可獨追徐偃之仁德委而不逮視  
連泣曰先王追友于之痛悲憤升遐孤雖纂荼尸存  
而已聲靈豈遂歟豈所安也綱維刑禮付之將來臨終  
謂其子視罍曰我高祖吐谷渾公嘗言子孫必有興  
者永爲中國之西藩慶流百世吾已不及汝亦不見  
當在汝之子孫輩爾

葉延年十歲其父吐延爲羌酋姜聰所害每旦縛草  
爲姜聰之象哭而射之中之則號泣不中則瞑目大  
呼其母謂曰姜聰諸將已屠膾之矣汝何爲如此葉  
延泣曰誠知射草人不益於先讐以申罔極之志耳  
性至孝母病五日不食葉延亦不食

焉耆國王龍安夫人繪胡之女姬身十二月剖脅生  
子曰會立之爲世子會少而勇傑安病篤謂會曰我  
嘗爲龜茲王白山所辱不忘於心汝能雪之乃吾子  
也及會立襲滅白山遂據其國

叱干阿利叱干部他斗伏兄子也赫連勃勃父衛辰  
爲後魏殺之勃勃奔于叱干部叱干他斗伏送勃勃  
於魏阿利先成大落川聞將送勃勃馳諫曰烏雀投  
人尚宜濬免况勃勃國破家亡歸命於我縱不能容  
猶宜任其所奔今執而送之浮非仁者之舉他斗伏



懼爲魏所責弗從阿利潛遣勁勇篡勃勃於路送於姚與高平公沒奕于以女妻之

馬邑族奴真後魏初領部來附奴真兄犍先居賀蘭部至是奴真請召犍而讓部焉道武義而許之

焮拔寅勅韋部人也焮拔寅兄地千坐盜食官馬依制命死拔寅自誣已殺實非弟殺兄弟爭死辭不能定唐高祖詔原之

唐國王字代失畢爲人寬厚甚得衆心

胡祿達官吐渾邪頡利臣也頡利率渾邪等自刎以殉渾邪者頡利之母婆施氏之媵臣也頡利初誕以

付渾邪至是哀慟而死唐太宗聞而異之贈中郎將仍葬於頡利墳側詔中書侍郎岑文本製頡利及渾邪之事以紀之

吐蕃相祿東贊貞觀十五年來朝先是許以文成公主出降贊普遣祿東贊來迓召見顧問進對合旨詔以瑯邪公主外孫女妻之祿東贊辭曰臣本國有婦少小夫婦雖復至尊殊恩奴身不願違棄舊婦且贊府未謁公主陪臣安取輒娶太宗嘉之欲撫以厚恩雖奇其答而不遂其請乃以爲右衛大將軍

阿史那社爾突厥處羅可汗第二子也初在本藩號



爲柘設分部落以統之及處羅卒毀瘠三載在位十年無所課歛或鄙其所爲不能富貴社爾曰部落旣豐於我便足有識者稱之叔父頡利黠於用武社爾屢諫不從乃辭頡利歸於所部

百濟王義慈事親以行聞友于兄弟時人號爲海東魯閔

突厥苾伽可汗開元二十一年遣其大臣葛阿默察之來朝獻馬五十匹謝恩也初苾伽之弟闕特勒死苾伽表請巧匠寫其真詔遣畫工六人往焉旣畫工妙絕倫突厥國內未之見者苾伽每觀畫處歔歔如

弟每生悲涕不自勝故遣察之謝恩且送畫人也

尉遲勝于闐質子也廣德中以勝爲毗沙府都督于闐王令還國勝固請留宿衛加開府儀同三司封武都王實封百戶勝請以本國王弟曜詔從之勝乃於京師修行里盛飾林亭以待賓客好事者多訪之建中末從幸奉天爲兼御史中丞帝在興元勝爲右領軍將軍俄遷右威衛大將軍歷睦王傳貞元初曜遣使上疏稱有國已來代嫡承嗣兄勝旣讓國請立勝子銳帝乃以銳爲簡較光祿卿兼毗沙府長史還國勝固辭且言曰曜久行國事人皆悅服銳生於京華



不習國俗不可遣往因授韶王諮議兄弟讓國人多稱之

册府元龜

册府元龜

巡按福建監察御史臣李嗣京

訂正

分守建南道左布政使臣胡維霖

參閱

知建陽縣事臣黃國琦較釋

外臣部 八

封册第一

中國之於夷狄羈縻而已若乃殊鄰絕黨之國欽風慕化而至琛賚維旅鞮譯以通解辯而習賓儀保塞而請內屬繇是推懷柔之道開撫納之意優其禮遇厚其賜予以篤其好而厭其心焉漢氏之後乃復加



以侯王之號申之封拜之寵備物典冊以極其名數  
 持節封建以震乎威靈至於告終稱嗣撫封世及必  
 俟文告之命乃定君臣之位自非人君之慎德大邦  
 之敦信皇明遐燭而無間仁風溥暢而胥泊又曷能  
 革彼獷悍被之聲教使其奉王畧而為外臣者哉

漢高祖十一年五月詔曰粵人之俗好相攻擊前時

秦徙中縣之民南方三郡中縣之民中國縣民也秦

林象郡南梁郡故曰三郡使與百粵雜處欲以介其間使會天下

誅秦南海尉它居南方長治之它音徒河切南海尉

為之長帥而甚有文理中縣人以故不耗臧粵人相

攻擊之俗益止俱賴其力今立它為南粵王使陸賈

即授璽綬郎就也就其

武帝元鼎六年平西南夷夜郎侯入朝帝以為夜郎

王

元封二年滇王離西夷滇音舉國降以為益州郡賜

滇王王印復長其民為之西南夷君長以百數獨夜

郎滇王受王印

昭帝始元六年大破益州夷詔曰鈞町侯亡波鈞音

音挺亡與無同西南夷也亡波其名也率其君長人民擊反者斬捕首

虜有功其立亡波為鈞町王



元風四年平樂監傅介子既殺樓蘭王漢乃立樓蘭王先降漢者弟尉屠耆為王更名其國為鄯善為刻

印章餘具外臣儀異門

後漢光武建武五年莎車國王康率傍國拒匈奴擁衛都護檄書河西問中國動靜自陳思慕漢家河西大將軍竇融乃承制立康為漢莎車建功懷德王西城大都尉

八年高句驪侯遣使朝貢先是王莽更名高句驪侯於是貊人寇邊愈甚至遣使朝貢帝復其王號十一年武都氏人背公孫述降漢隴西太守馬援上

復其王侯君長賜以印綬

十二年九真徼外蠻里張游里蠻之別號今呼為俚人率種人慕

化內屬封為歸漢里君

十三年廣漢塞外白馬羗豪樓登等率種人五千餘

戶內屬帝封樓登為歸義君長

十四年印穀王長貴一云任貴遣使上三年計即授越雋

太守印綬初王莽時印人長貴自立為印穀王領越

雋太守又降於公孫述述敗帝封為印穀王

十七年莎車王賢遣使奉獻請都護天子以問大司

空竇融以為賢父子兄弟相約事漢款誠又至臣欽若等



日莎車王延嘗勅諸子當世時漢家不可負也延死子康代立康死弟賢代立故云父子兄弟相約事漢也宜加號位以鎮安之帝乃因其使賜賢西域都護

印綬及車旗黃金錦繡燉煌太守裴遵上言夷狄不可假以大權又令諸國失望

不肯易隨追奪之賢錄是始恨而猶詐稱大都督

二十年東韓國人廉斯人蘇馬謨等詣樂浪貢獻帝

封蘇馬謨為漢廉斯邑君所屬樂浪郡四時朝謂

二十五年遼西烏桓大人郝且等率眾內屬封其渠

帥為侯王君長者八十一人

二十七年哀牢王賢栗等率種人詣越雋太守鄭鴻

降求內屬帝封賢栗等為君長

三十年鮮卑大人於仇賁蒲頭等率種人詣闕朝貢

封於仇賁為王蒲頭為侯

章帝建初二年昆明夷鹵承率種人與諸郡兵擊哀

牢王類牢於博南斬之傳首雒陽封鹵承為破虜傍

邑侯

和帝永元三年大將軍竇憲上書立北匈奴右谷蠡

王於除鞬為單于明年遣耿夔即授璽綬賜玉劔四

具羽蓋一駟使中郎將任尚持節衛護屯伊吾如南

單于故事

六年蜀郡徼外大群夷種羗豪造頭等率種人五十



餘萬口內屬拜造頭為邑君長賜印綬

安帝永初元年鮮卑大人燕荔陽入朝帝賜鮮卑王

印綬赤車參駕令止烏桓較尉所居寧城下

二年青衣道夷邑長令田令姓田各舉土內屬帝增令田

爵號為奉通邑君

元初二年先零羌號多等率眾七千餘人詣漢陽太

守寵參降遣詣闕賜號多侯印綬遣之

三年度遼將軍鄧遵率南匈奴左鹿蠡王湏沈擊湏

王零昌於靈州縣名屬北地郡斬首八百餘級封湏沈為破

虜侯金印紫綬

四年春中郎將任尚遣當闐種羌槐鬼等五人刺殺

叛羌杜季貢封槐鬼為羌侯秋任尚復募效功種號

封刺殺零昌封號封為羌王五年度遼將軍鄧遵募

上郡全無種羌雕何等刺殺叛羌狼莫賜雕何為羌

侯

永寧元年遼鮮卑大人烏倫其至鞬眾詣度遼將軍

鄧遵降奉貢獻詔封烏倫為率眾王其至鞬為率眾

侯是年揮國王揮音檀雍繇調遣使獻樂明年元會安

帝作樂於庭封雍繇調為漢大都尉賜印綬

順帝永建二年烏桓都尉戎朱胤率將王侯咄歸去



延等從烏桓較尉耿曄擊鮮卑有功還皆拜為率眾王

漢安二年立南匈奴守義王兜樓為南單于獻帝建安四年烏丸三王助大將軍袁紹擊破遼東公孫瓚紹遣使即拜為單于皆安居華蓋羽覆黃屋左纛版文曰使持節大將軍督幽青并領冀州牧部卿侯紹承制詔遼東屬國率眾王頒下烏丸遼西率眾王蹋頓右北平率眾王汗廬維乃祖慕義遷善款塞內附北捍獯豸東拒濊貊世守北陲為百姓保鄣雖時侵犯王畧命將徂征厥罪率不旋時悔愆變改方之外

夷最又聰慧者也始有千夫長百夫長以相統領用能慮乃心力克有勲於國家稍受王侯之命自我王室多故公孫瓚作難殘夷厥土之君以侮天慢主是以四海之內並執干戈以衛社稷三王奮氣裔土忿姦憂國控弦與漢兵馬表裏誠甚忠孝朝所嘉焉然而虎兕長蛇相隨塞路王官爵命否而無聞夫有勲不賞俾勤者怠今遣行謂者楊休齋單于璽綬車服以封爾勞其各綏靜部落教以謹慎無使作凶作慝世復爾祀位長為百蠻長厥有咎有不臧者泯於爾祿而喪於乃庸可不勉乎烏丸單于都護部眾左右



單于受其節度他如故事

魏文帝漢延康元年鮮卑素利彌加遣使獻馬封加

為歸義王

先是漢獻帝建安中鮮卑素利彌加厥機因較尉同柔上貢獻通市太祖皆表寵以

為王厥機死又亡其子沙末汗為親漢王至是表利彌加各遣使獻馬故有是命

黃初元年更授匈奴南單于呼厨泉魏璽綬賜青蓋

乘輿寶劍玉珎是年鮮卑步度根遣使獻馬帝拜為

王

明帝太和三年大月氏王波調遣使奉獻以調為親

魏大月氏

景初元年幽州刺史母丘儉討遼東是時左北平烏

丸單于寇婁敦遼西烏丸都督率眾王護留栗聞儉

軍至率眾五千餘人降寇婁敦遣弟阿羅獎等詣闕

朝貢封其渠帥三十餘人為王

二年六月倭王遣大夫難升米等詣帶方郡求詣天

子朝獻時太守劉夏遣吏將送詣京都其年十二月

詔書報倭女王曰制詔親魏倭王卑彌呼帶方太守

劉夏遣使送汝大夫難升米次使都示牛利奉汝所

獻男生口四人女生口六人班布二疋二丈以到汝

所在踰遠乃遣使貢獻是汝之忠孝我甚哀汝今以

汝為親魏倭王假金印紫綬裝封付帶方太守假授



汝其緩撫種人勉爲孝順汝來使難升米牛利涉遠  
道路勤勞今以難升米爲率善中郎將牛利爲率善  
較尉假銀印青綬引見勞賜進還今以絳地交龍錦  
五疋絳地縐栗罽十張菑絳五十疋緝青五十疋答  
汝所獻貢直又特賜汝緝地句文錦三疋細斑華罽  
五張白絹五十疋金八兩五尺刀二口銅鏡百枚眞  
珠鉛丹各五十斤皆裝封付難升米牛利還到錄受  
悉可示汝國中人使知國家哀汝故鄭重賜汝好物  
也

是年遣帶方太守劉昕樂浪太守鮮于嗣越海定二  
郡諸韓國臣智加賜邑君印綬其次與邑長

齊王正始元年帶方太守弓遵遣建中較尉梯儁等  
奉詔書印綬詣倭國拜假倭王並齎詔賜金帛錦罽  
刀鏡綵物倭王因使上表答謝詔恩

八年濊貊不耐侯詣闕朝貢詔更封不耐濊王

晉武帝大康六年大宛獻汗血馬帝遣使楊顥拜其  
王藍度爲大宛王

懷帝卽位初以鮮卑務勿塵爲大單于司空領烏丸  
較尉王凌又表封務勿塵遼西郡公其別部大飄滑  
及其弟涓末別部大屠瓮等皆爲親晉王



簡文帝成安二年正月百濟王遣使貢方物六月遣使拜百濟王餘句為鎮東將軍領樂浪太守

孝武帝太元十一年以百濟王世子餘暉為使持節都督鎮平將軍百濟王

安帝隆安三年仇池氏楊盛遣使稱藩奉獻方物帝以盛為仇池公楊氏世居隴右漢末徙居仇池地方百頃因以百頃為號有名千萬者魏拜為百頃王其孫難敵稱藩於晉以為仇池公後孫纂立便詣簡文自陳後以纂為平羌較尉秦州刺史仇池公纂支庶定稱藩於孝武帝盛即定之兄也至是稱藩奉獻故

復命之桓玄輔政進盛西戎較尉

義熙九年高麗國王高璉一作高連遣長史高翼奉表獻

赭白馬以璉為高麗王樂浪郡公

十二年以百濟王映為使持節都督百濟諸軍事鎮東將軍百濟王

宋高祖永初元年百濟王餘映進號鎮東大將軍

二年林邑王范陽邁遣使貢獻即加除授以陽邁為林邑王

三年封仇池公楊威為武都王

文帝元嘉二年十一月以武都王世子楊玄為秦州



刺史襲封武都王

是年倭國王倭讚遣使奉表獻方物表曰封國偏遠作藩于外自昔祖父躬擐甲冑跋涉山川不遑寧處東征毛人五十五國西服衆夷六十六國渡平海北九十五國王道融泰廓土遐畿累業朝宗不讐于歲臣雖下愚忝紹先緒驅率所統歸崇天極詔除督倭新羅任那加羅秦朝韓六國安東大將軍倭王

七年正月以吐谷渾慕瓚爲征西將軍沙州刺史慕瓚遼東鮮卑也兄阿豺晉末譙縱之亂遣使上表獻方物詔爲安西將軍沙州刺史澆河公阿豺死慕瓚立奉表故有是命

六月以仇池氏冠軍將軍楊難當爲北秦州刺史封武都王

是年百濟王餘毗復修職貢以餘映爵號授之

九年六月以征西將軍沙州刺史吐谷渾慕瓚爲征西大將軍西秦河二州刺史隴西王北秦州刺史楊難當加號征西大將軍

十二年正月封黃龍國主馮弘爲燕王

十五年二月以平東將軍吐谷渾慕延爲鎮西將軍西秦河二州刺史



四月以倭國王埵爲安東將軍

十六年六月改封隴西王吐谷渾慕延爲河南王

二十年倭國王濟遣使奉獻復以爲安東將軍倭國王

二十六年六月婆皇國王舍利婆羅跋摩遣使獻方物四十一種策命爲婆皇國王

是月婆達國王舍利不陵伽跋摩遣使獻方物策婆達國王詔曰阿羅單婆達三國頻越遐海欵化納貢遠誠宜甄可並加除授乃遣使策命之

二十八年七月安東將軍倭王濟進號安東大將軍  
二十九年九月以平西將軍吐谷渾拾寅爲安西將軍西秦河二州刺史

孝武即位初安西將軍西秦河二州刺史吐谷渾拾寅進號鎮西大將軍開府儀同三司

大明元年十月以百濟王餘慶爲鎮東大將軍  
五年正月以宕昌國王梁唐子爲河州刺史

六年三月以倭國王世子興爲安東將軍倭國王  
七年六月高麗王高璉進號車騎大將軍開府儀同三司

明帝泰始三年十月鎮西大將軍西秦河二州刺史



河南王吐谷渾拾寅進號征西大將軍

後廢帝元徽三年九月征西大將河南王吐谷渾拾寅進號車騎大將軍

四年五月以仇池氏寧朔將軍武都王楊文度爲北秦州刺史

十月以宕昌王梁彌機爲安西將軍河涼二州刺史順帝昇明元年十二月寧朔將軍北秦州刺史武都王楊文度進號征西將軍

二年五月倭國王武遣使獻方物以武爲安東大將軍又封西陽蠻梅生爲高山侯田治生爲威生侯梅

加羊爲杆山侯

六月以輔國將軍楊文弘爲北秦州刺史封武都王

南齊太祖建元元年五月詔使持節散騎嘗侍都督

秦河沙三州諸軍開府儀同三司領護羗較尉西秦

河二州刺史河南王吐谷渾拾寅進號驃騎大將軍

使持節都督河涼二州安西將軍東羗較尉河涼二

州刺史隴西公宕昌王梁彌機進號鎮西將軍征虜

將軍西涼州刺史羗王像舒彭進號持節平西將軍

又詔曰昔絕國入贄美稱前冊殊俗內款聲流往記

虜茹盧鎮主陰平公楊廣香怨結同族羣起親黨在



宋之世遂舉地降敵茄盧失守華陽暫驚近單使先  
馳宣楊皇威廣香等追其遠世之誠仰我維新之化  
肉袒請附復地千里氏羗雜種咸同歸欵宜特領納  
厚加優卹廣香翻迷反正可特量所授部曲酋豪隨  
名酬賞以廣香爲都督沙州諸軍事平羗較尉沙州  
刺史又詔新除使持節都督倭新羅任那加羅秦韓  
六國諸軍事安東大將軍倭王武進號爲鎮東大將  
軍是時加羅國王荷知使來獻詔曰量廣始登遠夷  
洽化加羅王荷知欵闕海外奉贊東遐可授輔國將  
軍本國王

二年三月百濟王牟都遣使貢獻詔曰寶命惟新澤  
波絕域牟都世藩東表守職遐外可卽授使持節都  
督百濟諸軍事鎮東大將軍又以氏楊後起爲秦州  
刺史

四月使持節散騎嘗侍都督營平二州諸軍事車騎  
大將軍開府儀同三司樂浪公高麗王高璉進號驃  
騎大將軍

武帝永明元年二月以征虜將軍楊炤爲沙州刺史  
封陰平王又詔前使持節都督河涼二州軍事鎮西  
將軍東羗較尉河涼二州刺史隴西公宕昌王梁彌



機前使持節平北將軍西涼州刺史羗王像舒彭並著勤西垂安寧邊境可復先官爵

是年以隴右都帥羗王劉維羊為輔國將軍又進秦州刺史楊後起號冠軍將軍

二年八月秦州刺史楊後起勤彰款塞忠著邊城進號征虜將軍

三年六月以河南王拾寅世子吐谷渾易度侯為使持節都督西秦河沙三州諸軍事鎮西將軍領護羗

較尉西秦河二州刺史河南王又詔曰易度侯守職西蕃綏懷允緝忠績兼舉朕有嘉焉可進號車騎大

將軍

八月詔曰行宕昌王梁彌頡類一作忠款內附著績西

服宜加爵命式隆藩屏可使持節都督河涼二州諸軍事安西將軍東元較尉河涼二州刺史隴西公宕

昌王

四年閏正月秦州刺史楊後起卒詔曰後起奄至殞逝愴惻于懷綏禦邊服宜詳其選行輔國將軍北秦

州刺史武都王楊集始幹局沉亮乃心忠款必能緝境寧民宣揚聲教可持節輔國將軍北秦州刺史平

羗較尉武都王



六年五月以行宕昌王梁彌承爲使持節都督河涼二州諸軍事安西將軍東羌較尉河涼二州刺史是年除都督護北遂安左郡太守田駟路爲試守郡太守皆郢州蠻也

八年正月百濟王牟太遣使上表遣謁者僕射孫副策命太龍亡祖父牟都爲百濟王曰於戲惟爾世襲忠勤誠著遐表海路肅澄要貢無替式循彝典用纂顯命徃欽哉其敬膺休業可不慎歟詔行都督百濟諸軍事鎮東大將軍百濟王令以世襲祖父牟都爲百濟王卽位章綬等王銅虎竹符曰其拜受不亦休乎

是年以河南王吐谷渾休留代爲使持節都督西秦河沙三州鎮西將軍護羌較尉西秦河二州刺史九年五月林邑夷人范當根純攻奪其國自立遣使貢獻金篋等物詔曰林邑雖分在遐外世服正化當根純乃誠款到率其僚職遠績克宣良有可嘉宜沾爵號以弘休澤可持節都督綠海諸軍事安南將軍是年八座奏陰平王楊炤嗣勤西牧馳款內炤宜增戎章用輝遐外進號前將軍

十年以林邑王子孫范諸農率種人攻范當根純復



得本國以諸農爲持節都督緣海諸軍事安南將軍  
林邑王

鬱林王隆昌元年以高麗王樂浪公高雲爲使持節  
散騎嘗侍都督營平二州諸軍事征東大將軍

明帝建武二年七月以氐楊馥之爲北秦州刺史仇  
池公

是年林邑王諸農進號鎮國將軍

梁高祖天監三年五月扶南國王遣使送珊瑚佛像  
并獻方物詔曰扶南王橋陳如閻邪跋摩介居海表  
世纂南服厥誠遠著重譯獻琛宜蒙酬納班以榮號

可安南將軍

九月以河南王世子伏連籌爲鎮西將軍西秦河二  
州太守河南王

四年四月以宕昌國王梁彌博爲使持節都督河涼  
二州諸軍事安西將軍東羌較尉河涼二州刺史隴  
西公宕昌王佩以金印

七年二月詔曰高麗樂浪郡公高雲乃誠款著貢驛  
相尋宜隆秩命式弘朝典可撫東大將軍開府儀同  
三司持節嘗侍都督王並如故

九年四月林邑國奉獻白猴詔曰林邑國王范天凱



介在海表乃心欵至遠修職貢良有可嘉宜班爵號  
被以榮澤可持節都督綠海諸軍威南將軍林邑王  
普通元年二月以高麗王世子安為寧東將軍都督  
營平二州諸軍事襲爵高麗王

二年十二月詔曰行都督百濟諸軍事鎮東大將軍  
百濟王餘隆守藩海外遠修貢職廼誠欵到朕有嘉  
焉宜率舊章服茲榮命可持節都督百濟諸軍事寧  
東大將軍百濟王

五年詔以百濟王餘隆子明為持節百濟諸軍事綏  
東將軍百濟王

七年三月高麗王安庶子延立使遣貢獻詔以延襲  
爵

六月林邑王高式勝鎧遣使獻方物詔以為持節都  
督綠海諸軍事綏南將軍林邑王

中大通元年三月以河南王伏連着子呵羅真為寧  
西將軍獲羗較尉西秦河二州刺史

一云西秦河  
沙三州刺史

二年四月以河南王佛輔為寧西將軍西秦河二州  
刺史

六月行林邑王高式律隨羅跋摩貢獻詔以為持節  
都督綠海諸軍事綏南將軍林邑王



大同七年二月行宕昌王梁彌秦為西平將軍河梁二州刺史宕昌王

太清二年三月高麗王延卒詔以其子為寧東將軍襲延爵位陳文帝天嘉三年閏二月以百濟王餘明為撫東大將軍高句麗王高湯為寧東將軍

後魏道武登國初以爾朱羽健為領民酋長率契胡武士千七百人從駕平晉陽定中山論功拜散騎嘗侍以君秀容川詔割方三百里封之長世為業

天興初仇池氏楊盛遣使朝貢詔以盛為征南大將軍仇池王

太武始光四年十一月以氏王楊玄為都督荆梁益寧四州諸軍事假征南大將軍梁州刺史南秦王

延和二年九月詔兼大鴻臚卿崔頤持節拜征虜將軍楊難當為征南大將軍儀同三司封南秦王

太和三年九月遣使者拜西秦王慕瓚弟慕利延為鎮西大將軍儀同三司改封西平王

是時使自外散騎侍郎李教拜高麗王高連為都督遼海諸軍事征東將軍領東人中郡將遼東碑公高句麗正史闕年月

五年三月以故南秦王世子楊保宗為征南大將軍秦州牧武都王

太平真君二年三月封蠕蠕都久間乞歸為朔方王



五年六月西平王吐谷渾慕利延殺其兄子緯代立弟叱力延等來奔乞師以叱力延爲歸義王

正平元年伊吾王唐和閔帝優寵之文成卽位以和歸誠先朝拜鎮南將軍酒泉公

孝文延興二年正月太陽蠻首桓誕率戶內屬拜征南將軍襄陽王

太和二年三月遣鴻臚卿劉歸謁者張察拜河南公梁彌機爲征南大將軍西戎較尉梁益二州牧河南

公宕昌王

六年九月以氐楊後起爲武都王

九年七月遣使拜宕昌王梁彌機兄子彌承爲國王十六年三月以高麗王高璉孫雲爲其國王賜衣冠服物車旗之飾

十七年正月以吐谷渾伏連籌爲其國王

宣武景明四年十一月以武興國世子楊紹先爲其國王

正治二年正月宕昌王世子梁彌博爲其國王

永平二年八月以鄧至國世子像覽蹄爲其國王

孝明神龜元年正月詔以氐楊定爲陰平王

二年高麗王高雲死以世子安爲其國王拜鎮東將



軍領護東夷較尉遼東郡公

正光元年九月蠕蠕王阿那懷來奔十一月詔曰蠕

蠕世雄朔方擅制漢表隣通上國百有餘載自神鼎

南底累紀于茲虔貢雖遠邊燧靜息憑心象魏潛款

彌純今其主阿那瓌屬離時難邦分親析萬里遠馳

庇命有道同悲用申乖忤忠孝足務方存典臧之師

以隆紹絕之舉宜且優以賓禮期之立功疏爵胙土

大啓河岳可封朔方郡開國公蠕蠕王食邑一千戶

錫以衣冕加以輅車祿恤儀衛同乎戚藩

十二月送歸北

三年四月以高車王覆羅伊訶為鎮西將軍西海郡

開國公高車王

孝莊建義元年六月以高昌王世子光為平西將軍

瓜州刺史襲爵秦臨縣開國伯高昌王

前廢帝普泰元年高昌王趙堅遣使朝貢除平西將

軍瓜州刺史秦臨縣伯王如故尋加衛將軍

東魏孝靜天平中加高句麗王高延侍中車騎大將

軍

興和二年四月阿至羅國主副伏羅越君子去賓來

降封為高車王

西魏孝武永熙元年高句麗王延為使持節散騎嘗



侍車騎將軍領護東夷較尉遼東郡公高句麗王

二年以衛將軍瓜州刺史秦臨縣伯高昌王趙堅為

儀同三司進爵郡公

文帝大統五年蔡陽蠻王曹超明內屬授南雍州刺

史仍世襲焉

十四年以高昌王世子玄嘉為王

廢帝元年蠻酋焚舍舉落內附以為淮北三州諸軍

事淮州刺史淮安郡公

恭帝二年蠻酋宜人王母田興彥款附以為開府儀

同三司

北齊文宣天保元年九月以散騎嘗侍車騎將軍領

東夷較尉遼東郡開國公高麗王威為使持節侍中

驃騎大將軍領護東夷較尉王公如故

廢帝乾明元年二月以高麗王世子高湯為使持節

領東夷較尉遼東郡公高麗王

武成河清四年二月詔以新羅國王金真興為使持

節領東夷較尉樂浪郡公新羅王

後主武平元年二月以百濟王餘昌為使持節侍中

驃騎大將軍帶方郡公王如故

二年正月以百濟王餘昌為使持節都督東青州刺



史

後周武帝建德六年高麗王高湯遣使來貢一作拜

湯為上開府儀同大將軍遼東郡開國公遼東王

隋高祖開皇元年十月百濟王扶餘昌遣使來賀授

昌上開府儀同三司帶方郡公

十二月高麗王高湯遣使朝貢授湯大將軍遼東郡

公

四年五月契丹王莫賀弗遣使請降拜大將軍

五年党項拓拔寧叢等各率所部詣旭川內附授大

將軍其部下各有差

十年七月高麗遼東郡公高湯卒拜其子元為上開

府儀同三司襲爵遼東郡公賜衣一襲元奉表謝恩

并賀祥瑞因請封王高祖優詔策元為王

十四年新羅國王真平遣使貢方物拜真平為上開

府樂浪郡公新羅王

十九年四月突厥利可汗內附以為啓可汗

煬帝大業五年高昌王麴伯雅來朝拜左光祿大夫

車師太守封弁國公



册府元龜

巡按福建監察御史臣李嗣京 訂正

知甌寧縣事臣孫以敬 參閱

知建陽縣事臣黃國琦 較釋

外臣部 九

封册第二

唐高祖武德元年七月突厥曷婆那可汗弟闕可汗遣使内附帝厚加慰撫拜爲吐焉過拔闕可汗

十二月突厥曷婆那可汗自宇文化及所來降封爲

歸義王

册府元龜

外臣部

卷之九十一



三年三月牂州蠻首謝龍羽遣使朝貢授龍羽牂州刺史封夜郎郡公

七年正月封高麗王高建武為遼東郡王百濟王扶餘璋為帶方郡王新羅王金真平為樂浪郡王

太宗貞觀三年八月薛延陀可汗一利咄夷南遣使朝貢詔遊擊將軍喬師望齎冊書拜夷南為毗伽可

汗居大漠之北俱倫水南牙帳去長安四千餘里四年三月以突厥夾畢特勒和順郡公阿史那思摩

為右武侯大將軍化州都督是月詔突利可汗阿史那什鉢苾志懷英果識機能

斷情深獨悟寔惟先覺往在北蕃位地兼重早知慕化特布款誠及漠北降災龍荒兆亂潛圖決策棄難

歸朝披露肝膽備陳丹赤轉禍為福厥義可嘉宜有褒隆用彰寵渥錫茲茅土識參戎禁可右衛大將軍

封北平郡王食邑千戶五月封突厥阿史那蘇尼失為懷德郡王阿史那思

摩懷化郡王六年八月遣鴻臚少卿劉善因立四突厥莫賀設為

奚利邲咄陸可汗賜以鼓纛綵萬段是年遣中郎將桑孝彥冊立焉耆國王突騎友為啞利失可汗



九年閏四月李靖平吐谷渾帝復建其國下詔曰伐  
 罪弔人前王高義興亡繼絕有國令與吐谷渾擅相  
 君長竊據荒裔志在凶德政出權門首渠莠貳種落  
 怨憤長惡不悛野心彌熾莫顧藩臣之節會無事上  
 之禮竊據疆場皮劉氓庶積惡既捨天亡有徵朕君  
 臨四海含育萬類一物失所浮責在茲所以爰命六  
 軍申茲九伐義存活國情無黷武其子大寧王慕容  
 順隋氏之甥志懷明悟長自中土早慕華風爰見時  
 機浮識道順以其父慢懷違衆獨陷迷途遂誅邪臣  
 存茲大計翻然改轍代父歸罪忠孝之美浮有可嘉  
 子能立功足以補過既往之豐特宜原免然其建國  
 西鄙已歷年代卽從廢絕情所未忍繼其宗祀允歸  
 令子封順西平郡王食邑四千戶仍授趙胡呂烏耳  
 豆可汗所司量遣使人備禮册命

是年遣使持節册命新羅金善德

臣欽若等曰善德全真平之女也真

平卒無子乃立善德為王以宗室大臣乙奈總知政國

柱國封樂浪郡公新羅

王

十年三月詔曰文德懷遠列聖之弘規興亡繼絕至  
 仁之通訓吐谷渾發跡東胡東胡窟居西域負險自  
 固擅立君長爰在前代通使中原或為叛臣不嘗厥



德近者慕容步薩鉢爲主老而不智迷而亡返志懷  
首鼠虔劉疆場朕頻命行人殷勤誘諭不納忠信之  
言唯行蜂虻之毒及六軍問罪尚令申諭遂無悛革  
以至滅亡其子順國感事窮歷身無所委命下吏輿  
輓轅門故令解網釋俘繼其宗祀乃懷貳志遵彼覆  
車曾未浹旬自貽屠戮子燕王諾曷鉢弱不好弄幼  
稱通理纔纂舊業卽逢內難故遣旌節遠申安撫遂  
能率其種類同竭誠款盡其巢落迎謁使者屈膝頓  
顙尊奉朝化請頒正朔願入提封丹誠內發深可嘉  
尚宜隆寵章懋茲賞典可封河源郡王食邑四千戶  
仍授烏地也拔勒豆可汗卽遣使人備禮冊命

十二年九月詔曰天地之德平分於四時皇王之道  
無偏於萬物故能亭育黎庶覆燾區夏聲教咸洎於  
遐方爵命不遺於殊俗薛延陀真珠毗伽可汗器宇  
沉毅識具明允夙見時機早稟正朔忠誠峻節克著  
於塞外貢獻琛賫不絕於王府加以訓勗裔嗣輯寧  
種落俱率藩職咸慕朝風其子沙耽彌葉護拔酌達  
度莫賀咄設頡利苾並志懷敦確氣幹強果或深竭  
忠款殫心闕庭或遠經朝覲拜首軒陛言念冊誠良  
以嘉尚宜錫徽號用申褒寵拔酌可四葉護可汗仍



賜狼頭纛四鼓四頡利必可汗達莫賀咄葉護賜狼頭纛二鼓二仍令左領軍大將軍梁方師持節備冊命

十三年七月詔曰天地大德覆載極於八荒日月貞明炤臨周於萬物是以哲王撫運聖人垂範經邦立政之道取法於造化與亡繼絕之義靡隔於華夷惟彼北戎代居荒塞養畜牧於天山之外擅勇敢於瀚海之濱逮其末葉狂愚嗣位侵盜之釁禍結於諸華苛暴之風毒被於大漠酋豪隳貳部衆離阻革面者相望於道路請命者填委於闕庭朕情切於濟志存懷遠乃令上將拯其將溺元戎纔動倒戈相繼旣而屠耆歸命單于反接分地之長解辯而來王引弓之民盡落而內附龍城旣殄狼望遂空朕愍其破亡恕其瑕釁解縛焚橈賜以再生牧電迴霜宥以寬政於是選內外之職分珪組以授之擇肥饒之地設州縣以處之開倉府以恤其饑寒馳轡軒以問其疾苦恩俸中夏禮均舊臣十載於茲矣時授命三靈因心百姓爰初薄代非貪闔土之功泊於克定實弘安民之道久欲存其亡國返其遺萌尚恐瘡痍未瘳衣食不足今歲已積年穀屢登衆種增多畜牧蕃息繒絮無



乏咸弃其疆喪菽粟有餘靡資於狐兔便可復其故  
庭繼其先緒歸三祠於沮澤旋十角於廬山使復會  
蹄林弭其依風之思重宴樂水遂其向日之歡然則  
左方旣建右地已設必候君長一其號令自蠻鞮貴  
種醢落忠誠何以宣布朝化輯寧藩服右武侯大將  
軍化州都督懷化郡王李思摩器懷沉毅識用詳明  
早慕皇風夙效丹款故寵以賜姓榮以高爵內典徼  
循之重外受連卒之奇譽光朝職誠簡朕心錫以藩  
號紹以宗祀可乙彌泥敦俟利苾可汗並賜之鼓纛  
仍令就其部備禮冊命突厥及胡在諸州安置者並  
令渡河還其舊部俾夫世作藩屏同之帶舊長保邊  
塞傳諸後昆又以左屯衛將軍阿史那忠爲左賢王  
左武衛將軍阿史那泥孰爲右賢王  
十五年五月詔曰懷遠之道莫先於寵命飾中之義  
無隔於遐方故在國帶方郡王百濟王扶餘璋棧山  
航海遠稟正朔獻琛奉贄克固始終奄致薨殞追遠  
愍悼宜加嘗數式表哀榮可贈光祿大夫令其嫡子  
義慈嗣位授柱國封帶方郡王百濟王使祠部郎中  
鄭文表持節備禮冊命

七月命左領軍將軍張大師持節立西突厥弩失畢



賀咄葉護為乙毗沙鉢羅葉護可汗賜以鼓纛

十七年閏六月詔曰懷遠之規前王令典繼世之義

列代舊章高麗王嗣子藏

姓高各藏

器懷韶敏識宇詳正

早習禮教德義有聞肇承藩業誠款先著宜加爵命

允茲故實可上柱國封遼東郡王高麗王遣使持節

冊命

十九年九月薛延陀真珠毗伽可汗卒帝設祭於營

左為發哀初延陀請以其庶長子曳莽為突利失可

汗居東方所統皆雜種嫡子拔灼為四葉護可汗居

西方所統皆延陀詔許之並以禮冊命

二十二年正月新羅王金善德卒贈光祿大夫以善

德妹真德為柱國封樂浪郡王遣使持節冊命

是年契丹酋長窟哥等內屬為置松漠都督府以窟

哥為左領軍將軍兼松漠都督封無終縣男賜姓李

氏

高宗以貞觀二十三年即位拜吐蕃贊府弄讚為駙

馬都尉

臣欽若等曰以尚文成公主故也

封海西郡王弄讚因致書

長孫無忌云上初即位若臣下有不臧之心者請勒

兵以赴之并獻金銀珠寶十五種請置太宗靈座之

前以表其誠於是進封賓王賜雜綵三千段乃刻其



形像列於昭陵玄闕之下

永徽元年以故龜茲王左武衛中郎將訶黎布失畢為右驍衛大將軍尋放還蕃撫其餘衆依舊為龜茲王先是太宗既破龜茲移置安西都護府於其國城以郭孝恪為都護兼統于闐踈勒碎葉謂之四鎮帝嗣位不欲廣地勞人復命有司棄龜茲等四鎮故訶黎布失畢王其舊地

五年閏五月新羅女王金貞德卒以其弟國祖金春秋為新羅王繼真德之位仍拜開府儀同三司封樂浪郡王遣使持節備禮冊命

六年遣禮臣

臣欽君等曰史闕官

往西突厥冊拜額苾達度設

為可汗

額苾達度設者咄六可汗之子也初為琿珠葉護與其父不遵朝化及賀魯之叛咄六死

後方遣使歸順頻表請兵誅討賀魯故有此授焉禮臣至碎葉城西賀魯兵拒之不得前又真珠未護部下盧帳並被賀魯兼并人衆寡弱不為羣夷所附禮臣遂不冊而歸

顯慶二年十二月伊麗道行軍總管右屯衛將軍蘇定方大破阿史那賀魯于金牙山盡收其所據之地西域悉平詔分其地置蒙池崑陵二都護府以右武衛大將軍阿史那彌射為驃騎大將軍崑陵都護與昔亡可汗屯衛大將軍阿史那步真為驃騎大將軍行右大將軍蒙池都護往絕可汗各賜物十萬匹仍



遣光祿卿盧承慶持節冊命

三年正月立龜茲王嗣子白素稽爲龜茲王授右驍衛大將軍仍遣使就加冊命

五月以左驍衛大將兼安西都護天山縣公麴智湛爲西州都督紇高昌之故地

十二月以左驍衛大將軍渤海都督迴紇婆濶爲左衛大將軍右驍衛大將軍燕然都督多覽葛塞匍爲右衛大將軍

龍朔元年九月特遣新羅王金春秋薨帝遣使吊之便冊其嗣子法敏爲新羅王

二年正月立波斯都督卑路斯爲波斯王

三年四月詔以新羅國爲雞林大都督府以新羅王今法敏爲雞林州大都督

許封元年五月封河源王慕容諾曷鉢爲青海王

總章元年十月東天竺烏切茶國長年婆羅門盧迦逸多特拜懷化大將軍旌奇術也時逸多受詔合金丹

咸亨元年四月以西突厥首領阿史那都之爲左驍衛大將軍兼匍延都督以安輯五咄六及咽麵之衆上元二年正月以于闐國爲毗沙都督府分其境內



爲十州以于闐王尉遲伏屠雄爲毗沙都督擊吐蕃有功故也

開耀元年十月新羅王金法敏薨遣册立其子政明爲新羅王仍襲父官爵

則天垂拱二年九月册拜右玉鈐衛將軍阿史那斛瑟羅襲其父繼往絕可汗

是月東女國王歛臂遣大臣湯劍左來朝仍請官號乃册拜歛臂爲左玉鈐衛貞外將軍仍以瑞錦製服以賜之

天授二年臘月以于闐王尉伏閣雄卒册立真子璣

爲于闐王

璣一作璣

長壽二年新羅王金政明卒爲之舉哀遣使弔祭册其子理洪爲新羅王仍令襲父輔國大將軍行左豹韜衛大將軍維林州都督

萬歲通天元年九月則天以突厥默曷不同契丹之逆遣左豹韜衛大將軍知微册授驃騎大將軍行左衛大將軍上柱國公遣善可汗

是月封康國王大首領左玉鈐衛將軍篤婆鉢提爲康國王

二年十月左玉鈐衛貞外將軍兼簡較汴州刺史李



括莫離為歸順王

聖曆元年七月冊立泥沮師師為康國王

是年突厥啜遣使請和制遣左豹韜衛將軍闡知微入蕃冊為立功報國可汗

三年臘月可禮卿兼池州大都護竭忠事上可汗阿史那斛瑟羅為左衛大將軍仍充平西軍大總管鎮撫碎葉

三月臣欽若等口是時則大以十一月為正十二月為臘月故三月在臘月之後以吐谷

渾青國海王慕容宣超宣超為左豹韜衛負外大將軍仍襲父烏地也拔勒豆可汗

長安二年新羅王金理洪卒則天遣使立其弟興光為新羅王仍襲兄將軍都督之號

四年正月冊拜右武威衛大將軍阿史那懷道為十姓可汗

中宗神龍二年二月封突騎施烏質勒為懷德郡王十二月戊戌命唱鹿州都督突騎施婆葛襲父易贊勒為左驍騎大將軍兼衛尉卿懷德郡王仍令右屯衛大將軍十姓可汗阿史那懷道充使冊命

景龍三年七月遣使持節策授左驍衛將軍兼衛尉卿金河王突騎施守忠為歸化可汗



玄宗先天二年二月拜高麗大首領高定傳為特進

是月封靺鞨大祚榮為渤海郡王

大祚榮聖曆千自立為振國王在營

州東二千里兵數萬人至是遣郎將崔訢往册命祚榮左驍衛員外大將軍渤海郡王仍以其所統為汗州都督自是每歲遣使朝貢

開元三年八月高麗吐渾等諸蕃降附制曰天亡驕

子胡運其終國有忠臣漢封斯在高麗王莫離支高

文簡都督跋跌思太吐渾大首領刺史漠客道奴郁

躬施大首領鶻屈利斤大首領刺史苾悉頡力麗大

首領拱毅等或遼海貴族或陰山寵裔知則能勇權

而善謀從事本蕃頡頏高位料逆順之道知變通之

節或誓以沉族或翻然庇身共驗到支之亡遂觀繇

余之入將軍遇敵永罷射鵬使者迎降果聞乘傳棄

寒苦之地就陽和之澤爾其誠矣朕實休之宜開土

宇之封式盛壇場之制文簡可封遼西郡王食邑三

千戶行左衛大將軍員外置同正員賜宅一區馬四

匹物六百段跋跌思太可特進行右衛大將軍員外

置兼跋跌都督封樓煩國公食邑三千戶賜宅一區

馬三匹物五百段道奴可左威衛將軍員外置兼刺

史封雲中郡開國公食邑二千戶賜宅一區物四百

段馬兩匹鶻屈頡斤可左驍衛將軍員外置兼刺史



封陰山郡開國公食邑二千戶賜馬兩匹物二百段  
苾悉頡力可左武衛將軍負外置兼刺史封鴈門郡  
開國公食邑二千戶賜馬兩匹物四百段宅一區拱  
毅可左領軍衛將軍負外置兼刺史封平城郡開國  
公食邑二千戶賜馬兩匹物四百段鵠頡川妻契苾  
賜物壹百五十段手力二人各賜物五十段

四年八月契丹李失活奚李大酺各以所部來降制  
曰混一六合紀綱四海開物所以苞舉華夷列爵所  
以範圍中外契丹松漠州都督李失活奚饒樂州都  
督李大酺等並材雄劔騎家襲簪組翻飛涿鹿之郊  
高視無間之地往屬註惑遂爾攜離海表爲虞在苞  
桑之厚戒彙徃順命乃連茹而同歸柔懷有章寵渥  
斯在俾侯利建宜膺胙土之榮上將師貞仍允齋壇  
之拜失活可封松漠郡王食邑三千戶行左金吾衛  
大將軍大酺可封饒樂郡王食邑三千戶行右金吾  
衛大將軍並負外置餘如故

五年五月册命勃律國王蘓弗舍利支離泥爲勃律  
王册曰維開元五年歲次丁巳五月庚子朔二十七  
日丙寅皇帝若曰於戲夫象賢踵德匪直諸華開國  
承家無隔殊俗咨爾勃律國王蘓弗舍利支離泥卿



歷代首渠執心忠肅遙申誠款克修職貢謝知信繇其遠畧郭虔瓘所以足兵行觀郁成授首何止匈奴斷臂是用命爾爲勃律國王爾宜善始令終長奉正朔寧人保國慶及苗裔徃欽哉其先膺典冊祇朕寵命可不慎歟

六年五月制曰王者懷柔莫不率俾禮其君長必備典章右武衛大將軍負外置突騎施都督車鼻施噉蘇祿中部貴人右賢豪緒族系繁於朔野郊廛拒於陰寒自趨風入獻服義來歸爰奉戎索實司邊行懋勳可紀忠節是嘉俾昇絕席之尊仍茂錫圭之寵可左羽林軍大將軍負外置仍封順國公食邑三千戶餘有故並賜錦袍鈿帶魚袋七事仍充金方道經畧大使所司備禮冊拜

六月以故松漠郡王李失活弟中郎將婆固爲松漠都督左金吾衛大將軍負外置同正負靜柝軍經畧大使襲封松漠郡王食邑二千戶

七年三月忽汗州都督渤海郡王大祚榮卒遣使撫立其嫡子桂婁郡王大武藝襲爲左驍衛大將軍渤海郡王忽汗州都督

七月龜茲國王白莫苾卒以其嫡子孝節嗣位



十月冊金方道經畧大使突騎施蘇祿爲忠順可汗  
八年三月封護密國王羅施伊具骨咄祿多比勒莫  
賀咄達靡薩爾爲護密王賜紫袍金帶七事并雜綵  
五十匹

四月遣使冊立烏長國王骨咄國王俱立國王並降  
冊文皆賜綵二百段三國在安西之西與大食隣境  
大食煽誘爲虐俱守節不從潛布款誠于朝廷帝深  
嘉之

六月遣使冊勃律國王蘇麟陀逸之爲勃律國王  
八月遣使冊箇失密國王直陀羅祕利爲箇失密國  
王

是月冊渤海郡王左驍衛大將軍大武藝嫡男大都  
利行爲桂婁郡王

九月遣使冊葛達羅支頡利發誓屈爾爲謝颯國王  
葛達羅支特勒爲蜀賓國王

十一月遣使冊南天竺國王尸利那羅僧伽寶多拔  
摩爲南天竺國王

十年四月以契丹首領松漠府都督李鬱于爲松漠  
郡王奚首領饒樂府都督李魯蘇爲饒樂郡王各賜  
物一千疋銀器七十事及錦袍鈿帶等



五月牂州刺史夜郎郡公謝元齊死詔立其嫡孫嘉  
藝襲官封

十二年八月制日尸利佛誓國三尸利施羅拔摩遠  
修職貢載勤忠款嘉其乃誠宜有褒錫可遙授左威  
衛大將軍賜紫袍金鈿帶

十四年改封契丹松漠郡王李邵固為廣化王奚饒  
樂郡王李魯蘇為奉誠王仍封宗室外甥女二人為  
公主各以妻之制曰李邵固等輸忠保塞乃誠奉國  
屬外寰中無遠不屈而華裔靡隔等數有加宜賜休  
名俾承慶澤

十六年正月封于闐阿摩支知王事石武衛大將軍  
貞外置同正貞上柱國尉遲伏師為于闐王冊曰踐  
義立身資忠成性稟崆峒之氣威武可稱慕函夏之  
風款誠必盡功著沙漠聲聞闕庭宜有褒崇俾膺封  
建今遣大理正攝鴻臚少卿喬夢松冊爾為于闐王  
於戲祗若順訓聿修令德無怠無荒以保土宇爾往  
欽哉又封踈阿摩支裴安之為踈勤國王冊曰維開  
元十六年歲次戊辰正月戊戌朔十四日辛亥皇帝  
若曰萬邦述職無隔華夷五等䟽封式固藩屏咨爾  
踈勒阿摩支知王事左武衛將軍貞外置裴安之誕



靈蒲海稟秀葱山蘊義以立名踊仁而成德雖日月所炤莫非王土而烽燧時警猶曰虜庭遂能扞彼邊陲歸我聲教載闡疇庸之義俾弘利建之風今遣大理正攝鴻臚少卿喬夢松冊爾爲疏勒王於戲允迪緜庶勿替敬典綏厥戎落永爲漢藩爾徃欽哉

十七年正月冊吐火羅骨咄祿頡達度爲吐火羅葉護怛怛王

十九年四月突厥可汗弟闕特勤卒冊小勃律國王難泥爲其國王降書謂之曰惟爾代雄荒服爲國藩衛居萬里之外竭一心之忠用能潛應王師克剪悖寇葱河失險青海無波使我威靈遠加絲爾誠節克著言念功效歎美良浮今冊爾爲木國王并賜衣帶王宜領取

是月康國王烏勒遣使上表請封其子咄褐爲曹國王默爲米王並許之降書報烏勒曰卿僻在遐荒久修誠款情深本國志慕欽風節義著於家邦忠孝兼於臣子言念懇到歎美良浮所請各依可知朕意二十年九月護密王發卒封其弟護真檀爲護密國王

是年渤海桂婁郡王大武藝病死其子大欽茂嗣立



帝降書冊且弔之曰念卿亡父素勵誠節與善無微  
 奄至殂謝典言求往軫念良浮卿是長嫡當襲父位  
 宜全忠孝以繼前蹤今故遣使持節冊命兼申弔祭  
 冊曰皇帝若曰於戲王者宅中守在海外必立藩長  
 以寧遐荒咨爾故渤海郡王嫡子大欽茂代承緒業  
 早聞才幹昔在爾考忠於國家爰逮爾躬當茲負荷  
 豈惟立嫡亦乃擇賢休問可嘉寵章宜及是用命爾  
 為渤海郡王爾往欽哉永為藩屏長保忠信效節本  
 朝作範殊俗可不美歟  
 是年突厥可汗小殺卒國人立其子為伊然可汗詔

宗正卿李佺冊立

伊然病卒立其弟登利可汗登利華言果報也

二十一年四月冊箇失密國王木多筆為本國王冊  
 曰維開元二十一年歲次癸酉四月丁酉朔五日辛  
 丑皇帝若曰咨爾箇失密國王木多筆嗚呼奕葉歸  
 順遠輸誠節修職貢之禮受蕃落之寄時有代謝兄  
 亡弟襲保界山川輯率黎庶國有制度俗尚清靜可  
 不勉歟今命爾為箇失密國王恭膺冊命往欽哉  
 九月護密國王真檀來朝宴于內殿授左金吾衛將  
 軍負外置賜紫袍金帶魚袋等七事及帛百匹放還

蕃



是年渤海靺鞨越海入寇登萊詔新羅王金興光發兵討之仍加授興光開府儀同三司寧海軍使

二十三年正月契丹知兵馬官李過折來獻戎捷制曰高懸爵秩以待勲庸能者得之固其宜也契丹兵馬官李過折蕃中貴種塞下雄才其謀慮之深旣能轉禍當義勇之發何異疾雷故得積年逋誅一朝蕩滌使烏窠之衆復爲戎人鷹揚之師且息邊甲言念誠節宜超等數特加象幣之封仍異龍城之禮可封北平郡王同幽州節度副大使賜帛一千疋

二十五年正月新羅王金興光卒其子承慶嗣位遣使來告帝悼惜久之贈太子太保命贊善大夫邢疇攝鴻臚少卿往其國行弔祭册立之禮興光新羅王政明之子理供之弟也

二十六年九月封西南大酋帥蒙歸義爲雲南王制曰古之封建誓以山河義在疇庸故無虛授西南蠻部大酋帥特進越國公賜紫袍金鈿帶七事歸義挺秀西南是稱酋傑仁而有勇孝乃兼忠懷馭衆之長於兼事君之勁節瞻言諸部或有姦人潛通犬戎敢肆蜂虿遂能躬擐甲冑總率驍雄深入長驅左縈右拂凡厥醜類應時誅剪戎功若此朝寵宜加俾膺胙



土之榮以勵扞城之士復遣中使李思敬齎冊書往冊焉

十月詔康國王烏勒卒封其子咄喝為嗣謝颺國王誓颺卒封其子如沒拂達為嗣曹國王沒羨卒封其弟蘇都僕羅為嗣史國王延屯死封其子忽鉢為嗣皆死在他年今從赴也

是月蜀賓國王烏散勒灑以年老上來請立其嫡子佛林蜀婆嗣位從之乃封佛林蜀婆為蜀賓國王自康國已下皆降書宣慰冊土二十八年三月以石國蕃王莫賀咄吐屯有功封為石國王加特進仍賜旌

節翌日又冊為順義王册日維開元二十八年歲次庚辰三月丁亥朔二十二日戊申皇帝若曰於戲茂秩攸升疏封有命寵榮斯及必在英賢咨爾石國王莫賀咄吐代襲誠節器標果斷盡忠向化作并蕃陞項以蘇祿殘妖尚為邊患乃能納其隣國授以良圖候彼疆場相為表裏致令克清邊徼遠輯殊方實賴心膂載宣勲力靜言褒異非爾而誰是用冊爾為順義王爾宜敬慎王猷撫寧部眾永保藩輔可不慎歟是月加拓羯王斯謹鞬特進賞平蘇祿可汗之功册日維開元二十八年歲次庚辰三月丁亥朔二十六



日壬子皇帝若曰於戲乃瞻陰方代有君長至於膺  
我盛禮榮彼殊鄰必擇其人諒無虛授咨爾突厥苾  
伽骨咄祿可汗氣稟崆峒材雄朔漠見事無惑執心  
不渝迄先代以來結好中國自續承舊業克繼前修  
遠遣使臣來朝闕下義之所感情實嘉焉不有褒稱  
孰彰忠順是用册爾為可汗今遣從弟左金吾衛將  
軍質持節禮册往欽哉可汗其丕承徽章益勵名節  
永保多福以貽後昆可不慎歟

是月磧西節度使蓋嘉運俘吐火仙可汗骨啜弟葉護頰阿波  
捨之授以官爵制曰德以柔遠兵以威敵服而捨之  
古之制也突騎施吐火仙可汗骨啜弟葉護頰阿波  
等背北乘邊阻兵恃衆鯨蟻聚為梗或援疆場而王  
師所向盡擣巢穴憫其束身就戮歸命而朝宜加宥  
過之典載洽覃恩之命俾厥弟兄並膺光寵或分茅  
土復列鉤陳骨啜可左金吾衛負外大將軍仍封為  
循義王頡阿波可右武衛負外大將軍

是年遣右金吾將軍李質齎璽書入突厥册立登利  
為可汗

二十九年二月小勃律國王卒册立其兄麻號來嗣  
位册曰於戲王澤無偏義弘於遠邇朝榮所厚諒敦



於款誠咨爾麻號來代襲君長家傳忠信地雖限於  
絕域心每歸於本朝爰建爾躬足繼前緒素有馭下  
之畧益堅奉上之志是用册爾為勃律國王爾其敬  
膺典册無忘節義永保土宇以貽子孫可不慎歟

册府元龜

册府元龜

巡按福建監察御史臣李嗣京 訂正

分守建南道左布政使臣胡維霖 叅閱

知建陽縣事 臣 黃國琦 較釋

外臣部 十

封册第三

唐玄宗天寶元年正月封女國王趙叟夫為歸昌王  
授左金吾衛大將軍佛逝國王劉勝未恭為賓義王  
授右金吾衛大將軍瞞國王楊多過為懷寧王授左  
羽林軍大將軍並員外置各賜帛八十疋放還部落



六月冊突騎施大纛官都磨度闕頡斤爲三姓葉護仍授左羽林軍大將軍冊曰維天寶元年歲次壬午六月甲戌朔二十二日乙未皇帝詔曰於戲王者無外不隔遐方必揆忠欵是加寵命咨爾骨嗜祿毗伽都磨度闕頡斤代襲榮望名擅驍騎信義有聞部衆稱美徃在蕃任受制克威元惡已除能革心而向化牙纛旣立克輔主以歸懷嘉爾誠心載崇賞秩是用命爾爲三姓葉護徃欵哉爾其祇奉典冊懋明忠順善翊君長勉樹勳庸可不慎歟

二年五月新羅王金承慶卒弟憲英襲位制曰故開府儀同三司使持節大都督鷄林州諸軍事兼持節寧海軍使新羅王金承慶弟憲英奕葉懷仁率心嘗禮大賢風教條理尤明中夏軌儀衣冠素襲馳海琛而遣使準雲呂而通朝代爲純臣累效忠節頃者兄承土宇沒而絕嗣弟膺繼及抑惟嘗經是用賓懷優以冊命宜因舊業俾承蕃長之名仍加殊禮載錫漢官之號可襲兄新羅國王都府儀同三司使持節大都督鷄林州諸軍事兼克持節寧海軍使

三年閏二月封陁拔薩憐國王爲恭化王冊曰維天寶三年歲次甲申閏二月乙未朔二十二日丙辰皇



帝詔曰於戲王化所及禮在於懷柔蕃部有歸義存于冊命咨爾陀拔薩憚國王阿魯施多志懷恭順深達智謀賓以使臣修其職貢信義昭著深可褒稱是用命爾爲恭化王爾其祗奉典冊懋遵風教忠勤自勵始終無違用率於遐邦以宣我朝命可不慎歟

六月封突騎施伊里底密施骨咄祿毗伽爲十姓可汗冊曰維天寶三年歲次甲申六月癸巳朔十二日甲辰皇帝詔曰於戲覆燾之德豈隔於華夷綏懷之道實貴於忠順咨爾突騎施伊里底密施骨咄祿毗伽承其宗緒達於智謀能和衆心以致寧靜載執蕃

禮遠效懇誠節義昭明深可嘉尚是用命爾爲十姓可汗往欽哉爾其膺懋典冊祗奉朝化蹈此忠信保於始終用主於遠方以光其寵命可不慎歟

七月封九姓葉護男賀獵爲燕郡王

是月賜曹國王號爲懷德王米國王爲恭順王康國王爲欽化王

四載七月安國王屈底波遣使朝貢遂封屈底波爲歸義王

九月命蜀賓國王男勃準襲父位冊曰維天寶四年歲次乙酉九月乙卯朔二十二日丙子皇帝詔曰於



戲遠方恭順褒錫宜優累代忠勤寵章斯及咨爾蜀  
賓國王男勃準宿承信義早竭欵誠寧彼下人二蕃  
安靜繼其舊業萬里來朝秉節不渝懇懷彌著愿情  
之至深可嘉焉是用冊命襲蜀賓國王及烏長國王  
仍授右驍衛將軍往欵哉爾其肅恭典冊保尚忠義  
承膺於寵命以率於遐蕃可不慎歟

五載四月封奚王婆固爲昭信王仍授驍樂府都督  
契丹王楷維爲恭仁王仍授松漠府都督

六載二月封陁拔斯單國王忽魯汗爲歸信王羅利  
支國王伊思俱習爲義寧王岐蘭國王盧薛爲義賓

王涅蒲國王謝沒爲奉順王渤達國王摩俱滴思爲  
守義王都盤國王謀思德摩訶延爲順德王阿沒國  
王俱般胡沒爲恭信王沙蘭國王甲畧斯威爲順禮  
王

七載雲南王蒙歸義卒詔立其子悶羅鳳襲雲南王  
八載七月冊十姓突騎施移撥爲可汗冊曰爵以疇  
庸德以懷遠乃建蕃國抑惟舊章十姓突奇施移撥  
可汗骨咄祿毗伽俱支欵輸誠志稱勇烈克保忠  
貞之節且兼射御之能信義無愆邊隅是賴加以不  
從惡黨遠慕華風言念爾勞載懷嘉尚矚茲部伍必



仗材雄宜式拜於寵命俾有膺於殊禮可冊為十姓  
突騎施移撥可汗

九載三月冊謁帥國王勃特沒兄素迦為王冊曰於  
戲賞勞之制必崇名器懷柔之典無替疇庸咨爾謁  
帥國王勃特沒兄素迦代謁忠誠僻居遐裔風懷智  
識早聞勇義頃以勃特沒於鄉不孝於國不忠而卿  
抱屈既深久被淪棄今惡黨已殄克結就擒鄉遂能  
輸忠赤於朝廷表仁惠於蕃部永言効節宜膺旌賞  
是用冊爾為謁帥國王爾其丕荷國恩克修蕃禮子  
孫萬代長保寵榮豈不美歟可不慎歟

十一載正月壬寅冊骨咄國王羅全節為葉護冊曰  
維天寶十一載歲次壬寅正月己卯二十四日壬辰  
皇帝詔曰於戲疇賞懋功無隔於中外懷荒卹遠諒  
歸於典謨咨爾國咄國王羅全節夙遵聲教志尚忠  
節作并邊疆勤効斯著頃者以群醜撥動方欲脅從  
而忠懇不渝始終彌固言念於此嘉尚良深是用授  
爾驃騎大將軍仍冊為葉護爾其祗膺典禮慎守封  
疆歸慶子孫受茲寵錫可不美歟

十二載九月以骨咄祿三姓毗方伽頡利發為左羽  
林軍大將軍員外置同正員又以骨咄祿毗伽為突



騎施可汗

是月葛邏祿葉護頓毗伽生擒阿布思制曰葛邏祿  
 葉護進頓毗特稟英姿擅雄荒服威信馭衆智畧超  
 群仗弘義以立節竭至誠而嚮順逆虜阿布思丘山  
 積弊天地匪容未就誅夷仍茲鼠竄遂能率引弓之  
 旅佐轉戰之師生縛克渠成殲醜類雖不長元惡顧  
 神理之必誅而與我同仇乃忠勇之斯美疇其茂績  
 寵以殊榮可開府儀同三司封金山王依舊克葉護  
 祿俸於北庭給其葉護妻及母並封爲國夫人  
 十月封石國王男邦車俱鼻施爲懷化王

十四載四月以投降蘇毗王子悉諾邏爲左驍衛員  
 外大將軍封懷義王賜姓李名忠信其屬官賜各有  
 差

肅宗至德二年十二月詔曰功濟艱難志存邦國萬  
 里絕域一德同心求之古今所未聞也廻紇葉護特  
 稟英姿挺生奇畧言必良信行表溫恭才爲萬人之  
 敵位列諸蕃之長屬克醜亂嘗中原未靜以可汗有  
 弟兄之約與國家興父子之軍奮其智謀討彼兇逆  
 一鼓作氣百萬摧鋒二旬之間兩京克定力拔山嶽  
 精冠風雲蒙犯魯不辭其勞急難無以渝其分固可



縣之日月傳之子孫豈惟列土之封誓河之賞夫位之崇者司空第一名之大者封王最高可司空仍封忠義王每載送絹二萬疋至朔方軍差使領受

乾元元年七月册命廻紇可汗爲英武威遠毗伽可汗仍令堂弟漢中王瑀克使

代宗廣德元年七月册廻紇可汗爲頡咄登密施舍俱祿英義建功毗伽可汗可敦册爲婆墨光親麗華毗伽可敦可汗可敦及左右内外宰相已下共加實封二萬戶令御史大夫王瓘持節就牙帳禮册左右殺胡祿都督等並封爲王諸都督一十一人並封國

公

大曆二年二月以新羅王金憲英卒國人立其子乾運爲王遣其臣金隱居請加册命詔以倉部郎中歸崇徽兼御史中丞持節齎册書册之以乾運爲開府儀同三司新羅王仍册乾運母爲太妃

六年十一月文單國王來朝詔曰周有越裳重譯漢有槃木獻詩遠方來儀從古所記文單國副王婆彌慕我中朝之化方通南極之風義在撫柔禮當加等可開府儀同三司試殿中監

德宗建中元年六月以京兆尹源休持節册廻紇頓



莫賀爲武義成功可汗帝初嗣位使中官梁文秀告  
哀迴紇修舊好可汗移地者又陳中國便利以誘其  
心可汗乃舉國南下將乘我喪其宰相頓莫賀達於  
諫曰唐大國也且無負於我前年入太原獲羊馬數  
萬計可謂大捷矣以道途艱難比及還國傷耗殆盡  
今若舉而不捷將安歸乎可汗不聽頓莫賀乘人心  
之危因擊殺之并殺其親信及九姓胡所誘來者凡  
二千人頓莫賀自立遣爲合骨噶厥毗可汗使其  
酋長建達于隨梁文秀來朝命持節冊拜焉

貞元元年正月以祿書丞孟昌源爲國子司業兼御

史中丞新羅弔祭冊立使先是建中四年新羅王金  
乾運卒無子國人立其上相金良相爲王至是詔授  
良相簡較太師都督鷄林州刺史寧海運史遣昌源  
弔冊之

是年新羅王金良相卒其上相金敬信爲王詔令襲  
其官爵敬信卽從兄弟也

四年四月封東蠻鬼王驃旁苴夢衝苴烏星等爲和  
義順政等郡王驃旁等自陷雋州臣於吐蕃絕朝貢  
者二十餘年及是劍南節度韋臯招誘之始棄吐蕃  
肉附來朝特封爲郡王且衣以冠帶仍給兩林勿鄧



等部落印而遣之

五年十二月詔廻紇汨咄祿長壽天親毗伽可汗夢以鴻臚卿郭降克冊廻紇忠貞可汗使

七年二月以鴻臚少卿康鏗兼御史大夫冊廻紇可汗及弔祭使先是六年四月忠貞可汗國人所慕立其子爲可汗遣達北勒梅祿將軍告哀且請冊新君故有是命

九年七月東女國王湯立悉來朝授立悉銀青光祿大夫歸化州刺史

是年哥隣國王董臥庭來朝至綿州卒贈武德州刺

史命其子利羅爲保寧都督府長史襲哥隣王

十年五月以西川歸化蠻悉嗟爲左驍衛將軍同正

是月加工部員外郎袁滋兼御史中丞賜紫金魚袋持節冊南詔使南詔異牟尋卽雲南王閣羅鳳之孫

天寶中閣羅鳳北臣吐蕃命爲贊普鍾曰東帝給以金印大曆十四年卒異牟尋嗣立至是乃去吐蕃所立帝號請復南詔舊名帝嘉之賜以金印銀窠其文曰貞元冊南詔印

十二月封南詔清平官簡較左散騎嘗侍尹求寬爲高溪郡王



十一年二月令内嘗侍殷志瞻將册書往渤海册大  
嵩璘為渤海王忽汗州都督嵩璘渤海大欽茂之子  
襲父位也

五月册拜廻紇騰里邏羽錄没密施合胡祿骨咄祿  
毗伽懷信可汗以祕書少監史館修撰張薦兼御史  
中丞克使

十四年三月加渤海郡王兼左驍衛大將軍忽汗州  
都督大嵩璘銀青光祿大夫簡較司空册為渤海國  
王依前忽汗州都督大嵩璘父欽茂以開元二十六  
年襲其父武藝忽汗州都督渤海郡王左金吾大將

軍天寶中累加特進太子詹事賓客實應元年進封  
渤海國王大曆中又累拜司空太尉及嵩璘襲位但  
授其郡王將軍嵩璘遣使叙禮故更加册命焉

十一月以朔方靈州同節度副使左金吾衛大將軍  
同正兼詳太嘗卿慕容復襲長樂府都督青海國王  
烏地野拔勤豆可汗

十六年四月以故開府儀同三司簡較太尉使持節  
克寧海軍使上柱國新羅國王金敬則嫡孫權知國  
事俊邕可襲祖開府簡較太尉鷄林州大都督等新  
羅國王令司封郎中兼御史中丞韋丹持節册命丹



至鄆州聞俊邕卒其子立詔丹還

十九年正月授黎州廓清道蠻首領襲恭化郡王劉志遼試太嘗卿

順宗以貞元二十一年正月卽位三月立新羅洞王金重熙爲開府儀同三司簡較太尉使持節大都督鷄林州諸軍事鷄林州刺史兼持節克寧海軍使上柱國其母和氏爲太妃其妻朴氏爲妃遣兵部郎中兼御史大夫季方克使

四月封彌臣嗣王道勿禮爲彌臣國王

五月加忽汗州都督渤海王大嵩璘金紫光祿大夫簡較司徒

憲宗以永貞元年八月卽位時迴紇懷信可汗卒使來告喪

十一月册命可汗爲愛登里邏汨德沒施俱錄毗伽可汗以鴻臚少卿兼御史中丞孫杲克弔祭册立使元和元年二月授入朝奚王梅落銀青光祿大夫簡較司空饒樂郡王放還蕃國

十月加忽汗州都督渤海國王大嵩璘簡較太尉十二月以南詔異牟卒册其子驃信酋蒙閣勸爲南詔遣諫議大夫段平仲司封郎中李逢吉克副使并



鑄元和册南詔印從平仲所請也

三年五月以廻鶻騰里野合俱祿毗伽可汗卒命使

册九姓廻鶻可汗為愛登里囉汨沒密施合毗伽保

義可汗以前山南西道節度使柳晟為簡較工部尚

書兼將作監持節克使

六月沙陀突厥七百人携其親屬歸於振武節度使

范希朝尋授其大首領曷勒阿波左武衛大將軍同

正員兼陰山府都督祕書監

四年正月以故渤海國王大嵩璘男元瑜為銀青光

祿大夫簡較祕書監克忽汗州都督册為渤海國王

十月以投來奚王沒辱孤為右領軍衛將軍員外同

正克幽州盧龍軍節度平州遊奕兵馬使仍賜姓李

氏

七年七月以新羅王金重熙卒立其相金彥昇遣使

來告詔以彥昇為開府儀同三司簡較太尉使持節

大都督鷄林州諸軍事兼持節克寧海軍使上桂國

封新羅國王妻真氏册為妃仍令有司准式兼命職

方員外郎攝御史中丞崔延克使

八年正月以故渤海國王大元瑜長弟權知國務言

義為銀青光祿大夫簡較祕書監忽汗州都督册為



渤海國王遣內侍李重旻克使

十一年五月南詔龍蒙盛卒遣使請冊立其君長命少府少監李銳兼御史中丞持節冊立左贊善大夫許堯佐副之

十三年四月以知渤海國務大仁秀爲銀青光祿大夫簡較祕書監忽汗州都督冊爲渤海國王

十五年閏正月加忽汗州都督渤海國王大仁秀金紫光祿大夫簡較司空

穆宗長慶元年四月以迴紇毗伽保義可汗卒正衙冊迴鶻君長爲登羅羽祿沒密施合句祿毗伽可汗以少府監裴通克使

三年九月南詔遣使朝貢以京兆少尹韋審規爲冊立南詔使

敬宗寶曆元年五月命使冊立九姓迴鶻爰登里羅洎沒密施合毗伽昭禮可汗遣品官田務豐領國王文宗太和四年七月以投來奚王茹羯爲守右驍衛將軍員外置同正員

五年正月以權知渤海國王務大彛震爲銀青光祿大夫簡較祕書監兼忽汗州都督冊爲渤海國王四月以新羅金彥昇卒詔其子景徽爲開府儀同三



司簡較太尉使持節鷄林州諸軍事克鷄林州大都督寧海軍等使仍賜上柱國封爲新羅王復封其母朴氏爲新羅太妃妻真氏爲王妃命太子左諭德兼御史中丞源寂持節弔祭册立

七月四月朔日王者運神功以清九有敷至德以柔四夷雖萬國建邦皆有君長而一時縟禮特厚親隣用昭絕漠之榮式示徽章之貴克膺盛典允屬雄材咨爾九姓迴鶻愛登里羅泐沒密施合句祿毗伽彰信可汗代濟公忠時推英毅剛明有守信實不渝總北方勁悍之師募中華清淨之化克昭前訓實懷遠圖慶叶承家願申永好彼無侵軼此務綏安兩國咸歡六姻彌重事大之義而合志春秋相嚮之誠而皎如日月使臣旁午贊幣交馳詞意綢繆禮貌恭恪是嘉誠款宜錫寵光必能虔受新恩慕乃舊服今遣使寧遠將軍右金吾衛將軍兼御史大夫上柱國賜紫金魚袋唐弘實副使中大夫將作少監兼御史中丞賜紫金魚袋嗣澤王容等持節備禮册爲九姓迴鶻愛登里羅泐沒密施合句祿毗伽彰信可汗於戲海內四極惟唐舊封天下一家與我同軌舉茲典册布於神明爾其慎固封疆祇守名器罔墜先烈載揚令



猷欽承禮文以作來範

武宗會昌二年六月封天德降到迴鶻首領唱沒斯  
為懷化郡王賜牙旗豹尾尋加簡較工部尚書兼歸  
義軍使制日迴鶻代雄絕漠名振北蕃而乃厭金革  
之疆慕朝廷之禮類襲冠帶思覩漢儀蟬蛻自取其  
潔清豹變獨蔚於文彩不有豪傑孰啓壯圖唱沒斯  
稟氣陰山降精斗極生知忠孝神授兵鈴自強之心  
隱如敵國銳上之氣森若戈矛果能因亂布誠覩機  
立節深叶懷柔之志不因告諭之詞昔者取士殊隣  
秦能致霸得賢異壤晉實用材是宜優以寵光處之

權貴褒納忠之顯效賜歸義之美名俾建旆於新軍  
示絕席於諸將勉修臣節服戎官榮

九月制契丹新立王屈戌可雲麾將軍守右武衛將  
軍員外制同正員仍賜新印篆其文曰奉國契冊之  
印

宣宗大中元年四月册默戛斯酋領為英武誠明可  
汗國曰堅昆以鴻臚卿李業克使

後唐莊宗同光元年賜陰山府都督白承福於中山  
北石門為柵號寧朔奉化兩府以都督為節度使賜  
姓李名紹魯



二年四月迴鶻權知可汗仁美遣使來貢制曰迴鶻可汗仁美代襲驍雄生知義烈乘北方忠順之氣爲南面沙漠之君自列聖有國之初便申盟誓及肅宗中興之運繼立勲庸爾來貢奉不違戎馬無警一心嘗保於甥舅萬里或結於姻親今則興服之初琛俄至仍聞撫寧七部兼且控制諸蕃終姓之道無渝信言必復嗣緒之文斯在典冊宜行俾紹前修且明久要宜封爲英義可汗仍令所司擇日備禮冊命乃以太原少尹李彥圖簡較工部尚書爲冊使

明宗天成元年十月以舊州山後兩林百蠻都毘王右武衛大將軍李早晚爲寧遠將軍大渡河南山前印州六姓都鬼主懷安郡王勿鄧標莎爲定遠將軍三年二月命使冊迴鶻權知可汗仁祕爲順化可汗長興三年五月制權知高麗國事王建可特進簡較太保使持節玄菟州都督上柱國封高麗國王克大義軍使

末帝清泰元年七月癸丑簡較刑部尚書瓜州刺史慕容歸盈轉簡較尚書左僕射時瓜沙附迴鶻來朝貢令使歸故有斯命

晉高祖天福三年十月制曰于闐國王李聖天境控



西陞心馳北闕頃屬前朝多事久阻來庭今當寶曆  
開基乃勤述職請備屬籍宜降冊封將引來遠之恩  
得樂無爲之化宜冊封爲大寶于闐國王仍令所司  
擇日備禮冊命以供奉官張光鄴克使

四年三月制曰迴鶴可汗仁美雄臨朔野虔奉中朝  
一方之烽燧蔑聞萬里之梯航繼至自當開創益效  
傾輸備觀尊獎之心爰降冊封之命宜封爲奉化可  
汗擇日備禮冊命遣衛尉卿邢德昭持節使之

六年五月制曰王者法二象以覆載齊七麗以炤臨  
既符有道之文是布無私之化其有誠懸象闢路越

鯨津首領拱極之心久勵事君之節得不示四時之  
信同萬國之風用顯英賢俾行典禮大義軍使特進  
簡較太保使持節玄菟州都督上柱國高麗王王建  
天資間傑神授機謀宇量矜嚴靈襟洞達志堅金石  
操凜雪霜每切朝宗嘗勤事大守三韓之重地仁義  
兼修定百濟之疆隣恩威並振暨朕握圖御宇膺籙  
開基遣猶子以朝天備彰忠節改名臣而稱賀益認  
深誠而又敘立國之繇述連姻之舊慕予正朔顯爾  
籌謀是用時舉徽章聿覃豐澤階升一品位統三師  
加以戶封兼其真食勉膺寵命以保令猷可開府儀



同三司簡較太師依前使持節玄菟州都督克大義軍使食邑一萬戶食實封一千戶高麗國王八月遣光祿卿張澄國子博士謝攀往冊命焉

少帝開運二年十二月以權知高麗國事王武爲特進簡較太保使持節玄菟州都督上柱國克大義軍事兼御史大夫高麗國王仍命光祿卿范政太子洗馬張季凝就行冊命

周太祖廣順二年二月制權監高麗國事王昭可特進簡較太保使持節玄菟州都督上柱國克大義軍使封高麗王仍令所司請禮冊命以衛尉卿劉暉克

冊使通事舍人顧彥浦副之暉卒於路彥浦溺海而死以太僕少卿王演借衛尉卿克高麗國冊禮使右衛率府呂繼贊借將作少監克使副

世宗顯德二年十一月以高麗國遣廣評侍郎荀質來賀登極授其國王王昭開府儀同三司簡較太尉制曰姬旦分疆肅慎列明堂之位武王尊德朝鮮受箕子之封矧乃代守東藩材稱間世襲衣冠而奉正朔瞻象魏以走梯航推誠遠慕於華風重譯來朝於輿運嘉乃丕績宜覃懋恩特進簡較太尉使持節玄菟州都督大義軍節度使上柱國高麗國王王昭地



控辰韓風行日域命氏本神僊之族炳靈分象緯之精爲仁自契於太平旣觀繇已述職罔殊於諸夏來奉克庭朕嗣守鴻圖方宗王道禮樂征伐之柄盡出耿躬山河帶礪之盟思傳不朽但遵聲教豈限遐遙俾光燾土之封更假自天之寵於戲儀同三事無先開府之尊冠聳四梁愈見上公之貴琢蒼玉爲爾珮飾豐貂爲爾冠用報好音且彰柔遠爾其仰宣朝命下慰州民泛濟水爲恩波還同在藻指家山於緱嶺免詠式微永爲屬國之賓無闕外臣之禮可授開府儀同三司簡較太尉依前使持節玄菟州諸軍事行玄菟州都督克大義軍使高麗國王勲如故恭帝以顯德六年卽位加高麗國王王昭簡較太師食邑三千戶

冊府元龜



冊府元龜

巡按福建監察御史臣李嗣京 訂正

分守建南道左布政使臣胡維霖 參閱

知建陽縣 事臣 黃國琦 較釋

外臣部 十一

繼襲

小雅著似續之訓春秋有世及之義蓋所以象賢濟美克承基緒者也雖復要荒之外戎蠻之國亦乃崇樹世嫡襲其位號傳國延祚享年永从其間知人如宋宣讓國如魯隱愛才如吳謁得位如晉文雖曰夷



狄有足稱者自餘女子爲後疆臣逆取是不一姓何嘗之有系而言之亦所以紀其興滅之迹矣

東夷朝鮮自武王封箕子其後四十餘年至朝鮮侯準自稱王漢初燕人衛滿擊破準而自王朝鮮傳國至孫右渠

高句麗漢初其王高朱蒙死子如栗立如栗死子莫來立漢武旣滅朝鮮以高句麗爲縣王莽更名下句麗侯後漢建武八年遣使朝貢光武復其王號裔孫宮建光元年死子遂成立遂成死子伯固立伯固死有二子長子拔奇小子伊夷模拔奇不肖國人便立

伊夷模爲王伊夷模死子位宮立始位宮曾祖宮生而目開能視國人惡之及長凶虐國以殘破及位宮亦生而視人高麗呼相似爲位以爲似其曾祖宮故名位宮其後位宮玄孫乙弗利立乙弗利死子釗立釗爲百濟所殺至後魏大武時釗曾孫璉遣詣安東奉表貢方物封璉爲遼東郡公高句麗王太和十五年璉死年百餘歲孫雲立神龜中雲死世子安立安死子延立延死子成立成死子湯立周武帝封湯爲遼東王隋高祖改封高麗王湯死子元嗣唐高祖武德二年元弟建武遣使朝貢貞觀十六年西部大人



蓋蘇文殺建武立其弟大陽子藏爲王十七年太宗封藏爲遼東郡王儀鳳中改朝鮮王永淳初藏卒垂拱二年封藏孫寶元爲朝鮮郡王聖曆元年改爲忠誠國王後唐同光天成中其王姓高長興三年其王曰王建晉開運二年建卒子武嗣漢乾祐末武卒子昭立

百濟晉義熙十二年封其王餘映爲百濟王宋元嘉七年其王餘毘復脩職貢以映爵號授之毘死子慶代立慶死子牟都立牟都死子牟大立梁普通二年其王餘隆遣使朝貢五年隆死子明襲其王號北齊武平元年以其王餘昌爲百濟王隋開皇中昌死子瑋立唐高祖武德七年册爲帶方郡王百濟王貞觀十五年瑋卒子慈義遣使告哀太宗册義慈襲其王號顯慶五年左衛大將軍蘇定方大破其國虜義慈及太子隆送於京師龍朔元年百濟僧道琛舊將福信遣使往倭國迎故王子扶餘豐立爲王高宗命帶方州刺史劉軌討之詔以扶餘隆爲熊津都督遣還本國儀鳳二年封帶方郡王其百濟本地漸爲新羅所據隆不敢還遂卒則天以其孫敬襲封帶方郡王新羅王本百濟人自海逃入新羅遂王其國傳世三



十至金真平隋開皇十四年封樂浪郡公新羅王唐  
貞觀五年真平卒無子立其女善德爲王襲樂浪郡  
公新羅王號二十一年善德卒立其妹真德爲王永  
徽五年真德卒弟相國金春秋嗣龍朔元年春秋卒  
詔其子太府卿法敏嗣開耀元年法敏卒其子政明  
嗣天授三年政明卒其子理洪嗣長安二年理洪卒  
立其弟興光爲新羅王開元二十五年興光卒其子  
承慶襲天寶二年承慶卒其子憲英襲大曆二年憲  
英卒其子乾運襲建中四年乾運卒無子國人立其  
上相金良相爲王貞元元年良相卒立上相敬信爲  
王襲其官爵敬信卽良相從兄弟也十四年敬信卒  
其子先亡國人立敬信嫡孫俊邕爲王十六年俊邕  
卒其子重興立元和七年重興卒立其相金彥昇爲  
王太和五年彥昇卒其子景徽嗣後唐同光元年其  
王金朴英長興四年權知國事金溥並遣使朝貢倭  
國後漢光和有女王名卑彌呼魏正始中卑彌呼  
死更立男王國中不服更相誅殺復立卑彌呼宗女  
臺與爲王其後復立男王並受中國爵命晉安帝時  
倭王贊死弟彌立彌死子濟立宋元嘉二十年齊死  
世子興立興死弟武立隋開皇二十年其王姓何每



宇多利思比孤號河葦雞彌遣使朝貢

南越王趙佗漢高帝十一年立為南越王建元四年

陀卒孫胡為南越王胡薨太子嬰齊立先是嬰齊入

宿衛在長安時取邯鄲穆氏女子生興及即位上書

請立穆氏女為后興為嗣及嬰齊薨太子興代自尉

佗王凡五世九十三歲而亡

閩越王無諸漢高帝五年立為閩越王王閩中故地

建元六年其王郢擊南越為其弟餘善所殺詔立無

諸孫繇君丑為越繇王奉閩越先祭祀餘善已殺郢

威行於國國人多屬竊自立為王繇王不能矯其眾

持正天子聞之立餘善為東越王與繇王並處

元封元年

為漢所滅

東海王搖漢惠帝三年立為東海王都東甌世從號

為東甌王後數世為閩越所滅

林邑國漢末象林縣功曹姓區有子連殺令自立為

王子孫相承其後王無嗣外孫范熊代立熊死子逸

立南齊時夷人范當根篡奪林邑自立為王後林邑

王范陽邁子孫范諸農率種人攻當根純復得本國

梁天監九年其王范元凱立十三年病死弼毳跋摩

立唐武德六年其王曰范志貞觀四年其王曰范頭



黎並遣使朝貢頭黎死子范真龍代立真龍爲國人  
所殺乃立頭黎女婿婆羅門爲王真後大臣及國人  
感思舊王乃廢婆羅門而立頭黎之嫡女爲王一說  
永徽總章中其王曰鉢迦舍跋摩先天開元中其王  
建多達摩天寶中其王盧陀羅並遣使朝貢至德後  
改稱環王國不以林邑爲號永泰元年林邑王諸農  
入朝海中遭風溺死代宗以其子文欵爲假節都督  
綠海軍事安南將軍林邑王  
赤土國其王姓瞿曇氏名利富多塞稱其父釋王位  
出家爲道傳位于利富多塞

朱江國其王姓利氏名質多斯那自其祖漸已強盛  
至質多斯那遂兼扶南而有之質多斯那死子伊奢  
那先代立

西南夷東謝蠻其首領謝元深世爲酋長唐貞觀三  
年元深與南謝首領謝強來貢貞元十三年西南蕃  
大酋長繼襲蠻州刺史宋鼎左右大首領仰州刺史  
謝汕隨牂柯朝貢

西趙蠻首領趙氏世爲酋長唐貞觀三年以其地置  
明州首領趙磨爲刺史

牂柯蠻首領謝龍羽唐武德三年授牂州刺史封夜



郎公開元十年大酋謝元齊死詔立其孫嘉藝襲其官封二十五年大酋長趙君道來朝貞元七年授其酋長趙主俗官

南詔王姓蒙氏唐初有蒙舍龍生迹獨龍迹獨生細奴羅高宗時來朝細奴邏生邏盛則天時來朝開元初邏盛死子盛還皮立盛還皮死子皮邏閣立玄宗封越國公賜名歸義其後破洱河蠻以功册授雲南王天寶七載歸義卒詔立子閣羅鳳襲雲南王大曆十四年閣羅鳳死子迦異先死乃立迦異子是爲異牟尋元和三年異牟尋死册其子驃信箕蒙悶勸爲南詔其後有龍牟盛蒙籠顛皆爲南詔

西羌無弋爰劍者秦厲公時諸羌推以爲豪其後世世爲豪從爰劍種五世至研研最豪健自後以研爲種號十三世至燒當復豪健其子孫更以燒當爲種號自燒當至玄孫滇良世居河北大允谷滇良死子滇吾立滇吾降漢子東吾立乃入居塞內

氏者四夷之別種後漢建安中有楊騰者爲部落大帥徙居仇池地方百頃因以爲號魏拜爲百頃王至其孫名飛龍無子養外甥令狐茂搜爲子晉元康中羣氏推以爲主愍帝以爲驃騎將軍封左賢王茂搜



死子難敵統位自號左賢王屯下辨弟堅頭分部曲  
號右賢王屯河池難敵死子毅立自號左賢王下辨  
公以堅頭子盤爲右賢王河池公毅族兄初襲殺毅  
并有其衆自立爲仇池公永和十年改封初爲天水  
公十一年初爲小弟宋奴所殺初子國誅宋奴復自  
立爲仇池公十二年國從叔俊復殺國自立國子安  
奢符生殺俊稱藩於晉及死子世自立爲仇池公太  
和三年以世爲秦州刺史弟統爲武都太守世死統  
廢世子纂自立纂黨襲殺統自立爲仇池公遣使詣  
關簡文帝以纂爲秦州刺史咸安元年苻堅遣楊安  
伐纂尅之徙其人於關中空百頃之地先是宋奴之  
死二子佛奴佛狗逃奔苻堅堅以女妻佛奴子定拜  
爲尚書領軍堅之敗定奔隴右徙居歷城招夷夏千  
餘家自稱龍驤將軍仇池公稱藩於晉孝武以爲秦  
州刺史後魏登國四年遂有秦州之地號隴西王後  
爲乞伏乾歸所殺無子狗奴子盛先爲監國守仇池  
公統事自號征西將軍秦州刺史仇池公謚定爲武  
王天興初以盛爲征南大將軍仇池公盛死私謚曰  
惠文王子玄統位始光四年拜玄爲征南大將軍督  
梁州刺史南秦王玄死私謚孝昭王子保宗統位初



玄臨終謂弟難當日今境候未寧方須撫慰保宗冲  
昧吾授卿國事其無墜先勲難當固辭請立保宗以  
輔之保宗既立難當妻姚氏謂難當日國險宜立長  
君返事孺子非久計難當從之廢保宗而自立太武  
拜難當爲征南大將軍秦梁二州刺史南秦王難當  
爲宋將裴方明所敗棄仇池奔上邽太武遣中山王  
辰迎之方明既尅仇池以保宗弟保熾守之河間公  
齊擊走之氏羗立保宗弟文德屯于濁水太武遣中  
山王辰迎之文成時拜難當營州刺史卒謚曰忠和  
子小眼襲爵例降爲公拜天水太守卒子公熙襲爵  
初宋將裴方明既尅仇池以保宗弟保熾守之尋爲  
後魏河間公齊擊走氏羗立保宗弟文德屯於濁水  
又爲皮豹子所擊保宗之執也子元和奔宋以爲武  
都白水太守元和據城歸順文成嘉之拜征南大將  
軍武都王內徙京師元和從叔僧嗣復自稱武都王  
於葭蘆僧嗣死從弟文度自立爲武興王孝文初征  
西將軍皮歡喜攻葭蘆破之文度弟鼠自立爲武興  
王奉表謝罪孝文拜鼠都督南秦州刺史征西將軍  
西戎較尉武都王鼠死從子後起統位孝文復以鼠  
爵授之後起死以鼠子集復爲武興王集死子紹先



立紹先年幼委事二叔集起集義後爲建武將軍傅  
豎眼所破執紹先送京師遂滅其國魏末天下亂紹  
先奔還武興復自立爲王紹先死子辟邪立周太祖  
討平之乃以大將軍宇文貴爲都督興州刺史  
宕昌羗後魏時有梁勲者世爲酋帥得羗豪心乃自  
稱王焉勲孫彌念太武初遣子彌黃奉表求內附拜  
爲宕昌王彌念死孫彪子立彪子死彌治立彌治死  
子彌機立

東女國本西羗之別種俗以女爲王號爲賓就唐武  
德中其王湯滂氏垂拱二年其王歛臂天授三年其  
王俄琰兒爾並遣使朝貢天寶元年封其王趙曳夫  
爲歸昌王是後以男子爲王貞元九年其王湯立憲  
內附授歸化州刺史

吐蕃本西羗之種國人號其王爲贊普唐永徽元年  
贊普寶王不夜弄讚薨弄讚子早死其嗣孫立復號  
贊普年幼國事皆委於其相祿東贊祿東贊死其子  
欽陵復專其國儀鳳四年不夜弄讚卒嫡子噐弩悉  
弄卽大臣麴薩苦之甥也先與薩苦往年同徵發兵  
馬聞喪歸國繼位爲贊普時年八歲其弟年六歲時  
在欽陵之軍國人以欽陵疆盛又欽奉之爲主欽陵



迫於大義竟與薩苦協心器弩悉弄位始定神龍元年器弩悉弄卒諸子爭立久之國人立其子棄隸縮贊爲贊普時年七歲天寶十四載贊普乞黎蘇籠臚贊死大臣立其子娑悉籠臚贊爲贊普貞元十三年卒長子立一歲卒元和十二年會昌二年皆以贊普卒來告

西域罽賓國漢武帝時其王烏頭勞死子代立遣使奉獻唐顯慶三年遣使朝貢訪其國俗云王始祖馨孽今日曷擯之父子傳位已二代其年列其誠爲脩鮮府龍朔初授其王都督十一州諸軍事開元七年册其王爲葛邏達支特勒二十七年其王烏散特勒上以年老上表請嫡子拂森剌娑嗣位許之天寶四載又册其子勃匄准爲襲罽賓及烏菴國王仍授右驍衛將軍

烏孫漢武帝時其昆莫有十餘子中子大祿彊善將將衆萬餘騎別居大祿兄太子太子有子曰岑陁太子蚤死謂昆莫曰必以岑陁爲太子昆莫哀許之大祿怒乃收其昆弟將衆畔謀攻岑陁昆莫與岑陁萬餘騎令別居昆莫亦自有萬餘騎以自備國分爲三大總羈屬昆莫後尚江都公主昆莫年老欲使岑陁



尚公主公主不聽天子令從其風俗岑陬遂妻公主  
昆莫死岑陬代立岑陬者官號也各軍須靡昆莫王  
號也各獵騎靡後昆彌亡岑陬胡婦子泥靡尚小岑  
陬且死以國與季父大祿子翁歸靡曰泥靡大以國  
歸之翁歸靡旣立號靡王復尚楚王解憂生三男兩  
女元康二年上書願以漢外孫元貴靡爲嗣得令復  
尚漢公主乃以解憂弟相夫爲公主遣之未出塞聞  
翁歸靡死貴人共從本約立岑陬小子泥靡代爲昆  
彌號狂王其後爲翁歸靡胡婦人烏就屠所殺烏就  
屠自立爲昆彌詔立元貴靡爲大昆彌烏就屠爲小

昆彌元貴靡死子星靡代爲大昆彌昆彌死子烏就  
靡代小昆彌烏就屠死子拊離代立拊離爲弟日貳  
所殺漢遣使者立拊離子安日爲小昆彌後爲降民  
所殺漢立其弟未振將代未振將恐爲大昆彌雌離  
靡所并使貴人烏日領詐降刺殺之漢立雌栗靡季  
父公主孫伊秩靡爲大昆彌漢没入小昆彌侍子在  
京師者久之大昆彌翎侯難栖殺未振將以其兄安  
日子安黎靡代爲小昆靡是歲元延二年也

拘彌國後漢永建四年其王爲于闐王放前所殺自  
立其子爲拘彌王陽嘉元年燉煌太守徐繇遣疏勒



王擊破于闐更立興宗人成國爲拘彌王熹平四年于闐王安國攻拘彌殺其王戊巳較尉西域長史各發兵輔立拘彌侍子定興爲王

于闐國後漢永平中其王休莫霸死兄子廣德立永建六年其王放前遣侍子貢獻

大月氏國漢時貴霜翎侯丘就卻自立爲王國號貴霜丘就卻年八十歲餘死子閼膏珍代爲王

莎車國漢宣帝時烏孫公主小子萬年莎車王愛之莎車王無子死死時萬年在漢莎車國人計欲自託于漢又欲得烏孫心乃上書請萬年爲王萬年既立

暴惡國人不說莎車王弟呼屠徵殺萬年自立漢烈侯馮奉世發兵擊殺之更立它昆弔子爲莎車王至元帝時其王延嘗爲侍子長於京師王莽天鳳五年延死謚忠武王子康代立後漢建武九年康死謚宣成王弟賢代立賢爲于闐王廣德所虜匈奴遣兵將賢質子不若徵立爲莎車王廣德又攻殺之更立其弟齊黎爲王章帝元和三年降漢

疏勒國後漢永平十六年龜茲王建殺疏勒王成自以龜茲左侯兜題爲疏勒王是年漢遣軍司馬班超劫縛兜題而立成之兄子忠爲疏勒王元初中其王



曰安國以舅臣磐有罪徙于月氏後安國死無子母持國政與國人共立臣磐同產弟子遣復為疏勒王臣磐聞之請月氏王曰安國無子種人微弱若立毋氏我乃遣復叔父也我當為王月氏遣兵送還疏勒國人素敬愛臣磐又畏憚月氏即共奪遣復印綬迎臣磐立為王至靈帝建寧元年疏勒王為其季和得所射殺和得自立為王

龜茲國漢時其王絳賓以烏孫公主為夫人絳賓死六子承德自謂漢外孫成帝時往來充數隋大業中其王姓白氏曰蘇尼陞唐武德初其王蘇伐勃駛並遣使來朝勃駛卒子蘇伐豐代立號特健莫賀侯利

發豐死其弟訶黎布失畢代立貞觀末阿史那社爾伐龜茲二其王远於京師立其弟葉護為王永徽七年又以訶黎布失畢為右驍衛大將軍尋放還蕃撫其餘眾依舊為龜茲王顯慶二年立其王嗣子白素稽為龜茲王授右驍衛大將軍仍遣使就加冊命開元七年其王白漢苾卒以其嫡子孝節襲位

車師都尉國漢時其王太子曰軍宿匈奴欲以為質軍宿焉耆外孫不欲質匈奴亡走馬耆車師王更立子烏貴為太子後為車師王為二所擊亡走烏孫



烏孫留不遣使上書願留其車師王備國有急可從  
西道以擊匈奴漢許之於是漢召故車師太子軍宿  
在焉耆者立以爲王

高車國者漢車師前王之庭也後魏時蠕蠕立闕伯  
周爲高昌王太和初伯周死子義成立爲從兄首歸  
所殺首歸自立爲高昌王五年爲高車王阿伏至羅  
所殺以燉煌人張孟明爲王爲國人所殺更以馬儒  
爲王以鞏顧翹嘉二人爲左右長史儒又通使後魏  
請內屬人皆戀土不願東遷相與殺儒立嘉爲王延  
昌中以嘉爲持節平西大將軍瓜州刺史泰品縣開  
國伯嘉死子堅立堅死子伯雅立唐武德二年伯雅  
死子文泰嗣貞觀十四年稱疾不朝太宗命吏部尚  
書侯君集征之泰死子智盛嗣立君集遂拔其城置  
安西都護府

焉耆國隋大業中其王姓龍名突騎支唐貞觀十四  
年安西都護郭孝恪發兵擊之虜突騎支獻於雒陽  
太守赦其罪留於京師其國乃立薩婆阿那支號爲  
瞎于阿史那社爾之討龜茲也阿那支率兵龜茲共  
禦大軍柱爾擒而斬之立龍婆伽利爲王卽突騎弟  
也永徽三年龍婆伽利死其國人請立前王龍騎支



爲王高宗許之加授右武衛將軍令還本蕃開元七年其王龍嬾突蕩以其焉吐拂延襲位

波斯國其王初嗣位便密選諸子才堪承統者名字封而藏之王死後大臣與王之羣子共發封而視之奉所書名爲王唐觀二十一年其王伊嗣俟龍朔元年其國王卑路斯並遣使朝貢高宗列其地疾陵城爲波斯都督府授卑路斯爲都督

大食國隋大業中其王名噉蜜莫末賦自云有國已四十四年歷三主矣一說隋開皇中大食族中有孤列種代爲酋長孤列有二姓一號盆尼奚深一號盆

尼末換後有摩訶末者勇健多智衆立之爲王摩訶末後十四代至末換殺其兄爲部人所殺遂求得奚浮種阿蒲羅拔立之阿蒲羅拔卒立其弟阿蒲恭拂恭拂卒子迷地立迷地卒子牟栖立牟栖卒弟論立是歲貞觀二年也

石國唐顯慶三年列其地爲大宛府以其王噉吐屯攝舍提於屈昭穆爲都督開元初封其王莫賀咄吐屯爲石國王九年其王曰伊吐屯屈勒天寶五載封其王子那偈車鼻施爲懷化王

吐火羅國唐永徽三年列其地爲月氏府以其葉護



阿史那烏濕波爲都督開元七年其葉護曰支汗那十七年冊其首領骨咄祿頓達度爲葉護天寶八載其葉護失里忙伽羅並遣使朝賀

康國本康居之苗裔唐武德七年其王曰屋本支顯慶三年其王曰拂呼髮是年高宗列其地爲康居府以拂呼髮爲都督八歲通天元年則天封其大首領篤婆鉢提爲王鉢提尋卒又冊立其子泥濕師師爲王泥濕師師卒冊立其子突昏爲王開元十九年其王烏勒卒上表請封其子咄曷爲曹國王許之二十七年烏勒卒遣使冊咄曷襲其父位

史國唐顯慶三年列其所治爲佉沙州以其王昭武失阿曷爲刺史開元十五年其王曰阿忽鉢爲王二十七年卒冊立其子阿忽鉢爲王二十九年其王斯謹提立

冊府元龜

冊府元龜

外臣部

卷之九百六十六

十七



冊府元龜

巡按福建監察御史臣李嗣京 訂正

分守建南道左布政使臣胡維霖 參閱

知建陽縣事臣黃國琦較釋

外臣部 十二

繼襲第二

西北吐谷渾本鮮卑徒河涉歸之子涉歸晉時封昌黎公死子若落處化統部落而庶長吐谷渾西附陰山吐谷渾死長子吐延嗣吐延性酷刻暴為昂城羗酋姜聰所刺劍猶在體呼子葉延語其大將絕拔渥



日吾氣絕棺歛訖便速去保白蘭白蘭地既險遠又  
土俗懦弱易控禦葉延小付汝汝竭股肱之力以輔  
之傳子得立吾無恨矣抽劍而死葉延立乃以王父  
字爲氏亦以爲國號葉延死子碎奚立性淳謹三弟  
專權碎奚不能制諸大將共誅之碎奚憂哀不復攝  
事遂立子視連爲世子委之事號曰莫賀郎華言父  
也視連立十五年死弟視罷立視罷死子樹維千並  
幼弟烏紇提立烏紇提死樹維千立自號車騎將軍  
是歲晉義熙初也樹維千死弟阿豺立自號驃騎將  
軍沙州刺史宋少帝封爲澆河公阿豺臨死召諸子  
弟告之曰先公車騎捨其子虔以大業屬吾吾豈敢  
忘先公之舉而私於緯代其以慕瑱繼事阿豺有子  
二十人又謂之曰汝等各奉吾一隻箭將玩之地下  
俄而命母弟慕利延曰汝取一隻箭折之慕延折之  
又曰汝取十九隻箭折之慕延不能折阿豺曰汝曹  
知乎卑者易折衆則難摧戮力一心然後社稷可固  
言終而死宋文帝又授慕瑒爲隴西公後魏大武遣  
使册拜慕瑒爲大將軍西秦王大延二年慕瑒死弟  
慕利延立改封西平王慕利延死樹維千拾寅立始  
邑於伏羅川後拜爲西平王太和五年拾寅死子易



侯立易侯死子伏連籌立封爲吐谷渾王伏連籌死子夸呂立始自號爲可汗居伏侯城夸呂在位百年餘卒子世伏嗣世伏爲國人所殺立其弟伏允爲主爲隋所擊客于党項大業末天下亂伏允復其故地唐貞觀九年詔特進李靖討破之伏允自縊而死國人乃立其嫡子太寧王順爲可汗稱臣內附太宗封順爲西平郡王仍授趙胡呂烏其豆可汗順立未幾爲臣下所殺其子燕王諾易鉢嗣立封爲河源郡王仍授烏地也拔勒豆可汗其後吐谷渾爲吐蕃所得諾易鉢徙其部衆于靈州之地置安樂州以諾易鉢爲刺史垂拱四年卒子忠嗣忠卒子宣趙嗣聖曆三年襲父烏地也拔勒豆可汗宣趙卒子希皓嗣希皓卒子兆嗣及吐蕃陷安樂州其部衆又東徙散在朔方河東之境貞元十四年以朔方軍節度副使慕容復爲襲長樂州都督清海國王烏地也拔勒豆可汗未幾卒其封遂絕唐末有首領赫連鐸拓拔思恭後唐有白承福念公山薛糞堆各有部族北狄匈奴秦始皇時單于曰頭曼有太子名曰冒頓代爲單于漢文帝時冒頓死子稽粥立號曰老上單于後四年老上單于死子軍臣單于立元朔中軍臣



單于死其地左谷蠡王伊犀斜自立爲單于攻敗軍臣單于太子於單於單亡降漢漢封於單爲陟安侯伊犀斜單于立十三年死子烏維立爲單于是歲元鼎三年也烏維單于立十歲死子詹師廬立年少號爲兒單于是歲元封六年也兒單于立三歲而死子少匈奴乃立其季父烏維單于弟右賢王句黎湖爲單于是歲太初三年也其冬病歿其弟左大將都督且鞮侯立爲單于且鞮侯單于立五年死長子左賢王立爲狐鹿姑單于是歲太始元年也初且鞮侯兩子長爲右賢王次爲左大將病且死言立右賢王右賢王未至貴人以爲有病更立左大將爲單于右賢王聞之不敢進左大將使人召右賢王而讓位焉右賢王辭以病左大將不聽謂曰卽不幸死傳之與我右賢王許之遂立爲狐鹿姑單于狐鹿姑單于立以左大將爲右賢王數年病死其子先賢禪不得代更以爲日逐王日逐王者賤于右賢王單于自以其子爲右賢王狐鹿姑單于有異母弟爲左大都督賢國人鄉之母闕氏恐單于不立子而立左大都尉也乃私使殺之左大都尉同母兄死遂不肯復會單于庭又單于病且死謂諸貴人我子少不能治國立弟左



谷蠡王及單于死衛律等與顛渠闕氏謀匿單于死詐橋單于令與貴人軟盟更立子左谷蠡王爲壺衍鞬單于是歲始元二年也壺衍鞬單于立十七年死弟左賢王立爲虛問權渠單于是歲地節三年也虛問權渠單于立九年死顛渠闕氏與其弟右大且渠都隆奇謀立右賢王屠耆堂爲握衍胸鞬單于握衍胸鞬立二歲暴虐殺伐國中不附其明年姑夕劬王與烏禪幕及左地貴人共立稽侯狁爲呼韓邪單于發左地兵四五萬人西擊握衍胸鞬單于兵敗自殺呼韓邪立二十八年建始二年死呼韓邪嬖左伊秩訾兄呼衍王女二人長女顛生二子曰且莫車次曰囊知牙斯少女爲大闕氏生四子長曰雕陶莫臯次曰且糜胥皆長於且莫車二人皆小於囊知牙斯顛渠闕氏貴且莫車愛呼韓邪病且死欲立且莫車其母顛渠闕氏曰匈奴亂十餘年不絕如髮賴蒙漢力故得復安今平定未久人民創艾戰鬪且莫車年少百姓未附恐復危國我與大闕氏一家共子不如立雕陶莫臯大闕氏曰且莫車雖少大臣共持國事今舍貴立賤後世必亂單于卒從顛渠闕氏計立雕陶莫臯約令傳國與弟呼韓邪死雕陶莫臯立爲復索



株若鞮單于復系株立十歲鴻嘉元年死弟且靡胥  
立為搜諧若鞮單于以且莫車為左賢王搜諧立八  
年元延二年死弟且莫車立為車牙若鞮單于車牙  
立四歲綏和元年死弟囊知牙斯立為烏珠留若鞮  
單于烏珠留立二十一歲王莽建國五年死匈奴用  
事大臣右骨都侯須卜當郎王昭君女伊墨居次云  
之婿也云嘗欲與中國和親又素與粟置支侯咸厚  
善見咸前後為莽所拜故遂越輿而立咸為烏累若  
鞮單于烏累單于咸立以弟輿為左谷蠡王烏累若  
鞮單于立五歲天鳳五年死弟左賢王輿立為呼都  
而尸道臯若鞮單于後漢建武二十二年單于輿死  
子左賢王烏達鞮候立為單于後死弟左賢王蒲奴  
立為單于

南匈奴醯落尸逐鞮單于比者呼韓邪單于之孫烏  
珠留若鞮單于之子自呼韓邪後諸子以次立至比  
季父單于輿時比為右蠡鞮日逐王部領南邊及烏  
桓後漢建武二十二年單于輿死比密遣人郭衡奉  
匈奴地二十三年詣西河太守求內附二十四年春  
八部大人共議立比為呼韓邪單于以其大父嘗依  
漢得安故欲襲其號單于比立九年薨弟左賢王莫



立是爲丘浮尤鞮單于莫中元元年立一年薨弟汗  
立是爲伊伐於慮鞮單于汗中元二年立二年薨單  
于比之子適立是爲醯僅尸逐侯鞮單于適永平二  
年立四年薨單于莫子蘇立是爲丘除車林鞮單于  
數日薨單于適之弟長立爲湖邪尸逐侯鞮單于長  
永平六年立二十二年薨單于汗之子宣立是爲伊  
屠於閭鞮單于宣元和二年薨單于長之弟屯屠何  
立是爲休蘭尸逐侯鞮單于屯屠何章和二年立六  
年薨單于宜弟安國立安國初爲左賢王無稱譽是  
以中國盡敬左谷蠡王師子而不附安國立二年爲  
舅骨都侯喜爲等所殺立單于適之子師子是爲亭  
獨尸逐侯鞮單于師子永元六年立四年薨單于長  
之子檀立是爲萬民尸逐鞮單于檀永元十年立二  
十七年薨弟牧立是爲烏稽侯尸逐鞮單于拔延光  
三年立四年薨弟休利立是爲去特若尸逐就單于  
休利永建三年立十三年爲中郎將陳龜逼迫之自  
殺時呼蘭若尸逐就單于兜樓儲先在京師漢安二  
年立之遣行中郎將持節護送單于歸南庭兜樓儲  
立五年薨伊陵尸逐就單于居車兒建和元年立二  
十五年薨子某立是爲屠特若尸逐就單于某熹平



元年立六年薨子呼徵立呼徵光和元年立二年中郎將張脩與單于不相能脩擅斬之更立右賢王羗渠爲單于羗渠光和元年立十年爲國人所殺子右賢王於扶羅立是爲持至尸逐侯單于於扶羅中平五年立七年死弟呼厨泉立建安二十一年來朝魏太祖因留於鄴遣右賢王去卑歸監其國

烏桓後漢靈帝初遼西有丘力居者衆五千餘落自稱王獻帝初平中丘力居死子樓班年小從子蹋頓有武畧代立總攝三王部衆皆從其號令其後上谷王難樓遼東峭王蘇僕延率其部衆奉樓班爲單于鮮卑後漢建武末封大人於仇責爲玉蒲頭爲侯永初中賜大人燕荔陽王印綬不詳其子孫繼襲至桓帝時有檀石槐者勇健有智畧部落推爲大人東西部大人皆歸焉光和帝檀石槐死子和連代立靈帝末年數爲寇鈿攻北地北地庶人善弩射中和連和連即死其子騫曼年小兄子魁頭既立後騫曼長大與魁頭爭國衆遂離散魁頭死弟步度根代立後爲大人軻比能所殺魏文帝封軻比能爲附義王比能死立其弟素利彌加爲歸義王大和二年素利死子小以弟成律歸爲王代攝其衆北突厥者匈奴之別



種後魏時號土門部落魏末有伊利可汗伊利卒弟阿逸可汗立阿逸病且卒捨其子攝圖立其弟俟斤是爲木杆可汗在位二十年卒復捨其子事邏便而立其弟是爲他鉢可汗他鉢以攝圖爲爾伏可汗統其東南又以其弟禱但可汗子爲步難可汗居西方他鉢在位十年病且卒謂其子菴羅曰吾聞親莫過父子吾兄不親其子委位與我我死汝當避大邏便也及他鉢卒國中將立大邏便以其母賤衆不服菴邏母貴突厥素重之攝圖最後至謂國中曰若立菴邏者我當率兄弟以事之如立大邏便我必守境利刃長矛以相待矣攝圖長而且雄國人皆憚莫敢拒者竟立菴邏爲嗣大邏便不得立心不服菴邏每遣人詈辱之菴邏不能制因以國讓攝圖國中相與議曰四可汗之子攝圖最賢因迎立之號伊利俱盧設始波莫荷可汗一號沙鉢略治都斤山菴邏降居獨維水稱第二可汗隋開皇中卒攝圖以其子雍虞閭性悞遣令立其弟葉護處羅侯壅虞閭遣使迎處羅侯將立之處羅侯曰我突厥自木杆可汗以來多以弟代兄以庶奪嫡夫先祖之法不相敬畏汝當嗣位我不憚拜汝也壅虞閭又遣使謂處羅侯曰叔與我



父共根連體我是枝葉寧有我作王令根本反同枝  
葉令叔父之尊下我卑稚又亡父之命其可廢乎願  
叔勿疑相讓者五六處羅侯竟立是爲葉護可汗以  
壅虞間爲葉護遣使上表言狀隋高祖賜之鼓吹幡  
旗後虞羅侯西征阿波中流矢而卒其衆奉壅虞間  
爲主是爲頡伽施多多那都藍可汗都藍開皇末爲  
麾下所殺是時沙鉢于染干號突利可汗尚義成公  
主拜染干爲竟利玠豆啓民可汗華言意智德也於  
朔方築大利城以居之大葉十年啓民朝於東都是  
歲疾終煬帝爲之廢朝三日立其子咄吉世是爲始  
畢可汗唐武德二年卒其子什鉢苾以年幼不堪嗣  
位立爲泥步設使居東徧直幽州之北立其弟俟利  
勿設是爲處羅可汗尚義成公主三年處羅死義成  
公主以其子與射設醜弱廢不立之遂立處羅之弟  
咄苾是爲頡利可汗頡利以始畢之子什鉢苾爲突  
利可汗頡利貞觀四年寇邊爲行軍副總管張寶相  
所擒送於京師突利來奔乃封爲北平王拜順州都  
督遣帥部衆還蕃五年徵入朝至并州道病卒子賀  
邏鶻嗣

西突厥者木杆可汗之子大邏便也與沙鉢畧有隙



因分爲二大邏便爲處羅侯所執其國立鞅素特勒之子是爲泥利可汗泥利率卒子達漫立號泥撥處羅可汗隋大業中從煬帝征高麗賜號爲昌薩那可汗唐武德中來奔爲北突厥使人所殺初薩那之朝隋也國人立薩那之叔父曰射匱可汗射匱卒弟統葉護可汗代立統葉護爲其伯父所殺而自立是爲莫賀咄侯突屈利俟毗可汗俟毗先分統突厥種類爲小可汗及此自稱大可汗國人不附弩失畢部共推泥孰莫賀設爲可汗泥孰不從時統葉護之子啞力特勒亡在康居遂迎立之是爲乙毗沙鉢邏肆葉護

可汗泥孰遂適焉耆肆葉護卒國人迎泥孰於焉耆而立之是爲嚙陸可汗泥孰卒其弟同娥設立是爲沙鉢羅啞利失可汗啞利失爲其統吐屯所襲國人欲立谷設爲乙毗嚙陸可汗啞利失奔鍍汗而死弩失畢部落酋帥迎其弟伽那之子薄布特勒立之是爲乙毗沙鉢邏葉護可汗唐貞觀十五年嚙陸可汗爲部下所廢遣使詣闕請立可汗太宗遣使齎璽書立莫賀乙毗可汗之子是爲乙毗射匱可汗尋爲葉護阿史那賀魯所併顯慶二年旣平賀魯三年詔置崑陵濛池二都督府乃冊阿史那彌射爲興昔可汗



兼崑陵都護阿史那步真爲繼往絕可汗兼蒙池都護乾封二年二可汗旣死餘衆附于吐蕃調露元年以碎葉龜茲于闐疏勒爲四鎮垂拱元年以步真子左王鈐衛將軍阿史元慶襲其父興昔亡可汗二年以彌射子右王鈐衛將軍阿史那斛瑟羅繼父往絕可汗聖曆中突騎施首領盟祿州都督烏質勒移衙於碎葉則天授以瑤池都督神龍中烏質勒死子婆葛代立仍封金河郡王俄爲默啜所殺其部將蘇祿鳩聚衆至二十萬自立爲可汗開元十三年詔册蘇祿爲忠順可汗二十六年爲莫賀咄達于所殺其別部都摩友立蘇祿之子吐火仙爲可汗二十九年以斛瑟羅之孫懷道之子昕爲可汗遣之天寶元年昕至碎葉西南俱蘭城爲莫賀咄所殺詔立其酋長爲伊地米里骨咄祿毗伽可汗十三年又別册黑姓種伊羅密施爲骨咄祿毗伽突騎施可汗自至德年後部落衰弱分爲二部各立可汗旋又篡奪因而分散鐵勒木匈奴別種隋初屬西突厥大業中部分人共推契苾哥楞爲易胡貞莫賀可汗又以薛延陀乙失鉢爲也啞小可汗其後西突厥匱可汗強盛延陀契苾二部並去可汗之號以臣之唐貞觀二年乙失鉢之



孫夷男帥其屬攻頡利可汗大破之頡利北諸姓多  
叛頡利歸于夷南共推爲主太宗拜夷男爲貞珠毗  
伽可汗夷男卒少子肆葉護襲位是爲頡利俱利薛  
婆多彌可汗其下不附太宗使江夏王道宗討平之  
列爲州縣其後薛延陁西道之衆共推夷男子咄摩  
友爲伊特勿失可汗二十二年契苾迴紇等十餘部  
落歸國太宗因其土地置爲州府拜其酋長爲都督  
刺史

迴紇本匈奴之裔唐初有時健候斤死子菩薩部落  
以爲賢而立之貞觀二十年太宗以其部爲瀚海府  
拜其侯利發吐迷度爲都督時吐迷度已自稱可汗  
二十二年吐迷度爲其姪烏紇所殺其子婆閏立顯  
慶中累加左衛大將軍兼瀚海都督龍朔中婆閏死  
姪北粟毒王領迴紇永隆中獨解支證聖中伏帝匈  
開元中承宗伏帝難皆繼爲酋長皆受都督號以統  
蕃州天寶初其酋長葉護頡利吐發遣使入朝封奉  
義王三載擊破拔悉密自稱骨咄祿毗伽闕可汗五  
載又遣使入朝因冊爲懷仁可汗六載卒子磨延啜  
立國人號爲葛勒可汗乾元三年葛勒卒長子葉護  
先被殺乃立其少子移地健是爲登里可汗寶應二



手冊爲登里頡咄登密施舍俱錄英義建功毗伽可汗大曆十四年爲其相頓莫賀所殺頓莫賀自立號爲合骨咄祿毗伽可汗貞元四年冊爲天親可汗五年改統爲鶻從其請也是年天親可汗卒子多邏斯立國人謂之判官持勒詔冊爲登里邏沒密施俱錄忠貞毗伽可汗六年四月忠貞可汗爲其次相所殺立其子阿啜爲可汗七年詔冊爲奉誠可汗十年奉誠可汗卒無子國人立其相骨咄祿將軍詔冊爲滕里邏羽祿沒密施合胡祿骨咄毗伽懷信可汗骨咄祿將軍本姓跋跌少孤爲迴鶻大首領所養奉誠旣無嗣國人因奉爲王永貞元年懷信可汗卒詔冊其王爲愛登里邏泊德沒施俱錄毗伽可汗六年卒七年詔冊其王爲君登里邏骨德密施合毗伽可汗十一年卒詔冊其王爲愛登里邏汨沒密施合毗伽保義可汗長慶元年卒詔冊其王爲君登里邏羽祿密施合勾主祿毗伽可汗三年卒其從父弟曷薩可汗立詔冊爲君登里邏汨沒密施合毗伽可汗太和六年爲其下所殺其從子胡特勒立詔冊爲可汗開成四年自殺國人立勿篤公爲罽嶼可汗會昌初其國爲黠戛斯所侵餘衆奔歸吐蕃處其州之地後唐同



光二年其國權知可汗仁美遣使貢方物莊宗用仁美爲英義可汗其年仁美卒其弟狄銀卒阿咄欲立並遣使朝貢天成三年其國權知可汗仁裕遣使入貢明宗册仁裕爲順化可汗晉天福四年册爲奉化可汗

契丹其君長姓大賀氏唐貞觀二十二年蕃長窟哥內屬授松漠都督封無極縣男賜姓李氏其曾孫楷莫離則天時封歸順郡王萬歲通天中窟哥之裔李盡忠爲松漠都督盡忠死開元三年封其從父弟失活爲松漠郡王六年失活死從父弟娑固代統其衆

遣使册立仍令襲其兄官爵娑固爲其下所殺立其從父弟鬱干爲主玄宗乃令立册鬱干令襲娑固官爵十一年鬱干死弟吐干代統其衆襲兄官爵吐干與大臣可突干相猜來奔可突干立盡忠弟邵固爲主改封廣德郡王十八年可突干殺邵固降于突厥二十三年契丹衙官李過折殺可突干傳首東都詔封過折爲北平郡王其年過折爲可突干餘黨泥禮所殺會昌二年新立王名屈戌咸通未其王曰習爾之光啓中其王曰欽德有別部酋長阿保機自稱國王後唐天祐末僭稱皇帝天成元年阿保機卒僞謚



曰大聖皇帝保機凡三子長曰人皇王突欲即東丹王也次曰元帥太子即德光也幼曰安端少君其母述律氏令德光權王牙帳令安端少君往渤海國代突欲將立為嗣而德光素為部族所伏又其母亦嘗鍾愛故因而立之漢高祖即位初德光卒東丹王突欲子凡欲立為天授皇帝周太祖廣順元年九月偉王子太寧王與燕王耶律述乾殺凡欲并其妻於帳下時德光子述律王子討太寧之亂諸部首領其推為國主偽號天順皇帝

奚本匈奴之別種唐貞觀末酋長可度者內屬太宗置饒樂府以可度者為都督封樓煩縣公賜姓李氏開元三年封其首領李大酺為饒樂郡王八年大酺率兵救契丹戰死其弟魯蘇嗣立十年詔令襲其兄官爵十四年改封奉誠二十八年為契丹衙官可突于所脅走投榆關二十年酋長李詩以其部落五千帳來降封詩為歸義王充歸義州都督天寶五載又封其王娑固為昭信王仍授饒樂府都督元和元年其王梅落來朝二年以奚首領索低為檀薊兩州游奕兵馬使天祐初首領曰去諸去諸卒子掃刺代立後唐莊宗破幽州賜掃刺姓名李紹威天成四年卒



子素姑代立清泰三年其首領達刺干遣通事介老奏其王素姑謀叛欲附契丹已處置訖見權知部落黑水靺漢武帝三年其部酋長突地稽遣使朝貢以其部置燕州拜突地稽爲總管貞觀初有功賜姓李氏封耆國公突地稽卒子謹行嗣封燕國公

渤海靺鞨唐聖曆中高麗別種大祚榮自立爲振國王先天二年冊拜渤海郡王仍以其所統爲忽汗州加授忽汗州都督開元七年祚榮卒玄宗遣使冊立其嫡子桂婁郡王大武藝襲父爲左驍衛大將軍渤海王忽汗州都督九姓燕然都督二十五年武藝病死其子欽茂嗣立詔襲其父官爵寶應元年進封國王欽茂卒其子嵩璘嗣貞元十一年二月令內嘗侍殷志瞻將冊書冊爲渤海王忽汗州都督元和四年嵩璘卒子元瑜嗣元瑜卒弟言義權知國務八年正月封言義爲國王十三年遣使告哀詔以知國務大仁秀爲國王太和五年仁秀卒以權知國務大彝震國王梁開平元年其王曰大誼讓



冊府元龜

巡按福建監察御史臣李嗣京 訂正

知閩縣事 臣曹鼎臣 叅閱

知建陽縣事 臣黃國琦 較釋

外臣部 十三

朝貢第一

周制九州之外謂之蕃國世壹見各以其所貴寶爲  
贄蓋古之聖王文德光被乃有占風望氣浮琛沒羽  
而至者繇漢以來濟以威信命單車以通絕域置都  
護以總北道繇是魚龍雀馬之殊玩犀甲珠翠之名



寶寶帙火毳之異品夷歌巴舞之奇技莫不充於內  
府而陳于外庭矣魏晉之後或朝或絕策書所記昭  
然可見若乃殊隣絕壤蹈德詠仁祇奉國琛賓于宰  
旅先王所以賜異姓之國分伯叔之邦時庸展親謹  
其述職唯服食器用之是供也至於給耳目之華侈  
違生物之性習必斥之而不御却之而不受慮嗜好  
之無極懼德志之或喪美哉旅獒之篇召公之訓詳  
矣要荒之外羈縻不絕織皮崑崙大禹以之卽叙越  
裳重譯姬文形於德讓亦以其忽畧無嘗非上威服  
而來其貢物故肅慎之不貢楛矢亦嘗致詰焉

夏后卽位七年手夷來賓

少康卽位三年方夷來賓

周武王克商西旅獻獒太保作旅獒以誠王自是通  
道九夷百蠻使各以其方賄來貢使無忘職業於是  
肅慎貢楛矢石弩長尺有咫

后芒卽位三年九夷來御

周公居攝六年制禮作樂天下和平交趾之南有越  
裳國以三象重譯而獻白雉曰道路悠遠山川阻深  
音使不通故重譯而朝成王以歸周公曰德不加  
焉則君子不饗其質化不施焉則君子不臣其人吾



何以獲此賜也其使請曰吾受命吾國之黃耆日久矣天下之無烈風雷雨意者中國有聖人乎則盍往朝之周公乃歸之於王稱先王之神致以薦於宗廟周德既衰於是稍絕

成王既伐東夷肅慎來朝

宣王時追魏之國來貢故韓奕之詩曰獻其貔皮赤豹黃羆

漢文帝元年使陸賈賜南粵王佗書賈至南粵佗恐乃頓首謝願奉明詔長爲藩臣奉職貢謹北面因使者獻白璧一雙翠鳥千犀角十紫貝五百桂蠹一器生翠四十隻孔雀二雙昧死再拜以聞皇帝陛下

武帝始遣使至安息國其國因發使隨漢使者來觀漢地以大鳥及印黎軒眩人獻於天子大說又帝令張騫使烏孫騫既致賜諭指曰烏孫能東居故地則漢遣公主爲夫人結爲昆弟共拒匈奴不足破也烏孫遠漢未知其大小又近匈奴服屬日久其大臣皆不欲徙昆莫年老國分不能專制乃發使送騫因獻馬數十匹報謝其使見漢人衆富後歸其國其國後乃益重漢

元狩二年南越獻馴象能言鳥



天漢元年正月匈奴歸漢使者使使來獻

二年秋渠黎六國使使貢獻

宣帝神爵二年匈奴掘行胸鞮單于立復脩和親遣

弟伊酋若王勝之八漢獻見

四年五月匈奴單于遣弟呼番若王勝之來朝

甘露九年冬匈奴單于遣弟左賢王朝賀

三年匈奴郅支單于亦遣使奉獻漢遇之甚厚

四年匈奴呼韓邪郅支兩單于俱遣使朝獻漢待呼

韓邪使有加

成帝河平元年單于遣右臯林王伊邪莫演等奉獻

朝正月

平帝元始元年春正月越裳氏重譯獻白雉一黑雉

二詔使二公以薦宗廟

二年日南之黃友國來獻犀牛

後漢光武初公孫述據益州夜郎大姓龍傳尹董氏

保境爲漢乃遣從番禺江奉貢帝嘉之並加褒賞

建武六年匈奴遣使來獻使中郎將報命

八年十二月高句麗王遣使奉貢

十三年九月日南徼外蠻夷獻白雉兔

十四年莎車國王賢與鄯善王安並遣使詣闕貢獻



於是西域始通葱嶺以東諸國皆屬賢

是年匈奴遣使奉獻使中郎將報命

十七年十二月莎車國遣使貢獻

二十年韓人廉斯人蘇馬鞞等詣樂浪貢獻

二十五年南匈奴單于復遣使詣闕奉藩稱臣獻國

珍寶求使者監護遣侍子修舊約

是歲夫餘王遣使貢獻遼西烏桓大人赦旦等九百

二十二人卒衆向化詣闕朝貢獻奴婢牛馬及弓虎

豹貂

三十年鮮卑大人於仇賁率衆人詣闕朝貢

三十一年北匈奴遣使奉獻

中元二年東夷倭奴國王遣使奉獻使人自稱大夫

倭國之極南界也

明帝永平十七年西南夷哀牢僇耳僂僂槃木白狼

動黏諸種前後慕義貢獻

章帝元和元年正月日南徼外蠻夷窋不事人邑蒙

獻生犀白雉

章和元年月氏國遣使獻扶拔獅子

和帝以章和二年二月卽位十月安息國遣使獻獅

子扶拔



永平元年北單于弟右温禺鞞王奉奏貢獻

六年正月永昌徼外夷敦忍乙王莫延慕義遣使譯  
獻犀牛大象

九年正月永昌徼外蠻及揮國王壅繇調遣重譯奏  
國珍寶

十年十二月燒當羌豪迷唐等率種人詣闕貢獻

十三年十一月安息國王滿屈遣使獻獅子及條枝  
大爵時謂之安息爵

十六年十一月北匈奴遣使稱臣貢獻

煬帝以元興元年十二月卽位是月北匈奴遣使稱  
臣詣燉煌奉獻

安帝永初元年三月永昌徼外僬僇夷貢獻內屬  
十月倭國王師升等遣使奉獻口百六十願請見

三年正月高句麗遣使貢獻

元初二年正月蜀郡青衣道夷奉獻內屬

永寧元年十二月永昌徼外遣使朝獻

是月揮國王壅繇調復遣使者詣闕朝賀獻樂及幻  
人

是歲夫餘王遣子詣闕奉獻

延光元年二月夫餘王遣使貢獻



十二年九真徼外蠻夷貢獻內屬

三年七月日南徼外蠻夷帥詣闕貢獻

順帝永建二年三月疏勒國臣盤遣使奉獻

六月西域長史班勇燉煌太守張郎討焉耆尉黎危

須三國破之並子貢獻

四年拘彌國遣使貢獻

五年正月疏勒王侍子及大宛莎車王皆奉使貢獻

六年二月于闐王遣侍子貢獻

十二月日南徼外葉護國揮國遣使貢獻

是月于闐王遣侍子詣闕貢獻

陽嘉二年六月疏勒國獻獅子封牛

漢安二年二月鄯善國遣使貢獻

桓帝延嘉二年天竺國王獻其國和帝時數遣使貢

獻後西域反叛乃絕至是從日南至徼外來獻

九年九月大秦國王遣使奉獻漢世唯一通焉

四年十月天竺國十二月夫餘王並遣使來獻

靈帝建寧九年燒當羌奉使貢獻

熹平二年十二月日南徼外國重譯貢獻

三年正月夫餘國遣使貢獻

光和六年正月日南徼外國重譯貢獻



獻帝建安七年于闐國獻馴象

延康元年濊貊扶餘單于焉耆于闐王各遣使貢獻

魏文帝黃初元年鮮卑步度根遣使獻馬

三年二月鄯善龜茲于闐王各遣使奉獻

五年鮮卑步度根詣闕貢獻厚加賞賜是後一心守

邊不為寇害

明帝太和三年十二月大月氏王波調遣使奉貢

五年四月鮮卑附義王軻比能卒其種人及丁零大

人而禪詣幽州貢名馬

青龍四年五月肅慎氏貢楛矢

黃初元年七月遣幽州刺史毋丘儉率家軍討遼東

右北平烏丸單于寇婁敷遣弟阿羅獎等詣闕朝貢

二年六月倭女王遣大夫難升米等詣郡求謁天子

朝獻太守劉夏遣使送詣京都

三年二月西域重譯獻火浣布詔大將軍太尉臨試

以示百寮

齊王正始元年春東倭重譯納貢焉耆危須諸國弱

水南鮮卑各王皆遣使來獻

四年十二月倭國女王婢彌呼遣使大夫伊聲耆掖

邪狗等八人上獻生口倭錦絳青縑絲衣帛布丹木



附短弓矢

八年倭國女王一與遣大夫掖邪狗等詣臺獻一男  
女生口三十人貢白珠五千枚青大句珠二枚異文  
雜錦二十四匹

陳留王景元二年七月樂浪外夷韓濊貂各率其屬  
來朝貢

三年四月遼東郡言肅慎國遣使重譯入貢獻其國  
弓三十張長五尺五寸楛矢長一尺八寸石弩三百  
枚皮骨鐵雜鎧二十領貂皮四百枚

吳孫權赤烏六年十二月扶南王范族遣使獻樂人  
及方物

晉武帝泰始元年倭人國女王遣使重譯朝獻扶南  
國亦遣使朝貢

二年十一月倭人來獻方物

三年裨離國遣小部獻其方物康居國王那鼻遣使  
上封事并獻善馬

四年扶南國遣使來獻林邑國王胡達上疏貢金盤  
椀及金鉦等物

六年九月大宛獻汗血馬焉耆來貢方物

咸寧元年六月鮮卑力微遣子來獻



五年十二月肅慎來獻楛矢石砮

太康元年辰韓王遣使獻方物是年東夷二十國朝獻

二年三月東夷辰韓等五國朝獻

三年九月東夷二十九國歸化獻其方物

五年十二月林邑大秦國各遣使來獻

六年四月扶南等十國來獻

七年扶南等二十一國馬韓等十一國使人來獻

八年南夷扶南西域康居國各遣使來獻

十年東夷絕遠三十餘國西南夷二十餘國各遣使

來獻

太熙元年東夷七國朝貢十年辰韓詣東夷較尉何

龕上獻

元帝大興二年八月肅慎獻楛矢石砮

成帝時肅慎國遣使來獻

肅慎有石砮皮骨之甲楛弓三尺五寸楛矢長尺有

咫其國東北有山出石其利入鐵將取之必先祈神周武王時獻其楛矢石砮逮于周公輔成王復遣使入賀爾時千餘年雖秦漢之盛莫之致也及文帝作相魏景元末來貢楛矢石砮等人帝召歸于相府賜其王僭奚錦罽綿至武帝元康初復來貢獻元帝中興又詣江左貢其石砮

咸康二年高句驪遣使貢方物

六年十月林邑獻馴象



康帝建元元年高句驪遣使朝獻

後秦姚萇時二城故曹寅王達獻馬三千疋

前涼張重華時龜茲國遣使貢方物

南燕慕容盛長樂中高句麗王安遣使貢方物

北燕馮跋時蠕大但遣使獻馬三千疋羊萬口

宋高祖永初二年林邑王范陽邁遣使貢獻

少帝景平元年三月高麗國遣使朝貢

二年高麗國遣使貢獻

文帝元嘉五年天竺迦毘黎國王月受遣使奉表獻

金剛指環摩勒金環諸寶物赤白鸚鵡各一

六年七月百濟王西河王河南國遣使獻方物

七年倭國王訶羅他國林邑國獅子國遣使獻方物

是歲訶羅單國遣使獻金剛指環赤鸚鵡烏天竺國

白氍古貝葉婆國古貝等物其表語畧同佛經

九年河南王西河王並遣使獻方物

十年林邑王閻波洲訶羅單國並遣使獻方物

十一年林邑國扶南國訶羅單國並遣使獻方物

十二年師子國扶南國訶羅單國並遣使獻方物是

年闍婆鈔達國國王師梨婆達訶陀羅跋摩遣使奉

表曰宋國大主大吉天子足下教化一切種智安穩



天人師降伏四魔咸等正覺轉尊法輪度脫衆生我雖在遠亦霑靈潤

十三年高麗國武都王遣使獻方物

十四年河南王西河王訶羅單國並遣使獻方物

十五年武都王河南國高麗國倭國扶南國林邑國

並遣使獻方物

十六年武都王河南王林邑國高麗國並遣使獻方

物

十七年武都王河南王百濟國遣使獻方物

十八年肅特國高麗蘇摩梨國林邑國並遣使獻方

物是歲斤陀利國王釋婆羅那遣長史竺留陀及多

獻金銀寶器

十九年婆皇國芮芮國並遣使獻方物

二十年河西國高麗國百濟國倭國並遣使獻方物

二十六年婆皇國婆達國並遣使獻方物

二十七年百濟國遣使獻方物

二十八年婆皇國河南王高麗國婆達國並遣使獻

方物

二十九年訶羅單國遣使獻方物

孝武帝孝建二年繁繁國斤陀利國高麗國婆皇國



河南國遣使獻方物

大明二年河南王高麗國林邑國並遣使獻方物

三年婆皇國高麗國並遣使獻方物肅慎國重譯獻

楛矢石砮西域獻舞馬

四年宕昌王倭國並遣使獻方物

五年河南王遣使獻方物

六年高麗國遣使獻方物

七年芮芮國百濟國並遣使獻方物

八年婆皇國遣使貢獻

明帝泰始二年天竺迦昆黎國遣使貢獻

泰豫元年林邑國遣使獻方物

後廢帝元徽元年河南王婆黎王並遣使獻方物

二年芮芮國遣使獻方物

三年河南王高麗國並遣使獻方物

順帝昇明元年倭國遣使獻方物

二年倭國高麗國芮芮國並遣使獻方物

南齊太祖建元元年五月河南王吐谷渾拾寅迦羅

國王荷知並遣使貢獻

二年三月百濟王牟都遣使貢獻九月蠕蠕遣使朝

貢



三年十二月高麗王樂浪公高璉遣使貢獻

武帝永明二年八月扶南王儁陳如闍邪跋摩奉啓  
曰天竺道人釋那迦仙從中國來此仰序陛下聖德  
仁治詳議風化佛法興顯衆化殷集法事日盛王威  
嚴整朝望國範慈愍蒼生八方六合莫不歸伏如聽  
其所說則化隣諸天非可爲喻臣聞之下情踊悅若  
覓奉見尊足仰慕慈恩澤流小國天垂所載率土之  
民並得皆蒙恩祐具以臣今遣此道人釋那伽仙爲  
使上表問訊奉貢微獻呈臣等赤心弁別陳下情但  
所獻輕陋愧懼唯深伏願天慈曲炤鑒其丹誠賜不  
垂責今獻金鏤龍王坐像一軀白檀像一軀牙像一  
軀牙塔二軀古貝二雙瑠璃蘇鉢二口礪瑁檳榔梓  
一枚弁獻頌章

九年五月林邑國遣使獻金篋

明帝建武三年高麗王樂浪公遣使貢獻

梁高祖天建元年八月林邑國遣使獻方物是年于  
陀利國天王瞿曇脩跋陀羅以四月八日夢見一僧  
謂之曰中國今有聖主十年之後佛法大興汝若遣  
使貢奉敬禮則土地豐樂商旅百倍若不信我則境  
土不得自安修陀羅王未能信旣而夢此僧曰汝若



不信我當與汝往觀之乃於夢中來至中國拜觀天子既覺心異之陀羅本工畫乃寫夢中所見高祖容質飭丹青仍遣使并畫工奉表獻玉盤等物

二年七月龜茲國遣使獻方物扶南王遣使送珊瑚佛像并獻方物天竺國王屈多遣長史竺羅達奉表曰伏聞彼國據江傍海山川周固衆妙悉備莊嚴國土猶如化成宮殿莊飭街巷平坦人民克滿歡娛安樂王出遊四兵隨從聖明仁愛不害衆生國中臣民循行正法大王仁聖化之以道慈悲羣生無所遣却嘗脩淨戒式導不及無上法船沉溺以濟百姓氓庶

受樂無忘諸天護持萬神侍從天魔降服莫不歸仰至身端嚴如日初出仁澤普潤猶如大雲於彼震旦最爲殊勝臣之所任國王首羅天守護令國安樂王王相承未曾斷絕國中皆七寶形像衆妙莊嚴臣自循簡如化王法臣名屈多奕世王種惟願大王聖體如平今以此國羣臣民庶山川珍重一切歸屬五體投地歸誠大王使人竺達多繇來忠信是故今遣大王若有所須珍奇異物悉當奉送此之境土便是大王之國王之法令善道悉當承用願二國信使往來不絕此信返還願賜一使具宣聖命備悉勅宜款至



之誠望不空返所自如允賜加采納今奉獻璃瓠唾壺雜香古貝等物

三年九月北天竺國遣使奉獻方物

四年四月宕昌國王梁彌博獻甘草當歸

五年七月鄧至國王象舒彭遣使獻黃耆四百斤馬四匹

九年四月林邑國遣使獻白猴一

是年于闐國遣使獻方物

十年十二月宕昌國遣使獻方物

是歲扶南王遣使貢獻

十一年三月高句麗四月百濟扶南林邑國六月宕昌國並遣使獻方物

十三年四月林邑國八月扶南國並遣使獻方物于闐國獻波羅婆步障

是年河南國王遣使獻金裝馬璫鐘二口又表于益州立九層佛寺詔許之

十四年四月芮芮國遣使獻方物

九月狼牙脩國王婆伽達多遣使阿撒多奉表曰大吉天子足下離淫怒癡哀愍衆生慈心無量端嚴相好身光明朗如水中月普炤十方眉間白豪其自如



雪其色炤曜亦如月光諸天善神之所供養以垂正法寶焚行衆生莊嚴都邑城閣高峻如乾陀山樓觀羅列道途平正人民熾盛快樂安穩著種種衣猶如天服於一切國爲極尊勝天主愍念羣生人民安樂慈心深廣律儀清淨正法化治供養三寶名稱宣揚布滿世界百姓樂見如月初生譬如梵王世界之主

人天一切莫不歸依敬禮大吉天子足下猶如現前忝承先業慶嘉無量今遣使問訊大意欲自往復畏大海風波不達今奉薄獻願大家曲垂納領

十五年四月高麗國八月芮芮國並遣使獻方物河南國遣使獻赤舞龍駒

其年滑國王厭帶夷栗陀始始遣使獻方物

十六年三月河南王八月扶南王遣使獻方物

是月婆利國遣使奉表曰伏承聖王信重三寶興立塔寺較飭莊嚴周遍國土四衢平坦清淨無穢臺殿羅列狀若天宮壯麗微妙世無與等聖王出時四兵具足羽儀導從布滿左右都人士女麗服光飾市廛豐富充積寶珍王法清整無相侵奪學徒皆至三乘競集敷說正法雲布雨潤四海流通交會萬國長江渺漫清冷深廣有生成資莫能消滅陰陽和暢災厲



不作大梁揚都聖王無等臨覆上國有大慈悲子育  
萬民平等忍辱怨親無二加以周窮無所藏積靡不  
炤燭如日之明無不受樂猶如淨月宰輔賢良羣臣  
貞信盡忠奉上心無異想伏惟皇帝是我貞臣是婆  
利國主今敬稽首禮聖王足下惟願大王知我此心  
此心久矣非適今也山海阻遠無緣自達故遣使奉  
金席等表此丹誠

十七年五月于阗利國鉢邪跋摩遣長史毘員跋摩  
奉表曰嘗勝天子陛下諸佛世尊嘗樂安樂六通三  
達爲世間尊是名如來應供正覺遺形舍利造諸塔

像莊嚴國土如須彌山邑居聚落次第羅滿城郭館  
宇如忉利天宮具足四兵能伏怒敵國土安樂無諸  
患難人民和善受化正法慶無不通猶雷處山流注  
雪水八味清淨百川洋溢周迴屈曲趨大海一切衆  
生咸得受用於諸國土殊勝第一是名震旦大梁楊  
都天子仁蔭四海德合天心雖人是天降生護世功  
德寶藏救世大悲爲我尊主威儀具足是故至誠敬  
禮天子足下稽首問訊奉獻金芙蓉雜香藥等願垂  
納受

十八年七月于闐國獻瑠璃鬘



普通元年正月扶南高麗國各遣使朝貢

三月滑國王厭帶夷栗陀始遣使獻黃獅子白貂裘波斯錦等物周古柯國滑旁小國也使使隨滑來獻方物呵跋檀國亦滑旁小國也使使隨滑來獻方物胡密丹國亦滑旁小國也使使隨滑使求獻方物四月河南王遣使獻方物

是年于阗利國復遣使獻方物

三年十一月百濟國遣使朝貢

三年八月婆利國白題國各遣使獻方物

是年婆利國王頻伽遣使珠具智獻白鸚鵡青龜兜

佛字本補

鑿瑠璃器吉貝螺杯雜香藥等數十種

四年十二月狼牙脩國遣使獻方物

五年末國主安未深盤遣使來貢獻

七年正月滑國二月河南王三月高麗國六月林邑並遣使獻方物

大通元年三月林邑國獅子國十一月高麗國王並遣使獻方物

是年盤盤國王使使奉表曰揚州闡浮提震旦天子萬善莊嚴一切恭敬猶如天淨無雲明耀滿月天子身心清淨亦復如是道俗濟濟並蒙聖王先化濟度



一切永作舟航要聞之慶善我等至誠敬禮聖天子  
足下稽首問訊今奉薄獻願垂哀受

二年正月芮芮國並遣使獻方物

中大通元年二月芮芮國遣使獻方物

十二月盤盤國遣使獻牙像及埴并獻沉檀等香數  
十種

二年六月林邑國扶南國並獻方物

三年六月丹丹國遣使奉表曰伏惟聖王至德仁治

信重三寶佛法興顯眾僧殷集法事日盛威容嚴整

朝望國軌慈愍蒼生八方六合莫不歸服化鄰諸天

非可言喻不任慶善若暨奉見尊足謹奉送牙像及

捨各二軀并獻火齊珠古貝雜香藥等

九月狼牙脩國奉表獻方物

四年四月盤盤國十一月高麗國並遣使獻方物

五年正月河南國七月波斯國九月盤盤國並遣使

獻方物

六年三月百濟國七月林邑國並遣使獻方物

八年盤盤國復使送菩提國真舍利及畫埴并獻菩

提樹葉詹糖等香

大同元年三月高麗國滑國薩丹國各遣使獻方物



丹丹國遣使獻金銀瑠璃離寶香藥等物

四月波斯國七月扶南國並遣使獻方物

四年三月河南國芮芮國並遣使獻方物

五年八月扶南國遣使獻生犀及方物

六年五月河南王遣使獻馬及方物

八年八月盤盤國遣使獻方物

是年林邑國遣使獻方物

七年三月高麗國百濟滑國九月芮芮國遣使獻方物

是年子闐國獻外國刻玉佛

中大同元年八月竭盤陀國遣使獻方物

簡文太清三年十月百濟國遣使朝貢

太寶二年八月盤盤國獻馴象



册府元龜

册府元龜

巡按福建監察御史臣李嗣京 訂正

知甌寧縣事臣孫以敬參閱

知建陽縣事臣黃國琦較釋

外臣部

朝貢第二

陳高祖永定三年五月扶風國遣使獻方物

文帝天嘉二年十一月高麗國遣使獻方物

四年正月于阗利國遣使獻方物

廢帝天康元年十二月高麗國獻方物



光大元年十月百濟國遣使獻方物

二年六月新羅國九月林邑國狼牙脩國並遣使獻方物

宣帝太建二年六月新羅國十一月高麗國並遣使獻方物

三年五月遼東新羅丹丹天竺盤盤等國十月丹丹國並遣使獻方物

四年三月扶南林邑國並遣使獻方物

六年正月高麗國遣使獻方物

九年七月百濟國遣使獻方物

十年七月新羅國遣使獻方物

十三年十月丹丹國遣使獻方物

後主至德元年十二月頭和國遣使獻方物

二年十一月盤盤國百濟國並遣使獻方物

三年十月丹丹國十二月高麗國並遣使獻方物

四年九月百濟國遣使獻方物

禎明二年六月扶南國遣使獻方物

後魏道武天興二年十二月禿髮鹿孤遣使朝貢

五年十二月禿髮儁檀遣使朝貢

明元永興五年正月頗拔大渠餘人詣闕奉貢賜以



繒帛錦蜀各有差

秦嘗八年四月車駕南巡至雒陽觀石經蠻王梅安率渠師數千人來貢方物

太武神廡元年四月氐南秦王楊玄遣使朝貢

四年潤六月蠕蠕國遣使朝獻

延和元年十月吐谷渾慕瓚遣使朝貢

三年二月蠕蠕吳提遣其異母兄秃鹿傀及左右數百人朝貢獻馬二千匹

十月蠕蠕國遣使朝貢

太延元年二月蠕蠕焉耆車師諸國六月高麗鄒善

國並遣使朝貢

八月粟特國遣使朝貢

二年八月東北高車國遣使朝貢

三年二月高之契丹三月龜茲悅般焉耆車師粟特疏勒烏孫渴槃陀鄒善諸國各遣使朝獻

十一月破維那者舌國遣使朝獻奉汗血馬

四年三月鄒善王弟素延耆來朝

五年四月鄒善龜茲疏勒焉耆諸國遣使朝獻

五年遮逸國獻汗血馬

十一月高麗及粟特渴槃陀破那悉牢居國各遣使



朝貢

太平真君十一年十一月頗看國獻獅子一

文成興安元年十二月保達沙獵國各遣使朝獻

二年三月疏勒國八月渴盤國十二月庫莫奚契丹

新賓等十餘國各遣使朝貢

興光元年九月庫莫奚國獻名馬一匹角狀如麟

十二月出于叱萬單國各遣使朝貢獻

太安元年六月遮逸國十月波斯疏勒國並遣使朝

貢

二年十一月嚙達普嵐國並遣使朝獻

三月正年粟特于闐國十二月于闐扶餘等五十餘國各遣使朝貢

五年五月居嘗國遣使朝獻

和平元年十月居嘗王獻馴象一

二年八月波斯國遣使朝獻

三年三月高麗薩王契嚙思厭於疏勒石那悉居半

渴盤陁諸國各遣使朝獻

五年十二月吐呼羅國遣使朝獻

六年二月高麗蕤王對曼諸國各遣使朝獻

四月破維那國獻汗血馬普嵐國獻寶劍



獻文天安元年三月高麗波斯于闐阿襲諸國十月曹利彤曷國各遣使朝貢

皇興元年二月高麗于闐庫莫奚具伏弗郁羽陵日連匹黎于闐諸國九月高麗于闐普嵐粟特國各遣使朝獻

二年四月高麗庫莫奚契丹具伏弗郁羽陵日連延尔黎比六手悉萬丹阿大阿羽真侯于闐波斯等國十二月悉萬丹等十餘國各遣使朝貢

三年二月蠕蠕高麗庫莫奚契丹國七月蠕蠕國並遣使朝貢

四年二月高麗庫莫奚契丹各遣使朝貢  
孝文延興二年七月高麗國八月地豆于庫莫奚國並遣使朝貢昌亭國遣使貢獻蜀馬

三年二月高麗契丹國四月契丹八月高麗庫莫奚國九月庫莫奚國悉萬斤國十月悉萬斤國並遣使朝獻

四年正月粟特國遣使朝獻

二月吐谷渾拾寅遣子費斗斤入侍并獻方物

三月高麗吐谷渾曹利國五月蠕蠕國六月濶悉國七月高麗國八月吐谷渾國九月契丹庫莫奚地豆



千十一月吐谷渾國並遣使朝獻

五年二月高麗國遣使朝獻

閏二月吐谷渾國四月龜茲國並遣使朝獻

五月契丹庫奚國各遣使獻名馬

八月高麗吐谷渾地豆干諸國十月蠕蠕國並遣使朝獻勿吉國遣使朝獻

承明元年春二月蠕蠕高麗庫莫奚波斯諸國五月

蠕蠕國七月高麗庫奚八月蠕蠕國九月高麗庫莫

奚契丹宕昌悉萬斤十一月蠕蠕國並遣使朝獻

太和元年二月高麗契丹庫莫奚國三月庫莫奚契

丹國並遣使朝獻

四月蠕蠕國再遣使朝貢

九月蠕蠕車多羅高麗西天竺舍衛十月庫莫奚疊

伏羅龜茲諸國各遣使朝貢契丹國並遣使朝貢

十一月吐谷渾國粟提婆國十二月負濶吐谷渾國

並遣使朝貢

二年正月吐谷渾遣子朝獻

二月蠕蠕國遣使朝獻

七月龜茲國遣使獻名馳七十頭

八月勿吉國遣使朝獻



九月龜茲國遣使獻犬馬名馳珠寶甚衆

三年三月吐谷渾高麗國四月蠕蠕國並遣使朝獻  
吐谷渾國遣使獻獐牛五十頭

九月高麗吐谷渾國地豆于契丹庫莫奚龜茲諸國  
各遣使朝獻

十二月粟特州逸河龔疊伏羅負濶悉萬斤諸國各  
遣使朝貢

四年三月蠕蠕國七月悉萬斤國並遣使朝貢

五年五月鄧至國十月蠕蠕國並遣使朝貢

六年二月地豆于國六月蠕蠕國十一月吐谷渾國

並遣使朝貢

八年二月蠕蠕國十月高麗國遣使朝貢

九年三月宕昌國五月高麗國十月高麗吐谷渾國

十二月宕昌國高麗吐谷渾國等並遣使朝貢

十年三月蠕蠕國四月高麗吐谷渾國十二月勿吉

國並遣使朝貢

十一年四月吐谷渾國五月高麗吐谷渾國八月悉

萬斤國並遣使朝獻

十二年二月高麗國三月宕昌國四月高麗吐谷渾

國六月宕昌國並遣使朝貢



八月勿吉國貢楛矢石弩

九月吐谷渾宕昌國並再遣使朝貢

閏九月高麗國遣使朝貢

十三年二月高麗國三月吐谷渾國六月高麗國七

月陰平國八月中尺國九月吐谷渾武興宕昌諸國

十月高麗國並遣使朝貢

十四年三月吐谷渾國三月悉萬斤等國五月高麗

國八月宕昌國九月高麗國並遣使朝貢

十五年正月吐谷渾國三月悉萬斤等國五月高麗

國七月吐谷渾國九月吐谷渾高麗宕昌鄧至諸國

並遣使朝獻

十六年三月高麗鄧至國六月高麗國並遣使朝獻

七月吐谷渾世子賀虜頭來朝

八月高麗十月鄧至國並遣使朝獻

十七年正月勿吉國三月吐谷渾國五月宕昌陰平

契丹庫莫奚諸國六月高麗國並遣使朝貢

九月鄧至王像舒彭遣子白詰闕朝貢并奉表求以

位授白詔許之十二月陰平國遣使朝貢

十八年正月高麗國遣使朝貢七月又遣使朝貢

十九年三月鄧至國五月高麗吐谷渾國並遣使朝



貢

二十一年五月衛大國十二月高昌國遣使朝貢

二十二年八月高麗國遣使朝貢

二十三年五月十一月高麗國再遣使朝貢

宣武景明元年七月吐谷渾國八月高麗國並遣使

朝貢

二年正月高麗國十月吐谷渾國十二月高麗國並

遣使朝貢

三年七月于闐國九月武興國世子楊紹先並遣使

朝獻

是年疏勒剽賓婆羅捺烏菴阿喻陀羅婆不哈陀拔

羅弗波女提斯羅達舍伏耆奚那大羅槃烏稽悉萬

斤米居槃訶盤陀撥斤厥味朱沱維南天竺持沙那

斯頭諸國並遣使朝貢

四年四月南天竺國獻辟支佛牙

八月勿吉國貢楛矢

正始元年四月高麗國遣使朝獻

三年九月高麗蠕蠕國並遣使朝貢

二年正月鄧至國遣使朝貢

四年二月吐谷渾宕昌國並遣使朝獻勿吉國貢楛



天

三月疊伏羅四月吐谷渾鳩磨羅阿拔磨拔切磨勒  
 悉萬斤諸國六月杜蘭達那羅舍彌比羅直諸國八  
 月契丹庫莫奚宕昌吐谷渾諸國九月疏勒車勒阿  
 駒南天竺婆羅等諸國十月高麗半社悉萬斤可流  
 伽比沙疏勒于闐等諸國又疏勒厥噠波斯渴槃陁  
 渴文提不那伏柰杖提等諸國並三遣使朝獻十一  
 月阿與陀跋吐羅諸國十二月特那杖提沙鉢離阿  
 失勒磨致鉢鉢喻波利伏佛胄善乾達諸國並遣使  
 朝貢

永平元年二月勿吉南國天竺國三月斯羅陀阿比  
 羅阿夷又多婆那伽伽師達于闐諸國四月阿伏至  
 羅國五月高麗國六月高車國七月高車契丹汗畔  
 剡賓諸國八月吐谷渾庫莫奚國九月蠕蠕國十二  
 月高麗國並遣使朝獻  
 二年正月胡密步就磨怛密槃是悉萬斤辛豆那越  
 拔怛高昌諸國並遣使朝貢  
 是月厥噠薄知國貢白象一  
 三月磨豆羅阿曜社蘇突闍地伏羅諸國五月高麗  
 國六月高昌國七月契丹國八月鄧至國高昌勿吉



庚莫奚諸國十二月疊伏羅弗菩提朝隋陀咤波羅諸國並遣使朝獻

三年二月高昌鄯至國三月高麗吐谷渾宕昌諸國閏六月吐谷渾高麗契丹諸國七月吐谷渾國八月勿吉國九月烏長伽秀沙泥諸國十月高車龜茲難地那竭庫莫奚等諸國十二月高麗比沙杖國並遣使朝獻

四年正月阿悅隋不數羅國三月婆比幡彌烏長北地乾達諸國六月乾達阿婆羅舍越伽使密不流沙諸國七月吐谷渾契丹國八月阿婆羅達舍越伽使密不流沙等諸國並遣使朝獻勿吉國獻楛矢

九月嚙唵朱居不波羅莫伽陀移婆僕羅俱薩羅舍彌羅樂施等諸國十月婆比幡彌烏莫比地乾達等諸國十一月宕昌國難地伏羅國十二月大羅汗婆來伽國並遣使朝獻

延昌元年正月疏勒國三月渴槃陀國五月疏勒及高麗國七月吐谷渾契丹國八月吐谷渾國十月嚙唵于闐高昌及庫莫奚諸國並遣使朝獻

是年勿吉國貢楛矢

二年正月高麗國三月高昌國五月高麗嚙唵于闐



槃隋及契丹庫莫奚諸國九月勿吉吐谷渾鄧至十

二月高麗國並遣使朝貢

三年七月勿吉國九月吐谷渾契丹勿吉諸國十月

庫莫奚國十一月高麗國南天竺佐越費實諸國並

使朝獻

四年二月宕昌國七月蠕蠕國吐谷渾國宕昌國九

月鄧至高昌庫莫奚契丹諸國十月高麗吐谷渾國

十二月高車國並遣使朝貢

是年勿吉國貢楛矢

孝明熙平元年二月吐谷渾宕昌鄧至諸國四月高

昌陰平國五月吐谷渾國七月宕昌高昌國並遣使

朝獻

二年正月勿吉國地伏羅剌賓國二月契丹鄧至宕

昌諸國三月吐谷渾國四月高麗波斯疏勒嚙唃諸

國五月鄧至國七月地伏羅剌賓國八月契丹吐谷

渾國九月吐谷渾國十二月蠕蠕國並遣使朝獻

是年勿吉國貢楛矢

神龜元年二月東益夷州氏及蠕蠕嚙唃高麗勿吉

吐谷渾宕昌疏勒久未阨未久半諸國三月吐谷渾

國四月舍摩國高麗高車高昌諸國閏七月吐谷渾



及波斯疏勒烏菟龜茲諸國八月勿吉國並遣使朝貢

三年二月吐谷渾宕昌國四月嚙唃國並遣使朝貢  
正光元年五月烏菟國遣使朝貢閏月居密波斯國  
六月高昌國勿吉國八月伏羅國十一月高昌國並遣使朝貢

三月七年波斯不漢龜茲諸國十月吐谷渾國並遣使朝貢

四年二月宕昌國遣使朝貢蠕蠕後至俟匿伐來朝  
九月庫莫奚國遣使朝貢

五年二月嚙唃國五月嚙唃契丹地豆于庫莫奚諸國並遣使朝貢

孝昌元年十月蠕蠕國主阿那瓌遣使朝貢

二年二月疊伏羅國四月庫莫奚國並遣使朝貢

三年四月蠕蠕國遣使朝貢六月九月又遣使朝貢  
孝莊永安元年六月嚙唃國獻獅子

出帝太昌元年六月高麗契丹庫莫奚蠕蠕嚙唃高昌等國十一月蠕蠕國並遣使朝貢

永熙三年四月高麗契丹國六月吐谷渾而並遣使朝貢



東魏孝靜帝天平二年春高麗契丹並遣使朝貢

三年高麗勿吉並遣使朝貢

四年高麗蠕蠕並遣使朝貢

元象元年七月高麗遣使朝貢

興和元年五月高麗遣使朝貢

二年蠕蠕國高麗勿吉並遣使朝貢

三年蠕蠕高麗勿吉並遣使朝貢

四年蠕蠕高麗吐谷渾並遣使朝貢

武定元年吐谷渾高麗蠕蠕並遣使朝貢

二年吐谷渾地豆于室韋高麗蠕蠕勿吉並遣使朝貢

貢

三年高麗吐谷渾蠕蠕並遣使朝貢

四年至韋地豆于勿吉高麗蠕蠕並遣使朝貢

五年高麗勿吉並遣使朝貢

六年高麗室韋蠕蠕吐谷渾並遣使朝貢

七年蠕蠕地豆于室韋高麗吐谷渾並遣使朝貢

八月正月地豆于契丹四月蠕蠕並遣使朝貢

西魏文帝大統十一年蠻酋侮勒特來貢其方物

北齊文宣帝天保元年六月高麗十月茹茹國吐谷

渾十二月茹茹庫莫奚國並遣使朝貢



二年二月茹茹國四月室韋國五月高麗七月茹茹吐谷渾並遣使朝貢

三年二月契丹四月室韋國並遣使朝貢

四年正月庫莫奚並遣使朝貢

十二月帝討突厥突厥請降許之於是貢獻相繼

五年七月肅慎八月突厥並遣使朝貢

六年四月突厥五月茹茹十一月高麗十二月庫莫

奚遣使朝貢

七年九月庫莫奚十月契丹並遣使朝貢

八年八月庫莫奚遣使朝貢

武成帝河清二年室韋國庫莫奚靺鞨契丹並遣使朝貢

三年高麗靺鞨新羅並遣使朝貢

後主天統元年高麗契丹靺鞨並遣使朝貢

二年突厥靺鞨並遣使朝貢

三年十月突厥大莫婁室韋百濟靺鞨等國各遣使

朝貢

四年契丹靺鞨國並遣使朝貢

五年二月大莫婁國遣使朝貢

武平元年七月靺鞨遣使朝貢



三年新羅百濟勿吉突厥並遣使朝貢

四年高麗靺鞨並遣使朝貢

六年四月靺鞨遣使朝貢

後周明帝二年六月嚙噠遣使獻方物

十二月突厥遣使獻方物

武成元年閏五月高昌遣使獻方物

武帝保定元年正月突厥吐谷渾高昌二月突厥宕

昌五月突厥龜茲並遣使獻方物

三年三月宕昌遣使獻生猛獸二詔放之南山

四年五月突厥七月粟特並遣使獻方物焉遣使獻

名馬

五年正月吐谷渾遣使獻方物十一月又遣使獻方物

天和二年五月突厥吐谷渾安息並遣使獻方物

四年七月突厥遣使獻馬

建德三年正月突厥遣使獻馬十一月于闐遣使獻馬

六年九月吐谷渾十一月百濟並遣使獻方物

十二月吐谷渾又遣使獻方物

宣政元年三月突厥十月百濟並遣使獻方物



册府元龜

册府元龜

巡按福建監察御史臣李嗣京

訂正

分守建南道左布政使臣胡維霖 參閱

知建陽縣事 臣黃國琦較釋

外臣部

朝貢三

隋高祖開皇元年三月白狼國七月靺鞨酋長八月突厥阿波可汗九月突厥沙鉢略可汗並遣使貢方物

二年正月高麗百濟並遣使獻方物十一月高麗又



遣使獻方物

三年正月高麗四月突厥五月高麗靺鞨並貢方物  
八月靺鞨又貢方物

四年靺鞨貢方物契丹率諸莫賀弗來謁

五年四月契丹主多彌遣使貢方物

六年三月突厥沙鉢略使貢方物

是年女國遣使朝貢

七年突厥沙鉢略使其子入貢方物

是年突厥都藍可汗遣其母弟儻但特勒獻于闐玉  
杖

八年突厥都藍部落大人相率遣使貢馬萬匹羊二  
萬口駝牛各五百頭

十年七月吐谷渾十一月契丹遣使朝貢

十一年正月高麗二月吐谷渾四月突厥雍虞間可  
汗五月高麗十二月靺鞨並遣使貢方物

十二年春正月帝在仁壽宮突厥高麗契丹並遣使  
獻方物

是年吐谷渾靺鞨並遣使貢方物

十三年正月契丹奚霫室韋七月靺鞨並遣使貢方  
物



十五年五月吐谷渾六月林邑並遣使貢方物

十七年六月高麗七月突厥並遣使貢方物

十一月突厥遣使來朝

煬帝大業三年五月突厥啓民可汗遣子招特勒來朝景寅又遣其兄子昆黎伽特勒來朝

六月吐谷渾高昌突厥莫何可汗並遣使貢方物

四年三月百濟倭赤土伽羅舍國並遣使貢方物

五年二月赤土國四月狄道黨項羗並遣使貢方物

是年高麗吐谷渾伊吾並遣使來朝

八月突厥沙鉢略可汗遣子庫舍特勒來朝

是年石國遣使朝貢

六年三月倭國六月室韋赤土並遣使貢方物

七年二月百濟遣使朝貢

十年七月曹國百濟國並遣使貢方物

十一年正月突厥新國靺鞨畢大辭訶咄傳越烏那

曷波臘吐火羅俱慮建忽論靺鞨訶多沛汗龜茲疎

勒于闐安國曹國何國穆國畢衣密失范延伽折契

丹等國並遣使朝貢

十二年二月真臘國婆利國並遣使貢方物附國鏐

汗挹恒末國史國波斯漕國焉耆等國大業中並遣



使朝貢

唐高祖初爲唐主突厥遣使獻良馬卽位龜茲國王蘇伐敦駃遣使來朝

武德元年五月突厥始畢可汗七月西蕃突厥闕可汗遣使貢九月始畢又遣骨咄祿特勒來朝

二年二月吐谷渾遣使朝貢

四月曷沙那可汗獻大珠是月始畢可汗七月西突厥葉護可汗及高昌九月吐谷渾十月靺鞨首師突地稽遣使朝貢突稽者靺鞨之渠長也隋大業中與兄瞞咄率其部內屬於營州瞞咄死代總其衆拜遼西太守封扶餘侯朝煬帝於江都屬化及之亂以其徒數百間行歸柳城至是通使焉

十一月吐谷渾黨項並遣使朝貢

是年高麗王高建武遣使來朝

三年正月三月西蕃突厥葉護可汗遣使朝貢

是年高昌王麴伯雅遣使來朝

五月六月突厥繼來貢方物

八月西爨十一月突厥並來貢方物

是年特物蠻首領謝隆羽遣使朝貢

四年正月突厥頡利可汗三月西突厥葉護可汗遣



使朝貢

十月百濟遣使獻果下馬

是月新羅國句麗及西域二十二國並遣使朝貢

十二月昆明西南夷昆彌遣使朝貢先是隋文帝時

遣史萬歲平南寧至西洱河其國人來拒因獻明珠  
徑寸萬歲班師至是嵩州治中吉弘偉通南寧因至  
其國諭之遂使入朝自是以後朝貢不絕

五年四月西突厥葉護可汗遣使獻獅子皮又八月  
遣使獻名馬

十一月靺鞨渠帥阿固郎來朝

是年突厥頡利可汗及高麗並遣使朝貢

六年二月林邑四月西突厥六月契丹酋帥孫敖曹

十月新羅十二月白簡白狗羗高麗突厥吐谷渾並

遣使朝貢

是年真臘國遣使貢方物

七年二月契丹三月昆明五月百濟六月康國吐谷

渾及西突厥莫賀咄可汗七月百濟康國曹國並遣

使朝貢靺鞨渠帥阿固郎來朝

六月高昌獻狗雌雄各一高六寸長一尺餘性甚能  
牽馬銜燭云本出拂林中國有拂林狗自此始也



九月百濟遣使獻光明甲

是月吐谷渾十二月高麗國並遣使來貢方物

八年正月突厥頡利可汗三月吐谷渾四月林邑九

月真臘國叅朱國十一月新羅百濟並遣使朝貢

九年西突厥三月葉護可汗四月靺鞨六月葉護可

汗七月新羅並遣使朝貢

九月頡利可汗獻馬三千匹羊萬口不受

十一月頡利可汗十二月高麗百濟黨項並遣使朝

貢唐國王屈木友遣使獻名馬

太宗貞觀元年正月西突厥閏三月高昌吐谷渾等

五月何國康國六月新羅十月西突厥十一月新羅

並遣使朝貢

二年四月西突厥遣使貢方物

九月高麗王建武遣使奉賀破突厥頡利可汗並上

封域圖

十月林邑真臘叅半殊柰並遣使朝貢

十一月頡利可汗遣使貢馬牛數萬許

是年鐵勒遣使朝貢

三年正月契丹渠帥來朝

二月高昌八月薛延陀九月高麗百濟新羅並遣使



朝貢拔也右僕骨內同羅奚等渠帥並來朝

十一月西突厥高昌十二月西趙夷子牂牁兗州蠻

靺鞨別部並遣使朝貢契丹東謝渠帥來朝

是年霫國居長遣使貢方物室韋遣使貢豐豹貂自

此朝貢不絕

四年二月薛延陀吐谷渾並遣使朝貢

五年林邑獻火珠狀如水精日正午時以珠承景取

艾衣之卽火見云得於羅利國婆利國遣使隨林邑

使獻方物

七月室韋九月薛延陀並遣使貢方物

十二月牂牁蠻謝龍羽遣使朝貢

是年龜茲國王蘇伐疊遣使獻馬自此朝貢不絕又

東女國王湯傍氏遣使入朝

五年九月百濟十月薛延陀十一月室韋倭黑水靺

鞨並遣使朝貢黨項白蘭渠帥奚契丹俟斤並來朝

是年林邑獻五色鸚鵡又獻白鸚鵡情識辨慧善於

應答自此朝貢不絕

六年正月五月薛延陀遣使朝貢吐谷渾遣其名王

來朝

六月契丹渠帥來朝



七月焉耆閏八月契丹奚十一月薛延陀室韋靺鞨  
十一月雪山黨項百濟新羅並遣使朝貢

是年于闐國王尉遲屋密遣使獻玉帶帝優詔答之  
又烏羅渾國君長遣使獻貂皮

七年正月契丹奚渠帥並來朝

五月吐谷渾七月高昌九月盤盤國十月西突厥奚  
利苾咄陸可汗並遣使朝貢

八年四月吐谷渾遣使朝貢室韋靺鞨渠帥並來朝  
十一月吐蕃十二月石國高昌並遣使朝貢

九年正月西突厥同娥設二月于闐王焉耆四月薛  
延陀真臘唱盤陀國閏月疏勒國五月吐火羅八月  
西突厥九月于闐室韋薛延陀盤盤國十月處月鷓  
十一月百濟十二月吐蕃西突厥並遣使來朝貢方  
物

是年康國獻獅子

十年二月百濟焉耆于闐疏勒三月薛延陀八月甲  
子西突厥十二月疏勒朱俱波其棠並遣使來朝

十一年六月剽賓遣使獻舍利名馬

八月西蕃唃利始可汗遣使獻方物

十一月吐谷渾河源郡王慕容諾昌鉢獻牛羊萬三



千頭薛延陀遣子達度設頡利苾來朝

十二月百濟王扶餘璋遣太子隆來朝并獻鐵甲雕  
斧帝優勞之

是年康國獻金桃銀桃詔令植之於苑囿

十二年正月僧高武令迦乍鳩密等四國遣使朝貢  
並南荒之小國也朝中國自是始通衣服言音與林  
邑同俗

六月獨和羅國遣使貢方物南方荒外崑崙之類也  
八月吐谷渾十月西突厥烏羅國喝羅國十一月安  
國並遣使貢方物迴紇菩薩南過賀蘭山臨黃河遣  
使入貢

十三年二月波斯康國六月昆明國九月薛延陀並  
遣使朝貢

十月百濟遣使貢金甲雕斧

十四年正月焉耆國三月流鬼國五月訶陵獨和羅  
國賓國並遣使貢方物

是年高麗王遣其太子桓權來朝并獻方物

十五年二月盤盤國十一月甲午大羊同國並遣使  
貢方物

是年天竺國王尸羅逸多遣使朝貢帝復遣李義報



使其王復遣使獻大珠及鬱金香菩提樹

十六年春正月吐蕃于闐百濟高麗新羅康國龜茲吐谷渾曹國賀國史國婆羅國曇陵叅半四月俱密國五月林邑國十一月朱阇國烏菴國遣使獻方物烏菴自古未通中國其王達摩因阇訶斯遣使奉表曰大福德至尊一切王中上乘天寶車破諸黑暗譬如帝釋能伏阿脩羅王奴宿種善根得生釋種拜至尊因獻龍腦香帝嘉其遠至降璽書以答慰之是年蜀賓國遣使獻襦時鼠喙尖而尾赤能食蛇有被蝨螫者鼠輒臭而尿之其瘡立愈

十七年正月朔薛延陀百濟高麗新羅吐谷渾康國女國閏六月墮和羅國十一月吐蕃薛延陀新羅婆羅門同娥西蕃處般啜等國各遣使獻方物

是年拂菻王波多力遣使獻赤頗黎綠頗黎石綠金精等物陀洹國遣使來朝

十八年正月朔吐谷渾薛延陀吐蕃高麗百濟新羅康國于闐三月火辭彌國十二月摩羅游國遣使獻方物

十九年正月庚午朔百濟太子扶餘康信延陀新羅吐谷渾吐蕃契丹奚吐火羅葉護沙鉢羅葉護于闐



同娥康國靺鞨靺靺等遣使來賀各貢方物

二十年正月吐谷渾吐蕃高麗石國三月西蕃似槃國王瑟匿國閏三月悉立國章求拔國俱蘭國並遣使貢獻章求拔國或云章揭拔本西羗種也在悉立西南聞悉立內附其王羅利多善伽遣使因悉立以朝獻後右衛率長史王玄策往西域爲中天竺所劫其王發兵赴之破賊有功自此職貢俱蘭亦名爲俱羅其王表曰如雪如珠如雲如月潔白高遠是丈夫枝清涼一切如須彌山又如大海威力自在如那羅延如日光明大王中王大漢國勝天子名流四海俱

羅那國王忽提婆謹修禮拜

毛月吐蕃遣其大臣祿祿東贊奉表曰聖天子平定四方日月所照之國並爲臣妾而高麗恃遠闕於臣禮天子自領百萬渡遼致討隳城陷陣指日凱旋夷狄纔聞天子發駕少選之間已聞歸國鴈飛迅越不及陛下速疾奴忝預子壻喜百嘗夷夫鵝猶鴈也故作金鵝奉獻其鵝黃金鑄成高七尺中可實酒三斛是年五月天竺遣使貢方物

二十一年正月龜茲羊同石國吐蕃波斯康國吐谷渾並貢方物



二月隋洹國獻白鸚鵡毛羽皓素頭上有紅毛數十莖垂與翅齊并五色鸚鵡各一及婆律膏

三月帝以遠夷各貢方物珍果咸至其草木雜物有異于嘗者詔皆使詳錄焉葉護獻馬乳蒲桃一房長

二丈餘子亦稍大其色紫摩伽陀國獻菩提樹一名波羅葉似百楊康國獻黃桃大如鵝卵其色黃金亦

呼為金桃伽毘國獻鬱金香葉似麥門冬九月份開狀如芙蓉其色紫碧香聞數十步華而不實欲種取

根剝賓獻俱物頭花其花丹白相似而香遠聞伽失畢國獻泥樓鉢羅葉類荷葉缺圓其花色碧而葉黃

香芳數十步徒達獻佛土葉一莖五葉花赤心中正黃而葉紫色泥鉢羅獻波稜菜類紅藍實如葵梨火

熟之能益食味又有酢菜狀類慎火葉闊味雖少若久食益人胡芹狀似芹而味香渾提葱其狀猶葱而

其辛嗅藥其狀類凌冬而青收乾作末味如桂椒其根能愈氣疾薛延陀獻拔蘭鹿膺毛而牛角大如麋

西蕃突厥獻馬蹄羊其蹄似馬波斯國獻活耨蛇形如鼠而色青身長八九寸能入穴鼠西蕃咄陸可汗

獻金卵銚烏鶯也雕刻作禽獸而塗以黃金西蕃胡

國出石密中國貴之帝遣使至摩伽陀國取其法令



揚州煎諸薦之汁於中厨自造色味逾於西域所出  
前代或有貢獻人皆不識及破高昌收馬乳蒲桃實  
於苑中種之并得其酒法帝自損益造酒成凡有八  
色芳辛酷烈味兼緹盎旣頒賜羣臣京師始識其味  
八月骨利幹國遣使朝貢獻馬百匹尤駿帝奇之各  
爲製名號爲十驥其一日勝白其二曰皎雪駿其三  
曰凝露驄其四曰玄光驄其五曰决波駿其六曰飛  
霞驃其七曰發電赤其八曰流金馭其九曰翔麟紫  
其十日奔虹赤

十二月都播者部遣使朝貢播者鐵勒之別種也聞  
骨利幹來通宣國威靈於是遣使

是年葱嶺墮婆登國龜茲國吐谷渾獻突没皮突厥  
車鼻可汗並遣使朝貢

二十二年正月朔結骨吐蕃吐谷渾新羅高麗吐火  
羅康國于闐烏長波斯石國並遣使朝貢

三月焉耆國五月蜀賓六月盤盤國十二月吐谷渾  
河源王並遣使朝貢

二十三年二月西突厥肆葉護可汗安國王並獻方  
物墜和羅國遣使獻象牙火珠

三月西洱河大首領揚同外河東大首揚欽松外蠻



首領蒙羽等來朝

高宗以貞觀二十三年卽位八月吐谷河源郡王慕容諾曷鉢獻馬牛

九月迦毘葉國遣使獻天鐵熊其力生擒白象獅子永徽元年正月吐蕃遣使朝貢

五月吐火羅國獻大鳥高七尺其足如駝有翅而能飛行日三五百里能噉銅鐵夷俗呼爲駝鳥

二年八月大食國始遣使朝貢

十月真臘國獻馴象陀桓國遣使來獻

十二月蜀賓國遣使獻禱池鼠

是年春正月朔泥婆羅國遣使朝貢

三年春正月朔吐谷渾新羅百濟高麗並遣使朝貢

八月吐谷渾遣使獻名馬十月蜀賓國曹國十一月

駿馬國並獻使朝貢

四年四月林邑國人諸葛地自立爲王遣使貢方物馴象

七月吐谷渾獻名馬

十一月新羅遣使獻金總布是月曹國蜀賓國並嗣主新立各遣使朝貢

五年四月蜀賓國曹國康國安國吐火羅國並遣使



朝貢

五月林邑國獻馴象

八月吐蕃使人獻野馬百匹及大佛廬高五尺廣廣

各三十七步九月吐谷渾遣使朝貢

十二月倭國遣使獻琥珀馬腦琥珀大如斗馬腦大

如五升器

六年六月大石國鹽莫念並遣使朝貢

顯慶元年正月女國遣女使高霸梨文并其主男三

虜等來朝

五月婆岸國遣使獻方物

十月新羅王遣其子右武衛將軍文王來朝

十二月高麗王高藏遣使奉表賀册皇太子

二年正月庚申朔吐火羅國獻師子

二月林邑國遣使朝貢

六月瞻國憐國遣使獻馴象犀牛

十二月吐蕃贊普遣使獻金城城上有獅子象駝馬

原羝等並有人騎并獻金瓮金頗羅等

三年八月干私弗國王法施拔底舍利君國王失利

提婆摩臘王施婆羅地多並遣使朝貢三國並南天

竺屬也國皆絕遠未嘗與中國通至是汎海累月方



達交州并獻其方物

四年十月蝦夷國隨倭國使入朝

龍朔元年八月多笈國王摩如失利多福國王難修強宜說耽羅國王儒李都羅等並遣使來朝各貢方物三國皆林邑之南邊海小國也

二年五月于弗國摩臘國三濮國哥羅舍分國修羅分國其畢國並遣使獻方物哥羅舍分國在南海之南東接墮和羅國其王名蒲伽越摩精兵二萬人其使以顯慶五年發本國至是到京修羅分國居於南海之北木柵爲城東至真臘國南至海其王名尸達摩提婆精兵二萬餘人其畢國居於東海之濱東接林邑其王名旗陀越摩精兵可五千人其使以龍朔元年發本國至是到京

乾封元年七月單單國訶陵國各遣使獻方物

二年十月波斯國獻方物

總章元年七月未陀提國遣使獻方物

二年八月林邑王鉢伽舍跋摩羅婆王稱達鉢等十

一月倭國並遣使獻方物

三年林邑獅子訶羅單單等並遣使朝獻

咸亨元年三月罽賓國獻方物倭國王遣使賀平高



麗

二年三月拔汗那五月吐火羅波斯康國剽賓國八月鳩密國王尸利鳩摩富那國王尸利提婆跋摩各遣使來朝貢其方物

三年三月南天竺國各獻方物

四月吐蕃遣其大臣仲琮來朝

上元二年正月右驍衛大將軍龜茲王白素稽獻銀頗羅賜帛以答之拔汗那王獻碧頗黎及蚘黃

十二月丁亥龜茲王白素稽獻名馬

二年二月堅昆獻名馬

九月新羅王金法敏遣使獻方物

儀鳳二年四月于闐獻方物

調露元年十月康國拔汗那護密國各遣使朝貢

永隆二年五月大食國吐火羅國各遣使獻馬及方物

永淳元年五月大食國波斯真臘國九月石國十二月南天竺及于闐國各遣使獻方物

則天垂拱二年三月林邑國遣使獻馴象

九年女國十二月敕律國並遣使朝貢

天授二年十月林邑國遣使獻馴象



三年三月東天竺國王摩羅拔摩西天竺國王尸羅

逸多南天竺國王遮婁其拔羅北天竺國王那那中

天竺國王地摩西那龜茲國王延繇拔並來朝獻

長壽元年九月剌賓國遣使朝貢

延載元年七月骨利幹遣使朝貢

證聖元年春一月林邑國貢戰象

四月林邑國遣使朝貢

萬歲通天二年四月安國獻兩頭犬

六月女國十月敦律國遣使朝貢

神功元年二月辛丑葱嶺國遣使貢方物

聖曆元年春正月真臘國四月疏勒王裴夷健臘月

默啜並遣使朝貢

二年二月新羅王金理供遣使貢方物

六月林邑國遣使獻馴象

八月突騎施烏質勒遣其子遮弩來朝

久視元年七月謝國貢方物

長安元年十二月佛誓國遣使貢方物

三年三月大食國遣使獻良馬

十月日本國遣其大臣朝臣貢人貢方物

十二月林邑國遣使朝獻



三年正月吐蕃新羅林邑並遣使朝貢

十月林邑國遣使朝獻

十一月突厥遣其大臣移力貪汗獻名馬千疋并方物

中宗神龍元年三月新羅王金志誠遣使來朝九月又遣使獻方物

二年四月新羅王金隆基遣使獻方物

二月日本國遣使來朝

七月波斯國林邑國八月新羅國並遣使貢獻

十月新羅國又遣使朝貢

三年二月吐蕃贊普遣其大臣悉董熱獻方物

五月真臘國六月康國王突氏並遣使獻方物

八月林邑國遣使獻馴象

景龍元年十一月室韋首領十二月新羅並遣使朝貢獻

二年春正月吐谷渾三月波斯十一月堅昆並遣使來朝

三年正月龜茲二月吐蕃三月崑崙國六月新羅八月吐蕃遣使貢方物

十月室韋並遣使貢方物



十一月林邑國遣使獻白象及方物

四年正月新羅焉耆南天竺真臘等國四月高麗各遣使來朝

睿宗景雲元年九月南天竺國吐蕃十月謝颺蜀賓國並遣使貢方物欽化可汗突騎施守忠遣使來朝十二月吐蕃遣使獻方物

是年奚首領李大酺遣使貢方物

二年八月九月突厥並遣使來朝

十一月靺鞨室韋遣使獻方物

十二月突厥獻食大食新羅林邑獅子國遣使獻方

物拂菻國獻方物

太極元年二月新羅突厥並遣使朝貢

四月林邑國五月吐蕃並遣使獻方物

延和元年八月吐蕃遣使朝見

冊府元龜